

فخ الزوجية

رقم الإيداع

٢٠١٧/٢٧١٤٠

الترقيم الدولي

978-977-6642-00-3

فخ الزوجية

نجوى موسى نصير

غلاف: محمد عبدالسلام

تصحيح : محمد أمين

إخراج فني: محمد محمود

المدير العام: إيناس ناصر

مدير التوزيع: حمزة القاضي



دار لوغاريتم للنشر والتوزيع

المنصورة - حي الجامعة - امام القرية الأولومبية

Logarithmpublish@gmail.com

يمنع طبع هذا الكتاب او اي جزء منه بكل طرق الطبع،
والتصوير، والترجمة، والتسجيل المرئي، والمسموع
والحاسوبي، وغيرها من الحقوق إلا بإذن خطي من الناشر



فخ الزوجية

نجوى موسى نصير

الزواج

الزواج هو مؤسسة يكونها شخصان وتندمج بواسطته عائلتان وهو أيضًا مسؤولية وحياة جديدة لأي بنت وأي شاب، فالبنت تصبح مسؤولة عن بيت ورجل وتكون صاحبة قرار فيه وفجأة بعد أن كانت تحت رعاية والديها، لاتحمل للدنيا همًا وتخرج مع صديقاتها، تصبح صاحبة بيت، ويأتي بعد الزواج الأطفال وتتحمل تربيتهم وتنشئتهم وهكذا وبالنسبة للشباب أيضًا بعد أن كان لا يحمل همًا سوى الخروج مع أصدقائه والسهر ويعيش في بيت أهله غير مسؤول عن أي شيء يتحول إلى رجل البيت وتحت رعايته زوجة ومن بعد ذلك أطفال .

الزواج كلمة كبيرة جدًا حيث يعيش شخصان معًا ويرى كل منهم الآخر على وجهه الحقيقي ويبدأ في التعرف على طباعه وعاداته ربما يعجبه ما يرى وربما لا يعجبه ولا وجه للمقارنة أبدًا بأيام الخطوبة، في الخطوبة يتجمل كل شخص ليظهر أفضل ما عنده وهي غير مقصود بها الخداع دائمًا ولكن يريد كل طرف أن ينال إعجاب الشريك بأي طريقة ولا يظهر عيوب بقدر الإمكان ويحاول أن يظهر تصرفات مثالية وهو يعلم جيدًا بأنها سوف تنال إعجاب الطرف الآخر وبالتالي تكون الخطوبة كلها جميلة ورومانسية، الخطوبة حلم كل فتاة بالنسبة للبنت فهي خروج، إتصالات هاتفية دائمة، رسائل حب، دباديب وقلوب .. إلخ، بالطبع يمكن أن توجد بعض الخلافات



أحيانًا وربما يكون الحب مثل الغشاوة على أعين الفتاة والشاب وحتى إذا ظهرت عيوب يتغاضى عنها من أجل إتمام الزواج، بعد الهيصمة والفرح والزفة يأتي الزواج وتبدأ الصدمة والحياة الواقعية وكما يقولون تنتهي الفكرة وتأتي السكرة وعندما يتم الزواج يعيش الشاب والفتاة في بيت واحد معًا ويعلم كل منهم عن صفات وطباع الآخر بشكل أوضح ويصبح كل شيء على المكشوف ربما يكون الزواج في عش سعيد وربما يكون فخ بمعنى أن يجد كل منهم في وضع مرهق له نفسيًا وجسديًا ولايستطع الخروج منه بسبب التقاليد والعادات أو بسبب المجتمع أو بسبب الأولاد ويعيش كل من الزوجين في حالة كبت وحزن وتكون حياتهم رتيبة في بعض الأحيان أو مليئة بالمشاكل والشجارات في أحيان أخرى والتجربة خير دليل وحتى لانظلم أحد سوف نقوم في هذا الكتاب بعرض بعض التجارب للطرفين ولكم الحكم في النهاية .



الفخ الأول

الصدمة

اسمي ولاء عمري 29 سنة وجيت أحكي لكم تجربتي في الزواج واللي عمرها ٧ سنين، تزوجت من حسام زواج عن حب كان زميلي في الكلية ، عشنا قصة حب لمدة ثلاث سنوات وطبعًا حسام ده كان بالنسبة لي أحلى من رشدي أباطة وأوسم من أحمد رمزي، الحب بقى كان مسيطر عليا ، مكنتش شايفه فيه أي عيب كان هو رجل الأحلام بالنسبة لي كل حاجة فيه كانت بتعجبني وبعد التخرج تمت الخطوبة بمباركة العائلتين وحسام كان ببيحي لنا البيت طبعًا كنت باعرف قبل ماييحي من ريحة البارفان اللي سابقاه وأراقبه وهو يبشرب الشاي والعصير برقة وقلبي بيدق من الحب ياختي على جماله ، ووقعت فيه زي زينات صدقي ماوقعت في إسماعيل يس في فيلم ابن حميدو والحمد لله مرت الخطوبة من غير أي مشاكل وحي زاد لحسام وتزوجنا وبدأ شهر العسل اللي كان عبارة عن إسبوعين في الغردقة عشت فيهم فرحتي بحسام حبيبي وجوزي وعلى عش الحب زي شادية وسونة ياسنسن جتلك أهو ، اكتشفت في الأسبوعين دول شوية حاجات غريبة أول مرة أعرفها عنه طبعًا لأننا عشنا مع بعض أسبوعين بحالهم وكانت أول صدمة لي في الزواج.. أول يوم وصلنا كنا بالليل ويادوب طلعلنا الأوضة نرتاح كنا تعبانين



طبعًا وهلكاين فتح بقه بشكل عجيب وهو بيتابو وتسمرت في مكاني أول مرة أشوفه وهو بيتابو طلع صوت يشبه صوت زئير الأسد وتقريبًا كدا شفت اللوز.

إيه اللي أنا شايفاه ده ؟ ليه كدا يا حسام ؟ ده أيام الخطوبة لما كان بيتابو كان بيوارب بقه فتحة حوالي ٣ سم قد الخاتم كدا وبيحط إيده ويقول باردون آه والله العظيم كان بيعمل كدا .

بس والله قدرت إنه تعبان برضه وقلت عادي وفضيت الشنط ونمنا وفجأة وأنا نايمة صحيت على صوت طائرة هليكوبتر قريبة قوي كنت سامعاها بوضوح وكأنها معانا في الأوضة ولسه هارفع الغطاء وأقوم أفتح البلكونة وأشوف اكتشفت أن ده مش صوت هليكوبتر نو، الصوت كان جاي من جنبي !! حسام بيشخر !! ضحكت ضحكة عبيطة من بتوع سناء يونس وأنا مش مصدقة نفسي ، بصيت له بصدمة وأنا بأسمعه بيشخر بمزاج ، طبعًا ده شيء غصب عنه هي المفاجأة بس اللي ربكتني شوية وكمان المشكلة إن أنا مباعرفش أنام في أي صوت وأول ليلتين كنت بأفضل صاحية طول الليل وهو بيعزف سيمفونية شخير معتبرة وبأكثر من نغمة يعني على ظهره صوت وعلى جنبه صوت تاني خالص، حطيت قطن في وداني بس ماشاء الله شخير بيرج الأوضة حطيت مخدة برضه منفعش وبقيت بأصحيه كل شوية وقبل ماعيني تغفل يشغل السيمفونية وأضطريت إنى اتعايش يعني حسام حبيبي وجوزي ومش معقول حاجة زي دي هاتعكنن عليا أو تعمل بينا خلاف



وقررت أشتري سدادات للودان ماهو أنا لازم أنام ، وإلا يعني هو يلحن طول الليل وأنا أفضل صاحية زي القردة أسمع الطرب الأصيل بتاعه .
المرة الثانية بقى واحنا في مطعم الفندق ، كنا بناكل طبعًا أنا أكلت مع حسام قبل كدا كتير وكان دايمًا ياكل بالشوكة والسكينة بركة وبمنتهى الهدوء، بس اللي حصل لي المرة دي أول مرة أشوفه ، فرج علينا أمة لا إله إلا الله ، عارفين ليه ؟

حسام بياكل بصوت ، لأ هو مش بياكل بصوت بس، ده بيعمل كل حاجة بصوت ،المعلقة بتخبط في الطبق ويشرب بصوت عالي وبياكل بصوت ليه كدا يا حسام؟ ليه كدا يا حبيبي ؟ ده انت أيام الخطوبة كنت زي النسمة محدش بيسمع لك حس وانت بتأكل وسألته آه والله سألته رد وهو بيضحك: أنا أحب أكل بمزاج .

وهو مزاجك مبيجيش غير بالأصوات كل في صمت .

كمل بجملة غريبة جدًا :

وبعدين ده كان أيام الخطوبة.

سألت نفسى يعني إيه أيام الخطوبة ؟ مفهمتش لما قال لي كدا بس بعدين فهمت كل حاجة آه وربنا فهمت ، ورغم ذلك واجي كزوجة إني أقول له وأنتهه وحاولت ألفت نظره بس مفيش فايده وطبعًا قررت نأكل كل يوم في حجرتنا بدل الفضايح.



مأعلينا خلص شهر العسل ورجعنا شقتنا وبدأت حياتنا الزوجية وفي أول يوم رجعنا شفت حاجات تانية في حسام ، غير اللي شفتمها في أسبوعين العسل ، حسام حبيبي وجوزي مبيقفلش ضلفة يفتحها أبدًا أو درج وكأن بينه وبين الضلف المقفولة عداوة هو يفتح بس ويسيب كل حاجة مفتوحة واكتشف ده بالصدفة ، آه والله ، كان داخل يأخذ دش ده شيء عادي وطبعًا معروف إن الرجل مستحيل يلاقي حاجة لوحده ، ماما قالت لي كذا وأنا اتأكدت بنفسي مرة كان بيدور على نضارته وقلت له فوق الكمودينو دخل الأوضة مكانش شايف الكمودينو من أصله آه والله المهم علشان ما أطولش عليكم فضل ينده عليا طبعًا .

ياولاء فين الفوطة ؟ ياولاء فين البيجامة ؟ ياولاء مش لاقى الفانلة ؟ ... إلخ قلت أخلص نفسي من الصداع ده وأروح أجيب له الحاجة ورحت وياريتني مارحت اللي جرى لي ماجراش لحد دخلت أساعده شاورت له على الضلفة وانحنيت بسلامة نية أجيب الفوطة من الدرج ولما وقفت لقيت فجأة حاجة دبت في رأسي جامد و لقيت عيني فيها نور أحمر وأخضر وحاجات بتطير قدامي زي الفراشات والدنيا بتنور وتطفي وفرحت وقلت ايه ده ؟ حسام عاملى مفاجأة لكن لما دماغي وجعتي وبدأت أتطوح وأفقد الرؤية عرفت الحقيقة المرة ، دماغي إتخبط في بوز الضلفة اللي البيه ساها مفتوحة كالعادة وطبعًا محسيتش بالدنيا ووقعت فاقدة الوعي ماعرفش قد ايه بس فققت على أقلام نازلة على وشى بقوة وكأني في معسكر تعذيب وكل قلم ينزل



طراخ يرن في الأوضة ويزن في وداني زن الناموسة الرخمة ، الراجل علشان
يفوقني نزل في ضرب وكأنه ماصدق وسمعت صوته من بعيد وهو بيقول:
ولاء ولاء انتِ كويدسة ؟
قعدت بضعف وأنا باتألم وقلت له :
حد يفوق مراته بالشكل ده ؟ انت بتنفض مرتبة ؟ مش فيه إختراع اسمه
برفان.

أنا اتخضيتُ ومعرفتش أفكر .
عادت الابتسامة إلى وجهي المتورم واتملت عيوني اللي أحولت من الخبطة
بالرومانسية ، حسام جوزي حبيبي اتخض عليا .. أيوه كدا ويري الحب
حسسي بخوفك عليا وجهزت نفسي للحظة حنية ولسه هافتح بقى وأتكلم
وقف وقال :
مش تبقي تأخدي بالك ، حد يقف فجأة كدا ، كنتي هاتكسري ضلفة
الدولاب .

لاتعليق حقيقي لاتعليق هاقول ايه ؟
فصلتني يا حسام لحظة تحولت من الرومانسية إلى شيء مالوش وصف ..
ده أيام الخطوبة جرحت صباغي اتخض عليا وكان عايز يأخذني المستشفى
والله مش بأبالغ ده اللي حصل وفضل يتعامل معايا زي ماكون عاملة عملية
جراحية ، هيبيبيبيح كانت أيام ، المهم أخذ هدومه وإتجه للحمام وهو ييزحف
بالشيشب على الأرض تشيك تشوك تشوك تشوك ، دي حاجة جديدة برضه



عرفتها فيه مع أنه أيام الخطوبة كان بهفهف زي الريشة على الأرض واستغربت هو سابني ومشي ليه مش يجيب لي تلج أحطه طبعًا معبرنيش .. ياللا مهمش قمت أجيب تلج أحطه على دماغي اللي بقللت وخدودي الوارمة .

ماما فضلت تبعت لنا الأكل أسبوع زي ماكل أم بتعمل مع بنتها ، وحسام حبيبي رجع الشغل و طبخت بقى أول مرة في شقتي ، تخيلوا إحساسى .. متخيلين ؟ كنت في منتهي السعادة وأنا بأعمل له الأكل بإيدي وبأعني وأنا في غاية الانسجام وبأتحرك في المطبخ زي راقصة الباليه و بأهفهف زي الفراشة ، باقول تاني حسام حبيبي وجوزي علشان محدش يفهمنى غلط ، سمعت باب الشقة بيتفتح جريت بسرعة علشان أستقبله برشاقة سامية جمال وأنا بأتحرك بنعومة وفتحت دراعاتي وميلت خدي علشان يبوسني بص وقال :

أف الدنيا بره حرنار..

وقعد على أول كرسي زي العمارة اللي بتنهار وقال :

أنا جعان طبختي إيه النهاردة ؟

بلعت ريقى وتجاوزت الاستقبال البايع وقلت في بالي معذور جاي تعبان من الشغل مش مهم وقلت له:

طبخت لك اللي بتحبه هاتاكل صوابعك وراه و.....

قاطعني وقال :



إغر في بقى بسرعة هاموت من الجوع .

زعلت شوية بس ولا همني إيه يعني ؟

جوزي جاي تعبان من الشغل ولازم أقدر طبعًا بس يعني مشاعري اتجرحت
حبتين احنا برضه لسه عرسان جدّاد والمفروض يستقبلني أحسن من كدا

وعديت اللي حصل وحطيت الغداء

طول الغداء فضل مركز في الأكل واستحملت الأصوات اللي بيعملها
وحافظت على إبتسامتي علشان يأكل وهو مرتاح وفضلت أبص له مستنية
كلمة شكرًا ولا تسلم إيديكي زي ما كان بيعمل أيام الخطوبة بس الحقيقة
كان منمك في الأكل زي إسماعيل يس في فيلم الفانوس السحري وعمال
يحط في بقه بسرعة وكأنه في مسابقة ولا عبرني وقام من غير ولا كلمة ،

استنيت إنه يساعدني ويشيل معايا الأطباق ووقفت بأبص له بنظرة حنان
وحب تلين الحجر وسبلت له عينيا ولسه هاتسهوك عليه زي ماجدة زي ما
بأشوف في الأفلام يعني إن الزوج بيقوم يمك الأطباق من إيد مراته وجهرت
نفسى أسمعها بيقول بحنية :

أساعدك يا حبيبتي ؟

وأرد وأقوله :

لأ يامتشوووووح متتعيش نفسك .

يقوم يقول لى :

والله ما انتِ تابعة نفسك معقول أسيب الإيدين الحلوة دي تتعب ؟



عملت حاجة كويدسة وألا هو لسانك هايتشل لو قلت شكرًا ، انت بلعت
المجاملات اللي كنت بتقولها لي دايمًا مع الأكل ؟ ها ماعلينا.

مشي خطوتين والتفت لي وبصيت بأمل وإتهدت أهو هاينطق ويقول كلمة
حلوة لكنه قال :

إعملي لي الشاي بسرعة لأحسن عايز أنام .

شاي !! بص لعنيه المليانة حب اسمع طيب التهيدة الحارة دي عبر أهلي
بكلمة حلوة ماشي يا حسام !

دخل يقعد في البلكونة وطبعًا لميت السفارة لوحدي وأنا بأرزع في الأطباق ،
مش إشكال هو أنا هادقق على كل حاجة ما أسيبه ينام ويرتاح مش هاتلكك
له يعني على كل حاجة ده برضه حسام جوزي وحببي وبينا قصة حب
بيحكوا عنها في العيلة لحد دلوقتي ، عملت الشاي وبعد ما قعد يشربه
بشوية موسيقى تصويرية متنوعة إشي شفقة طويلة مصحوبة بصوت زي
صوت المكنسة على سحبة كدا زي الزمارة وأهم حاجة آخر شوية شاي في
الكوباية لازم يكون لهم لحن مختلف تمامًا يعني اللي فات كان حمادة وده
حمادة تاني خالص فضلت أراقبه وخفت عليه لأحسن يشفط الكوباية وهو
مش واخذ باله.

الحمد لله انتهت الموسيقى قصدي كوباية الشاي ودخل ينام وأنا اتجهت
للمطبخ أغسل الأطباق وأنضف ويادوب خلصت تطبيق الغسيل ولسه
هاقعد وأنا حاسة بالإرهاق البيه قام من النوم وخرج من الأوضة نسيت



أقول لكم إن حسام اللي كان بيكوي هدومه كلها ومبيخرجش من أوضة النوم إلا وهو في منتهى الشياكة خرج ووقف قدامي وهو بالفانلة وشعره منكوش وشكله مش ولا بد خالص وبصيت له وصعبت عليا نفسي وربنا، هو ده حسام حبيبي اللي كان بييجي البيت أيام الخطوبة متأنتك ومتبرفن وذقنه محلوقة على الزيرو ولايس الحتة اللي على الحبل، هو ده حسام الأمور اللي كان بيلعلط كدا من النضافة وبيشف ويرف وشعره متسرح شعراية شعراية وقف يتمطى ويتابو زى الأسد وهو فاتح بقه على الآخر في منظر لكم أن تتخيلوه لايسر عدو ولا حبيب طبعًا وقال:

ياساتر الواحد قايم من النوم مكسر وعضمه كله بيوجعه .

التفتت له بتحفز وعيني فيها نظرة قريبة من نظرة ربا وسكينة وقلت بهدوء لايعكس إطلاقًا إحساسي الداخلي :

من كتر النوم يا حبيبي انت نايم ماشاء الله بقالك أربع ساعات .

قعد جنبى وبكل برود وهدوء قال :

أنا راجل شقيان طول اليوم وباشتغل لما طالع عيني مش زيك قاعدة في البيت مرتاحة .

سلكت وداني وسكتت ثانية بيقول إيه : مرإيه؟ مرتاحة !!! هو أنا

سمعت صح بيقول مرتاحة !!

في هذه اللحظة بالضبط حضر في ذهني وصلة ربح معتبرة من بتوع زينات صدقي أرد بيها عليا، هي مين اللي مرتاحة دي يا حبيبي ؟ ده أنا نضفت



وغسلت ونشرت وجهزت أكل بكرة وانت بتشخر وطول النهار غسيل وتنظيف
وطبيخ .

وطبعًا لأنني مكانش لي مزاج إننا نتخانق وأخلاقي مسمحتش أبدًا إنني أقول
كدا لأنه برضه حسام جوزي حبيبي بلعت كلامي واكتفيت بالبصّة ورديت
بأدب :

ماهو أنا برضه باتعب يا حب

والله ماكملت الجملة لأنه قاطعني وقال باستنكار :

هو انت بتعملي إيه يعني ؟.

بس هو كدا غلط ، عنيكم ماتشوف إلا النور هو قال الجملة دي من هنا
وأنا محسيتش بنفسي ورميته بالريموت في وشه من غيظي وصرخت
بصوت عالي :

إيه ده يا ولاء مش تحاسي هاتقلعي عيني ؟

ضحكت بعبط ورديت عليه بهزار :

باهزر معاك يا حبيبي.

هزار بايخ قومي هاتيلي حتة تلج أحطها على عيني.

بصيت له بغيظ ورفعت حاجب ونزلت حاجب وقلت له :

في موقف مشابه لده سبتني ودخلت تأخذ دش ومعبرتنيش بس علشان أنا
أصيلة وبننت ناس هاجيب لك تلج .



قمت طبعًا اجيبه له وأنا بأضحك ضحكة شريرة زي الساحرات هو أنا يعني
هافضل أكبت جوايا ؟ ده أنا أطق لازم أنفس عن نفسي وإلا إيه ؟ وحلوة
حكاية الهزار دي أبقى أكررها تاني واخرج غضبي بس والله صعب عليا ماهو
برضه حسام جوزي وحببي وبعد كدا عملتها كتير مرة أحدفه بكتاب ومرة
بكوباية ومرة دلقت عليه الشاي سخن وكله هزار.

مرت شهر وأنا وحسام عايشين في عش الزوجية وبنكتشف حاجات عن
بعض وأخيرًا جه الخبر المنتظر ..
أنا حامل.

افرحوا أنا حامل طبعًا لما بلغت حسام جوزي وحببي فرح وبص لي بحنان
وتتوقعوا قال لي إيه ؟
قال:

لما أروح أكلم ماما و أفرحها.
ماما إيه دلوقتي؟ أنا مالي بأملك ؟ دي لحظة بينا إحنا الأثنين نفرح بيها مع
بعض ، بأقولك أنا اللي حامل تقول لي أفرح ماما ؟
وماله ماتفرح أمك بس مش تفرحي الأول ، أنا اللي حامل على فكرة كنت
عايزاه يعمل كدا زي الأفلام يشيلني ويلف بيا في المكان وبعدين يقعدني
بحنان ويقول لي من النهاردة متعمليش أي شغل في البيت والكلام ده ولكن
محصلش، راح إتصل بأمه يفرحها ولاسأل فيا حتى كلمة مبروك مطلعتش
منه مفيش مشكلة.



قلت بقى أكيد هاصعب عليه ويساعدني في شغل البيت طبعًا معملش حاجة وكان بيقول لي انت بتدلعى ماكل الستات الحوامل بيعملوا شغل البيت وفضلت برضه أعمل شغل البيت لوحدي من غير أي مساعدة منه مش مهم أنا اتعودت على كذا خلاص مفيش رومانسية ، بلاش كلام أفلام .

المصيبة بقى لما عرفنا نوع الجنين وطلع ولد قالي إيه بقى ؟؟؟

أنا هاجيب ولد ..

لأ على فكرة يا حسام انت فاهم الموضوع غلط مش انت اللي هاتجيبه لوحديك أنا كمان معاك في الموضوع ده يعني تقول إحنا هانجيب ولد .

مش إشكال هو كل كلمة يقولها يعني هاسجلها له ، بقيت بقى أفكر في اسم المولود نسميه مازن وإلا هشام ولا أحمد ولا يوسف أنا نفسي في يوسف وبرضه علشان هو يختار كتبت لسته اسامى ماهو من حقه يكون له رأى في اسم ابنه فضل سامعني للأخر وسايبني أكتب في قائمة اسامى ولما إتكلم ياريتة ماتكلم حد يسألنى كدا ليه ؟

سألتوا !أقول لكم أنا تفتكروا عايز يسمى المولود إيه؟ أنا هاحكي لكم الواقعة بالظبط كانت أمه عندنا في زيارة تفتيشية كالعادة ولسه باقول لها على الأسامى وقلت يابت خليكي ذوق وخدي رأي حماتك ماهو برضه حفيدها لقيت حسام والمرة دي من غير جوزي وحببيي لأنه مايستاهلش وقف ونفخ ريشه قوي زي الديك الرومي وقال بفخر :

أنا هاسمي المولود على اسم بابا الله يرحمه .



انت عايز تسمي ابني مرزوق ؟

وفما إيه يا ولاء ده اسم والدي ولازم أخلد ذكره .

رديت عليه بغضب:

تخلد اسم مين ؟ ده إبني ، عايز تسمي لي الواد اللي لسه ماشافش الدنيا مرزوق؟ ضاقت بيك الدنيا ؟ خلصت الأسمي خلاص معدش غير اسم أبوك ؟ هاتروح من ربنا فين ؟

الرد بقى ماجاش منه هو المرة دي، لأ يا حيايى ده جه من حماتي اللئيمة بصت لي بقهر وهي مقشعرة وشها ومديانى مسحة حزن سوداوي وبتحاول تعصر في عنقها وتنزل دمعة وهي بتفتكر المرحوم اللي مات من عشر سنين وكان منكدها عليها عيشتها ومطلع روحها وقالت:
علشان إسم الرحوم يفضل عايش ومخلد .

لحد هنا وصبري نفذ وقفتم لها بقى وصققت بإيدي وأنا على آخري وفرشت لها الملاية وخرجت مني زينات صدقي مرة ثانية في أبشع حالاتها وفي أهم إحدي وصلات الردح المتستفة وقلت :

تخلدي اسم المرحوم ! مرحوم مين يا أم مرحوم ؟ ماهو لازق في اسم إبنك وملطوع وراه حسام مرزوق ، الواد لما بيعي لو سميته يوسف هايبقى يوسف حسام مرزوق يعني الإسم متنيل موجود في اسم العيلة ولازق زي بقعة الحبر اللي مبتطلعش ، إبني ذنبه إيه تظلموه معاكم ؟ .

_ بس أنا كنت بأتمنى إني أجيب ولد وأسميه على اسم بابا.



حسبى الله ونعم الوكيل يا حسام فيك انت وامك وكملت كلامي بنفس صوت الأوبرا وقلت :

إيه؟ إيه؟ إيه؟ إيه؟ بتقول إيه يا حبيبي !! إسم ماما !!!! عايزني أسمى بنتي على إسم قرد؟

والله هو الرد خرج مني تلقائي وغصب عني من غيظي هي حماتي سمعت من هنا وركبها عفريت وقامت واقفة وهي بترتجف من الغضب وقالت شوية كلام كتير مش فاكرة منه حاجة وخرجت من الشقة زي العاصفة ورزعت الباب وراها بقوة وهي بتقول:
يحرم عليا بيتك من بعد النهاردة .

ودي كانت آخر مرة تزورني حماتي فيها وفضلت مقاطعاني لحد الولادة وكل ماتشوفني ترميني بنظرات مشتعلة بس على مين ولا همي نحست خلاص وسميت الولد يوسف بس هي حرقت دمي وكانت على طول تناديله مرزوق .
القشة الأخيرة ..

شفتوني أنا كنت زوجة صبورة قد إيه وعديت كل حاجة فانت واتحملت وقلت عادي لحد ماجت القشة الأخيرة في قصة حيي أنا وحسام وتحول حسام من بعدها على طول من حبيبي وجوزي إلى جوزي وبس وكفاية عليه كدا .



بيحبوا كله هبل والله ، وقفت اراقبهم من عند باب المطبخ وهم بيتفرجوا على الماتش وبيزعلقوا زي المجانين بصيت على حسام اللي كان لابس الفانلة كالعادة وبنطلون ترينج جريان مش راضي يخليني أرميه وكان عمال ينط زي القرد ويصوت وسألت نفسى مين ده؟ أنا حببت إيه في حسام؟ فكرت شوية كدا ودورت في دماغي ملقتش حاجة صحيح مراية الحب عمياء وقعدت في المطبخ أندب حظي.

و أخيرًا خلص الماتش ومشيووا وخرجت من المطبخ ودي كانت آخر حاجة فاكارها لأنني بعد أول نظرة للصالة جالي إنهييار عصبي من منظرها .. كل حاجة كانت على السجادة والكراسى فرافيت كيك وعصير مدلوق وقشر لب في كل مكان وكنبة الانتريه مبقعة من الشاي والمخدرات كلها على الأرض وفيه فائزة مكسورة وسألته بصوت مصدوم:

هي الصالة كان فيها أحصنة بتجري ؟
اللي غاظني وحرق دمي مش الرد لأ اللي حرق دمي إنه كان بيضحك وبيقهقه وهو بيقول:

أصل إحنا كنا واخدين راحتنا شوية والفائزة دي وقعت لما جه جون ...
جون ! ياختي على خفة دمك !! ياظرافة أمك !! وكمان بتضحك؟ والصالة اللي بقت مقلب زباله دي مين هاينضفها ؟ فرد نفسه قوى على الكنبة وحط رجل على رجل وقال ببرود وسماجة وهو بيبأكل فول وبيرمى القشر على الأرض قدامي :



متكبريش الموضوع ، دي ماتأخدش منك ربع ساعة وهاتبقى فلة ، ده أنا
أنضفها في دقيقة

عنيا بقى اتملت شرار وقفلت إيدي بغضب وواضح إنى زمجرت جامد لأنى
لقيته قام بخوف وقال :

مالك ياولاء ؟

انا لقيت نفسى بأشيل طفاية سجاير من على التراييزة وبأجهز نفسى لرمى
الجلة وأخذت وضع الاستعداد وفجأة لقيته طار من قدامي وهو بيقول
برعب:

أسيبك بقى تشوفي شغلك وأدخل أنام علشان عندي شغل بدري.

وقفل على نفسه الباب والطفاية خبطت في الباب المقفول ووقعت اتكسرت
والله ما عنده إحساس ولا دم طيب يخلي عنده رحمة ويساعدني ومن غضبي
مسكت فإزة ثقيلة ودشيت بها إزاز تراييزة الانتره تفتكروا خرج من الأوضة ؟
أبدًا وحلفت ما أنا منضفاها مهما حصل وقفلت باب الشقة بالمفتاح
وخبيته وأخذت نسخته كمان وخبيتها ويوريني بقى هايخرج إزاي؟ مش
هاخليه يروح الشغل وهانضف معايا أنا هاوريك يابن ميمونة وحسيت زي
ما أكون أحمد السقا في فيلم الجزيرة من النهاردة مفيش حكومة أنا
الحكومة . حكومة إيه ؟ قصدي من النهاردة مفيش حسام جوزي وحببي
خلاص معدش أذار وهو اللي جابه لنفسه ، طبعًا هو لما صبحي ثاني يوم
وشاف الإزاز نضف معايا من غير ولا كلمة.



أنا بقى كانت فيه حاجة شاغلاني ياترى حسام كان ليه توأم خطبني وخطو

أخوه مكانه في الجوازة ؟

والله جايز أصل مش ده اللي حبيته وخطبني والله ده واحد تاني ماعرفوش

ودلوقتي بعد ٧ سنين جواز وثلاث عيال بأقول لكم من وموقعي هذا تتجوزي

جواز صالونات أو جواز عن حب كدا توريطه وكدا توريطه وكله بيبقى فخ

في الآخر.



الفخ الثاني

عاملتي فيها سي السيد

كل بنت من وهي صغيرة بتعلم بالخطوبة لما تكون في حفلة أو في مكان عام وعنمها تيجي في عينيا وتحس أنه معجب بيها أو وهي بتحضر فرح تلاقى شاب طويل عريض وسيم يلاحقها بعنيه في كل مكان ، ويسأل أصحاب الفرحة عنها ويتصلوا علشان يتقدم لها ويبجي البيت وترتفع الزغاريط طبعاً ده أول وهم ؛ لأن العرسان ساعات مابتجيش كدا ، وكمان لما بتيجي أكيد مش بالمواصفات دي .. نيجي بقى لبعد الخطوبة بتعلم أنه هايفسحها ويشترى لها هدايا قلوب ودباديب ومهيم في حياها ويقول لها كلام حب زي كمال الشناوى مابيقول لشادية في الأفلام وتلاقى نفسها مخطوبة لطوبة يعني شخص مايبعرفش يتكلم أو يجامل ولايقول كلام حلوه تاني وهم ، الوهم الثالث في اللي عايزة تخلص من تحكيمات بابا وسيطرة أخوها وفاكرة إن الخطوبة حرية وياما بنات كانت تقول :

إمتي بقى أتخطب وأتجوز وأرتاح بقى من العيشة دي ؟

هاتلاقى نفسها مخطوبة لشخص بيتحكم أكثر من بابا وماما وأخوها وعمها وعيلتها كلها يعني ديكتاتور وأي بنت فاكرة إنها لما تتجوز هاترتاح وهي متعرفش إن الراحة كلها والدلع كله كان في بيت ابوها .



نبدأ من اللبس البسي ده متلبسبش ده ماتروحيش الفرحة مع عيلتك .. ماتدخليش بيت خالتك لأن فيه شباب .. إياكي أشوفك واقفة مع ابن عمك وفيه كمان اللي بيزودها ويخلها تمسح نمر كل الذكور اللي تجاوزوا سن ثمان سنين من على الموبايل وآه لو حضرت معاه مناسبة تفضل يا عيني قاعدة جنبه زي المسكينة تخاف تحرك رأسها ليقول بتبص على حد ولو واحدة صاحبها شاورت لها تخاف ترفع إيديها ليزعق لها وحاجات كتيريبيير وده بيخلي الخطوبة الوردية تتحول إلى كابوس و خصام وزعل مستمر وكل بنت تقول لنفسها "ده بابا كان أرحم" وفيه كتير من الشباب بيلبس عروسته حجاب غصب عنها إذا لم تكن محجبة أو يخلها تلبس النقاب برضه غصب عنها حتى لو مكانش هو مواظب على الصلاة يعني التقوى عنده مش مقطعة بعضها وكل واحد منهم بيحاول يفرض سيطرته بأي شكل ..

لازم كل شاب يعرف إنه لما بيتقدم بياخد بنت مربية ليه بيتعامل معها كأنه عايز يربها من جديد شيء فعلاً مستفز ، ليه كل واحد لما بيعي يتجوز بيختار عكس اللي هو عايزه يعني بياخد واحدة مش محجبة مع أنه عايزها محجبة ويخلها بعد الجواز تتحجب ولما يبقى عايز واحدة منقبة يأخذ المحجبة ويخلها تلبس النقاب حتى لو غصب عنها ؟ وبيعلي فيها زعيم التقوى والورع وكأنه يهديها للإسلام ويمكن هو ما يكونش أصلاً بيواظب على الصلاة والله حاجة عجيبة !



ليه لما بيكون عايز واحدة مش بتشتغل بياخد موظفة ويقعدها في البيت ؟
ماتأخذ اللي مش بتشتغل وتريحنا.

ليه لما يكون مش عايز واحدة متعلمة يأخذ واحدة في الكلية ويمنعها تكمل
دراستها ؟ الحكاية دي عايزة تفسير حقيقي ما كل واحد يحدد هو عايز إيه
قبل الجواز ويختار على هذا الأساس ويوفر على نفسه وعلى بنات الناس
الهدلة والخلافات والطلاق .

عمومًا كل ده هايوضح أكثر لما تعرفوا حكايتي، أنا نورا و حاليًا مش زوجة
أنا مطلقة بس هااكي برضه جوازي الميرر أنا كنت في الكلية فلة شمعة
منورة وكنت متفوقة في دراستي وكل الأساتذة توقعو لي مستقبل مهير .

كنت محجبة والحمد لله باصلي لأن أهلي متدينين بطبعهم ولبسي كان
محتشم يعني عمري مالبست حاجة ضيقة أو قصيرة وبابا عمره ماسمح لي
أنا أو أخواتي إننا نحط مكياج ولا أي حاجة ولما اتقدم لي عبد الله أهلي
انهررو بأخلاقه وأدبه هو الصراحة كان محترم ومؤدب وقال إنه بيصلي
ومشغول منه حاجة وحشة طول فترة الخطوبة ، وطبعًا وعد شوية
الوعود اللي بيقولوها الرجالة جر رجل يعني هاسيبك تشتغلي ، هاتزوري
ماما كل يوم وتكملي ماجستير ودكتوراة وهافسحك وأوريكي الدنيا وأنا
علشان هبلة وعبيطة صدقت وماما وبابا كانوا مقتنعين بيه جدًا واتجوزت
عبد الله ، ماشي أنا اتجوزت عبد الله بعد التخرج على طول وياريتني
ماتجوزته كانت جوازة سودا مشفتش فيها يوم حلو وولاكملت ماجستير



ولاشفت الدكتوراة وبدل مايوريني الدنيا وراني الويل وحياتي اتدهورت
والحكاية بدأت إزاي ؟

بعد الجواز بشهرين بالظبط اشتغلت شوية ولسه كنت بأستعد للماجستير
لقيبته بيقول لي :

ماجستير إيه يا شيخة بلا وجع دماغ ..
انت مش وعدتني إني هاكمل دراستي يا عبد الله؟
قبل الجواز حاجة وبعد الجواز حاجة .

يعني إيه ؟

_ يعني انت عايزاني أسيبك تنزلي كل يوم وتسافري وتقابلي رجالة وتقعدي
معاهم أنا راجل دمي حامي .

_ انت سبق ووافقك وبعدين هو أنا لاسمح الله هاعمل حاجة غلط ولا
هاقابل الرجالة دول في نوادي واعمل غراميات دي دراسة يعني هاروح
الكلية وأدرس و....

وقف وقاطعني بحسم وقال :

إنسي خالص موضوع الدراسة دي الموضوع انتهى دلوقتي انتي بقيت ست
متجوزة وبكرة تكوني أم بلا تضييع وقت .

حاولت معاه وغضبت عند بابا لكنه رفض تمامًا وبابا قال لي :

اسمعي كلام جوزك يا بنتي .

وماما كمان قالت :



ولجأت تاني لبابا وماما وغضبت عندهم وكانوا قاعدين نفس القعدة
وسمعوني للأخر وتفتكروا قالوا إيه ؟ شريط وبيعيد نفسه نفس الجملتين
والله مازادوا حرف ولانقصوا حرف تقولش متفقين معاه بابا قال :
اسمعي كلام جوزك يا بنتي .

وماما كمان قالت:

إرجعي بيتك يا حبيبتي ، الست ملهاش غير بيتها و جوزها .

هم مين دول ؟ أنا عشت معاهم قبل كدا ولا دول ناس ماعرفهمش؟ أنا
جيت شقة غلط ولا حاجة ؟ هو انتوا أبويا وأمي أنا واللي أبوه وأمه ؟ أنا
اللي بننكم على فكرة ، انتو معايا ولا معاه ؟

هم صحيح بابا وماما بس بدأت اتضايق منهم ، آه والله ، كأنهم ماصدقوا
وجوزوني الراجل واتخلوا عني تمامًا وموافقينه على طول الخط ، المهم
رضيت بالأمر الواقع و رجعت لعبد الله وقعدت في البيت وبقيت شغالة بلا
أجر، قبل كدا كان بيبقى معايا فلوس أشترى بيها اللي أنا عايزاه لكن من
يوم ماقعدني من الشغل اتحوجت له طبعًا وكل مأحتاج فلوس أمد له
إيدي وكنت بأبقى مكسوفة وأنا بأطلب منه وهو كمان كان بيحسسي إنه
بيمن عليا ويسألني :

عايزاهم ليه؟ هاتجيني إيه وأطلب منه ٢٠٠ يفاصل معايا كفاية ١٠٠ آه
والله يفاصل معايا وينزل في أي مبلغ أطلبه منه بمعنى أدق كان بيذلني



أيوه انت مراتي يعني في عصمتي ولازم تمتثلي لأمرى .. الست المتجوزة لازم
تطيع جوزها

يقطع الجواز وسنين الجواز هي الست المتجوزة دي ملهاش نفس تعمل أي
حاجة خالص وبعدين تعالى هنا انت واخدني وأنا بألبس كدا وعجبتك وأنا
بالبس كدا.

دلوقتي خلاص مينفعش لأنك بقيتي

كملتها نيابة عنه واضح إن كلمة ست متجوزة دي تهمة وإلا وصمة و فيها
ممنوعات كتير ولقيته بيكمل ويقول:

انت هاتلبسي عبايات واسعة لازم تهندي .

أهندي !! استغربت الكلمة قوي ، أهندي يعني إيه ؟ هو انت واخدني من
كفار قريش ؟ أنا محافظة على الصلاة والحمد لله

جادلت واتكلم معاه على قد ماصحتي جابتنى و برضه مقدرتش عليه وأكد
رحت بيت بابا وتكرر المشهد بابا يقول لي :

اسمعي كلام جوزك يا بنتي .

وماما كمان قالت :

ارجعي بيتك يا حبيبتي ، الست ملهاش غير بيتها و جوزها .

والله أنا صعبوا عليا بيتعبوا و بيكرروها كتير وفكرت أسجلها على شريط
وكل ماتحصل حاجة بيني وبين جوزي أسمعها وخلص من غير ماروح لهم ،
طبعا لقيتني أنا بس المعترضة وإنهزمت زي كل مرة ، أمرى لله ، سمعت كلامه



بقى يشتري لي عبايات واسعة وإشارات كبيرة ، هو سكت يعني لأ عبد الله المتسلط فكر إزاي يسبيني كدا لأ لازم يعمل حاجة تانية وفعالاً حول على المرحلة الجديدة وقالى :

المفروض تلبسي النقاب .

نقاب ليه هو أنا باروح فين يا حسرة ؟

انت مش بتقفي في البلكونة وبتروحي بيت مامتك وبنروح عند أمي مينفعش تمشي بوشك مكشوف كدا لازم تلتزمي أنا راجل متدين و.....

اضطريت أقاطعه غصب عني هو بيضحك على مين ؟ ده أنا عايشة معاه وقلت بسخرية :

راجل متدين !! طيب أنا سكت قبل كدا على كلمة شيخ وفوتها لك تقوم تقول كمان متدين !! منين يعني ؟ من أي ناحية متدين ؟ حوش الإلتزام اللي بيشر منك ! قوم لم التقوى والورع اللي بيقعوا منك طول مانت ماشي ، ياراجل ده انت بتصلي فرض وتسبب فرض يعني اسم الله متدين قوي ؟

وإتكلمت لما ريقى نشف وطبعاً كانت معركة خسرتها كالعادة بمساعدة بابا وماما ونفس الجملتين بابا :

إسمعي كلام جوزك يابنتي .

وماما كمان قالت:

ارجعى بيتك يا حبيبتي ، الست ملهأش غير بيتها وجوزها .



ولبست النقاب مرغمة وسألت نفسي هو ليه الراجل من دول يختار واحدة زيي وبعدين يتحكم فيها كدا ؟ لما هو عايز منقبة ماخده منقبة من الأول ليه ؟ ليه يهدلني معاه ويخليني أعمل حاجة غصب عني ؟ كل واحد فيهم يحسسك إنه واخد واحدة كافرة علشان يهدمها ؟ وإنه هو عنوان الهداية. الأمر لله بس بابا المرة دي قال لي جملة زيادة غير اللي بيقولهم كل مرة تغيير يعني بيحاول يجدد علشان مازهقش قال بهدوؤه المعهود:
حقه يابنتي ماهو جوزك .

حقه !! يعني إيه حقه ؟ بابا وماما حسسوني فعلاً إنه كتب معاهم عقد وإشتراني أه والله ، يعني كل حاجة حقه وأنا حقي فين ؟ حد دور عليه ؟ حد سأل إذا كان عبد الله بيديني حقي ولا لأ ؟ بيعاملني حلو ولا لأ ؟ مبسوفة ولا لأ ؟ المهم جوزك وحقه وانت لاتعليق.

المهم دي كمان عدت زي ما كل حاجة تانية عدت وبعدين خلاص هو عمل كل حاجة منعني من الشغل ومن إني أكمل دراستي ولبسني النقاب غصب عني ، هو هايطلب إيه تاني ؟ هايعمل فيا إيه تاني ؟ بس الحقيقة عمل هو يعني هايسكت.

أقول لكم أنا عمل إيه ؟

أنا طول عمري محافظة على عودي الرشيق وبأعمل ريجيم دي فيها حاجة ؟ أي راجل في الدنيا بيبقى عايز مراته تبقى رشيقة إلا ده ، سبعي معجبوش فوجئت بيه في يوم بيقول لي :



أنا عايزك تتخي كدا وتربربي بدل ما انت مسلوعة كدا وكل اللي يشوفك يقول لي انت مابتأكلهاش.

دي رشاقة باعمل ريجيم علشان أحافظ على عودي .

تحافظي على عودك ليه ما انت بقيتي ست متجوزة خلاص .

هي دي الكلمة السحرية اللي بتطلع زرابيني بقيتي ست متجوزة ، يعني إيه

ست متجوزة؟ أروح أدفن نفسي يعني وإلا أعمل إيه ؟

عمومًا هو مكانش محتاج يقول لأنه جاب لي إكتئاب وبقيت بأكل من غيظي

وسألت نفسي المرة دي أنا عايشة معاه ليه؟ أنا مش مبسوفة أكمل حياتي

معاه ليه ؟

حقيقي و كنت على وشك طلب الانفصال والله بس مع الأسف حصل اللي

كنت خايفة منه حملت في أول طفل وبقى مستحيل أطلب الطلاق وخلاص

عشت بقى وأنا مخنوقة وقلت أرضى بقسمتي وبعدين دارت الأيام وهوب تاني

طفل و هوب تالت طفل وقلت لحد كدا وكفاية رفض وصمم نجيب أكثر

طبعًا و هو غرمان حاجة ما أنا اللي بأحمل فيهم و أولدهم وأرضعهم وأربهم

وأحميمهم وألبسهم وأذاكر لهم .. إلخ.

الحقيقة مرحتش لبابا وماما المرة دي ، أروح ليه علشان أسمع الجملتين

الحمضانين بتوع كل مرة ويرجعوني بيته وأنا أجر أذيال الخيبة ! لأ خلاص

حفظت السيناريو والحوار هايرجعوني بيته تاني فقلت أوفر فلوس التاكسي

رايح جاي وهدة حيلي في شيل العيال وأتنيلى على عيني وأسكت وشرف رابع



هو ده الجواز؟ محدش حذرني ليه طيب كنتوا قولوا لي عرفوني ده أنا برضه بنت ناس وزى أختكم، والله لو كنت أعرف اللي هايجرى ماكنت اتجوزت ولافكرت حتى إني أتجوز خالص ، كان زماني دلوقتي معايا ماجستير ودكتوراة وواحدة وضعي ومحافظة على جمالي ورشاقتي ، عليه العوض.

وهو بعد كل ده سابني في حالي ؟

إطلاقاً ، ده جبلة ، هو فضل ورايا كل ما وافق على حاجة يطلب حاجة جديدة، خلاني أقطع صديقاتي بحجة إيه؟ دي مش بأرتاح لها ودي محبتهاش ودي ... ودي إلخ، منعني أقابل قرايبي في البيت خصوصاً الذكور منهم ومنعني من الخروج خالص و برضه قلت مفيش مشكلة واتحملت علشان المركب تمشي ما أنا معايا ٥ عيال ، المهم مروا ٢٠ سنة مؤبد قصدي ٢٠ سنة جواز تسألوني مروا إزاي؟ أقول لكم ماعرفش، والله ماعرف هم فاتوا وخالص مايين مشاكل ومهدلة المهم راحوا ، بس النتيجة إيه بقى ؟

ضاع العمر ياولدي ، بقيت ست تخينة ومدهولة ، مقطوعة عن العالم مباخرجش خالص مباحوش تليفزيون مش باقرأ جرايد وعالمي كله بقى البيت والزوج والأولاد ولا كملت دراسات عليا ولا رجعت شغلي ولا رحى في أي مكان ولا حتى وداني راس البر ورضيت بنصبي لكن هو ماسابنيش في حالي لقبته في يوم جاي يقول لي إنه عايز يتجوز ..

عايز تتجوز عليا يا عبد الله؟ ليه ؟



الشرع مديني الحق .

الشرع مديك الحق ، جك كسر حُقْكَ يابعيد ، تتجوز عليا بعد اللي عملته
كله ؟

حافظي على كلامك يانورا.

أحافظ على كلامي !! هو أنا لسه قلت حاجة.

وجادلته كتير وقال لي ببجاجة إنه فعلاً اختار عروسة وطبعاً العروسة
رشيقة وجميلة ومحتشمة وبت بنوت زيي أنا من ٢٠ سنة وعيلة نص عمره
ماهو عايز يجدد شبابه فيها وأنا خلاص بقيت القديمة اللي مش عاجباه
وبعد ما قضى عليا بيدور على ضحية جديدة.

طبعا مقدرتش أسكت وقلت له :

بقي بعد ٢٠ سنة عايز تتجوز عيلة من دور ولادك وتمتع نفسك وترميني بعد
ما خربت حياتي؟

خربت حياتك يعني إيه ما انت عايشة واكله شاربة واللي بتعوزيه بيعي لك
وعندك عيال زي الفل روجي عيشي وربهم.

أعيش وأربهم وانت هاتعمل إيه ؟ تتجوز وتنطلق مش كدا ؟ تسيب العيال
في رقبتي وانت عايش بحرية ! مش عارفة أرد عليك أقول لك إيه ؟

وإحتديت عليه وإشتعلت الخناقاة وفي آخرها رفع إيداه وضربني بالقلم.

كدا هو جاب آخري لأن دي كانت أول مرة أي حد يمد إيداه عليا فمها وإن
شاء الله آخر مرة



وبالرغم من إني عارفة إني لو رحت بيت بابا وماما مش هاسمع غير اللي بأسمعه كل مرة بس رحت غضبانة ، مانا مش طايقة ياناس ودي حاجة مستحيل يتسكت عليها ومعنديش مكان تاني أروحه أو حد الجأ له وقلت يمكن المرة دي يجيبوا لي حقي منه وينصفوني خصوصًا بعد ما يعرفوا إنه مد إيده عليا ، بس اللي حصل هو العكس تمامًا نزلوا فيا تهزيق وزعيق وكأني بأعمل جريمة وسمعت شوية كلام مختلف عن الجمل الحمضانة بتاعة كل مرة زي :

انتي عيالك بقوا طولك طلاق إيه اللي بتقولي عليه؟.

عيب عليكى انت بقيتي ست كبيرة.

إيه ؟ ست كبيرة!!! حسسوني إني عندي ٨٠ سنة ، ده أنا عندي ٤٤ سنة.

اللي زيك تقعد في البيت تفكر في جواز ولادها .

وكلام من ده كتير و برضه حاولوا يرجعوني لبيته تاني والمرة دي وقفت لهم وصرخت فيهم:

هو إشتراكاني منكم ودفع تمنى كل ماجي لكم ترجعوني وكأني مش بنتكم وروني كدا صك الملكية اللي إشتراكاني بيه، بأقولكم ضربيني ضربيني وعاييز يتجوز عليا .

قالت لي ماما:

يابنتي ده جوزك .



والله مانت فاتح بقك وقايلها خلاص شبعنت منها بقى الجملة البايخة بتاعة كل مرة.

وظلعت مني نورا القديمة ، نورا الجريئة القوية اللي متمحش لحد إنه يهينها ويذلها وقلت له:

إستني إركن انت على جنب بقى يا حاج ، خلاص انت مش المتحدث الرسمى بتاعي ، إقعد بقى إرتاح وكفاية عليك لحد كدا .
ولسه ماما هاتتكلم فقل لها :

ميلي شوية يا حاجة انت كمان وأقعدى وإستوريحى وسيبه لي أنا .
طبعا بابا بصلي بذهول وعبد الله نفسه إتفاجئ مش دي الزوجة الخنوعة اللي بتنفذ كلامه . مش دي اللي كل مايقول لها على حاجة تقول له أمين ، لأ بقى ده عايز وقفة وسألته وأنا واقفة إيدي في وسطي وعقلى بتدور فيه جريمة ممكن تنفذ في أي لحظة .

شوف بقى يا عبد الله فيه كدا شوية حاجات لازم تسمعهم مني أولهم تعرف
أني مهمينش إنك تروح تتجوز ، روح بألف سلامة وإبقى قابلي لو
إستحملتك زي ماستحملتك أنا واللي خدته القرعة تأخده أم الشعور .

ثانيا : إذا كنت فاكر إني غيرانة عليك بعد الشر يعني تبقي غلطان
متفتكرش نفسك أملة يعني وأنا مقطعة نفسي عليك ، انت راجل مفكش
حاجة واحدة تتحب ولا تتغير الإعجاب ، من الآخر مايتبكيش عليك يا أبو
العيال ، أنا اللي كان مصبرنى على العيشة معاك عيالي وبس يعني لابأحبك



مين اللي قفل عليا ومنعني أكمل دراساتي علشان مابقاش أحسن منه مش
انت؟

مين اللي منع عني التليفزيون والجرايد والمجلات وأبطل أتابع الحياة لما بقيت
جاهلة مش انت؟

مين اللي دفني بالحياة وحولني من أنثى جميلة وست مثقفة إلى مرمطونة
وشغالة ودادة ومربية مش انت ؟

ما ترد عليا ؟ طبعًا مش قادر تقول كلمة ، جاي دلوقتي بعد مادمرت حياتي
تقول كدا ، وبعدين تعالي لي هنا مستواك الفكري ده اللي هو إيه؟ إلا عمري
ماشفتك بتقرأ كتاب ولا مجلة وآخرك تقرأ الجرنال وكل وقتك على القهوة
تلعب طاولة وتشرب شيشة.

وقف ببرود وقال:

أنا مش ممكن أقعد وأستحمل طريقة كلامك دي .

لأ معلش تعالي على نفسك بقى و.....

قاطعني وقال بسماجة:

انتي عرفتي الميعاد هاتي العيال وتعالي احضري الفرحة ولو مجيتيش مش
هازل .

أنا قلت من ساعتها إنه بيلعب في عداد عمره ، الجريمة اللي كانت بتختمر في
مخي اكنتمت ومن غير ما أحس لقيت رقبتة في إيدي والله ما أعرف إزاي ؟



حاولوا يخلصوه من أيدي ووشه إزرق وإفتحت فيه مانا خلاص كان لازم
أنفجروقلت له:

لما انت عايز واحدة مش دارسة ومنقبة ومبتشغلش إتجوزتني أنا ليه ؟
ماكان قدامك اللي مش متعلمة واللي مش يتشغل واللي لابسة النقاب زي
مانت عايز ، كنت إتجوز أي واحدة ملهاش شخصية وتوافق إنك تتجوز
عليها مرة وإثنين وتلاتة وإلا انت يعني لازم تجيب بنات الناس وتحطم
أحلامهم وتضيعهم وتقضي عليهم ، بقى أنا اللي مستحملك ومستحمله
قرفك ورزالتك وتحكماتك مش عاجباك دلوقتي ، عايز تتجوز ياناقص يا
.....يا.....يا.....

وكملت ضرب النار المستمر بلا توقف وكأني في حرب وطلعت الكبت ، أنا
نفسي ماعرفش جبت الكلام اللي قلته له منين ، ماهو أنا لازم آخذ حقي منه
وطلعت كل الكلام اللي إتحبس جوايا ٢٠ سنة والله ماسبت حاجة إلا وقلتها
ووشه تحول للبنفسجي وأخيراً خلصوه من أيدي وإستنيت يرد بس الحقيقة
هو وقع على الأرض ومحطش منطق ، متخافوش ماماتش هو أنا معقول
أقتل أبو عيالي صحيح هو يستحق القتل، بس خسارة أضيع باقي عمري في
السجن علشانه وكفاية اللي ضاع هو كان فاقد الوعي بس ولما فاق بصلي
بخوف وقال:

سامحيني يا حبيبتي نرجع بيتنا بقى.

أنا ضحكت بصوت عالي وأنا بأسمعه بيقول كدا وقلت له بثقة:



ياحبيبي بيتنا ده كان زمان، لما كنت هبله ومستسلمة لكلامك لكن دلوقت
لا ، أنا هاستعيد حياتي ، انت دلوقتي تطلقني وتغور من هنا ونفقتي ونفقة
ولادي توصلني بالمليم والولاد هايعيشوا بيبي وبينك مفهوم.

وتدخلت ماما طبعًا هي وبابا بالكلام المعهود:

تطلقني في العمر ده ؟

انت عايزة تفضحيننا؟

وولادك ؟ ده انت بناتك على وش جواز.

الناس تقول إيه ؟

أيوه هاتطلق في العمر ده، إيه هو الطلاق جريمة أمال ربنا محلله ليه؟ وإلا

عايزني أفضل كدا الباقي من عمري وأندفن بالحياة مع راجل زي ده ؟

وأيوه هارجع شغلي وهاعيش حياتي اللي حرمي منها ، هأكمل دراستي تاني

وألبس اللي أنا عايزاه وإذا كنتم بتقولوا على ده فضيحة خلاص إعتبروها

فضيحة و وولادي وبناتي كلهم هايروحووا يعيشوا حياتهم ويبقى كويس لو

إفتكروا يكلموني كل أسبوع مرة يعني محدش فيهم هاينفعني وأنا عايشة

لوحدي مهملة باتحسر على شبابي وأحلامي اللي راحوا وأتقهر على اللي راح

مني وحياتي اللي ضاعت بسبب كلام الناس اللي انتوا خايفين منه، وبعدين

ناس مين ؟ الناس دي هاتنفعني بإيه وأنا وحيدة ومكسورة ومستنية جوزي

يحن عليا بفلوس وأمد أيدي وكأني بأشحت منه؟ واقضي الباقي من عمري

وحيدة .



الناس دي هاتعمل لي إيه لما جوزي يروح يتجوز ويعيش حياته وراميني للوحدة والقهر؟ الناس دي متهمنيش ولاتلزميني ولاحد فيهم هايقف جنبي سيبوهم يفكروا زي ما هم عايزين أنا لاهاعمل حاجة عيب ولاحرام ، و من النهاردة مع إحترامي ليكم ، قراراتي أنا اللي هاأخذها ومسؤولة عنها ومحدث يتدخل في حياتي تاني وكفاية قوي لحد كدا كتر خيركم أنا هاحاول بقى ألم الباقي من عمري وأعيشه صح.

بعد كلامي ده كلهم نزل عليهم سهم الله ومحدث نطق بكلمة أنا كنت واضحة في كل اللي قلته وأقسمت إنه مهما كانت الضغوط مش هاتنازل عن قراراتي أبداً وبالفعل محدش قدر عليا وبصيت لعبد الله شزراً وقلت بصوت قوي :

- طلقني حالا.

رجع خطوة للخلف من الخوف ورمى اليمين :

- انتي طالق.

يااااااه أخيرا إتعتقت.

يمكن تكون كلمة صعبة على ستات كتير ووقعها مؤلم لكن بالنسبة لي كانت أحلى عندي من أي كلمة سمعتها في حياتي ، نغمة ريحت وداني وإدتي إحساس بالحرية وحسيت بأن جبل إنزاح من على قلبي وإتنفست ، أخيراً استرديت حياتي ، متأخر شوية صحيح بس كل شيء ممكن يرجع لأصله وبالرغم من محاولات بابا وماما وهو شخصياً إني أرجع ، فضلت على رأيي



ورفضت وقسيمة طلاقي بقت أغلي ورقة في حياتي وبروزتها والله العظيم بروزتها وعلقتها في مكان واضح وبارز في الصالة وقفلت الصفحة دي من حياتي تمامًا وكأنها لم تكن بالرغم من إنها سرقت من عمري كثير لكن ماقدرش أنكر نعمة ربنا على وهي ولادي ،صحيح هم زعلوا من الطلاق لكن تفهموا لأنهم كانوا شايفين بعينهم كل اللي كان بيجرى لي منه وغضبوا منه لما قرر يتجوز عليا .

رتبت أولوياتي وبدأت في التنفيذ ورجعت تاني للجيم وبقيت سمباتيك قطعت أجازتي ونزلت شغلي تاني وبقيت مش مضطرة أمد إيدي أخذ فلوس من أي حد ، بقت مستقلة بحياتي ورجعت نورا القديمة بتاعة زمان وبأكمل دراستي حاليًا بتسألوني عليه طبعًا ..

هو إتجوز وطلق ٣ مرات ماهو مفيش واحدة تستعمله والعيال بقم بيبي وبينه وأجرت شقة لوحدي علشان أخلص من تحكيمات بابا وماما وكلامهم المحبط وولادي بقوا بيبي وبينه وأنا بقت دكتورة في الجامعة وولادي بيفتخروا بيا وهو أعلن ندمه أكثر من مرة لكن أنا رفضت أرجع له أنا كدا غلطانة ؟



على أنها دخيلة وليست فرد من العائلة وتزعج إذا عاملها بطريقة جيدة وتعتقد أن هذا ضعف منه وتخاذل ودائماً ماتقول للإبن (ماتبقاش ضعيف قدامها يابني لتركبك) أنا بقى عشت مع حماتي في نفس البيت اللي هو بيت العيلة ولكم أن تتخيلوا اللي جرى لي منها ومنهم .

نتعرف الأول سماح سني ٣٠ سنة إتجوزت أحمد من ١٠ سنين ومعايا بنت وولدين وجوزي كان عنده شقة في بيت والده وأخوه ساكن فوقينا وحماتي في الدور الأرضي يعني عايشة في بيت عيلة والحقيقة دي كانت أول حاجة قلقتني إني أعيش في بيت عيلة وكمان مع حماتي في نفس البيت ودايمًا كنت بأسمع عن المشاكل اللي بتحصل بسبب وجود العيلة كلها في بيت واحد وكنت على وشك إني أرفض أحمد بس الكل أقنعني إن ده مش سبب يخليني أرفض إنسان كويس زيه ، كنتي فين يا لأ لما قلت أنا أه .. بعد مناقشة مع أهلي اقتنعت وأحمد لما جه يتفق مع بابا قال له بالحرف :

متقلقش يا عمي واتظمن .. صحيح أنا عايش في بيت والدي لكن إحنا هانبقى في شقتنا بحياة مستقلة ، محدش هيتدخل في حياتنا أبدًا.

وإحنا صدقنا ، ناس نيتهما سليمة وبرينة وصدقنا إني هابقى في شقتي بعيشة مستقلة، طيب تسألوني ده حصل ؟ وربنا ما حصل أبدًا ووقعت في الفخ وكل الكلام اللي قاله أحمد محصلش منه أي حاجة وشفتم المر في عيشتي معاه في بيت العيلة ومن أول يوم عرفت واكتشفت حجم المأساة اللي هاعيش فيها ، أنا إتجوزت العيلة كلها مش أحمد بس.



لما استقرينا في شقتنا كان يبيجي ناس من معارفهم ومن العيلة يباركوا والحقيقة شقتي تحولت لمزار سياحي .. آه والله مزار سياحي .. أي ضيف يبيجي في أي وقت من اليوم بقى صبح ظهر عصر ليل مش مشكلة زي مانكون قاعدين مربوطين له ولازم باب الشقة يفضل مفتوح من ساعة مانقوم من النوم لحد ماننام ولما قلت لحماتي :

المفروض الناس تتصل قبل ماتيجي .

شهقت حماتي وخبطت ايدها على صدرها زي ماري منيب وقالت :

يادي الفضيحة تتصل .. هم الي ببيجوا هنا غرب دول كلهم حبايبنا .. لأ لأ مالكيش حق تقولى كذا أبداً.

وندهت لأحمد وكبرت الموضوع وده كان أول خلاف بيني وبين حماتي ، وكانت هاتبقى زعلة لولا إني قلت لها يشرفونا في أي وقت ، واعتذرت لها كتير لحد مارضيت ، المشكلة مكانتش بس في مواعيد الزيارة الغير مناسبة وبيجوا بأعداد كبيرة ومعاهم عيال صغيرة يتنططوا ويقلبوا الشقة لأ، المشكلة الحقيقية إن كل الضيوف بقى كبير صغير، ست ولا راجل يأخدوه يفرجوه على الشقة ويفتحوا كل الأدراج وكل الضلف ويفرجوه على كل حاجة حتى أوضة النوم الي هي حاجة خاصة ومش أي حد يدخلها ماسلمتش منهم وحماتي العزيزة الله يبارك لها فرجت السيدات الي شرفونا بالزيارة على هدومي وحاجتي قطعة قطعة.



طبعًا ده شىء غريب عليا وماتعودتش إن حد يشوف حاجتي بالطريقة دي
ولما سألت أحمد رد وقال لي :

دي عوايدنا لازم الناس تتفرج على شقة العرسان وحاجتهم .

ليه يا أحمد ؟ يتفرجوا ليه ؟ هو معرض ! دي شقة وحاجات خاصة.

يعني مش عايزة الناس تيجي تزورك وتبارك ؟

تيجي يا حبيبي وتزور وتبارك بس يقعدوا في الصالون مش يلفوا الشقة
ويعملوا تفتيش ويشوفوا كل حاجة.

المهم محدش سأل فيا طبعًا وتدفقت الأفواج إلى الشقة لمدة أسبوع تقريبًا
وأخيرًا خلصت الزيارات والحمد لله وأخيرًا حسيت بالهدوء والخصوصية
تصوروا الكلمة وأنا بأقولها دلوقتي غريبة قوي في ودني لأنني مشفتهاش
ولاحسيتها تاني أبدًا ، قال خصوصية قال !!! والله ماشفتها خالص ، أحكي
لكم على الخصوصية الي عشت فيها مع أحمد .

وعد أحمد ليا باني هاعيش عيشة مستقلة والكلام ده طبعًا فاكرينه هل
حصل على أرض الواقع ؟

طبعًا لأ وأنا عرفت وتصوروا عرفت إزاي ؟ بالصدفة وحاجة عمر ما حد
فيكم يتخيلها لأن أحمد ماقاليش حاجة هو سابني لحد ما عرفت لوحدي
وعرفت كالآتي :

هم أهله الصراحة سابونا تقريبًا إسبوع بعد الجواز نأخذ راحتنا وبقيت
مرتاحة على الآخر لأن وعد أحمد إتحقق وشقتنا بتاعتنا بناكل فيها الأكل



عارفة فيه إيه ؟ لقيت كل الناس بتبص لي باستنكار وعنيهم بتطق شرار وحماتي وقفت شاركت في الزعيق وأنا زي الهبلة مش فاهمة حاجة أنا من صدمتي مفهمتش بيقول إيه وبعدين هدبت وبدأت أميز الكلام اللي بيقلوه ولما فهمت ياريتني مافهمت، اكتشفت إن الراجل اللي ضربته مطلعش حرامي . عارفين طلع مين؟

شفته بقى وهم شايينه ومطلعينه من المطبخ سايج في دمه ، ده كان حمايا ودخل المطبخ بيدور على الشاكوش وطبعًا كان ضحية الطاسة والضربة القاتلة اللي ضربتها له.

واستغربت دخل إزاي ؟ بعدين بقى عرفت الحقيقة !! مفتاح شقتي معاهم كلهم يعني مع حماتي وسلفتي وأخت جوزي وحمايا والست اللي بتيجي تساعدهم في الخبيز والمجتمع والناس ، مش بأهزر والله كل الناس اللي في البيت معاها نسخة ، كل ده عرفته بعد مارجعنا من المستشفى ، مش أنا اللي رحت المستشفى لأ ده حمايا طبعًا الخبطة كانت جامدة عليه ماهو راجل كبير بس الحمد لله هو إتخيظ ١٢ غرزة بس ولسانه بقى تقيل شوية وإيده بقى فيها رعشة بس الحمد لله كويس وسليم الصراحة هو يستاهل ، مين قال له يدخل الشقة من غير مايخبط أمال هو مركب جرس على الباب ليه ؟ كان خبط وأنا كنت فتحت له بمنتهى البساطة وإديت له الشاكوش لكن هو دخل خلصة وكان هايروح فيها وأنا كنت هاتحول لعروس قاتلة في شهر العسل، المهم عدت المرة دي على خير.



فضلوا بقى شوية كدا كل مايشوفوني يبصوا لي بغضب وحماتي قطمتي
كثير وأنا مقدرتش أرد عليها، هو صحيح الغلط منه هو بس الراجل كان
هايروح فيها، الست معاها حق ، كانت هاتبقى أرملة بسببي .

المهم بدأت حماتي بقى تمارس سحرها اللي كنت بأشوفه في الأفلام وبس
يعني كل شوية تطلع وتبص علينا وتقعدها معنا وآه لو أحمد قال لي ميرسي
ياحبيبتي تبص له حته بصة فظيعة وكأني ضربتها واكتشفت إنها بتغير من
حبه ليا مع إنه مش إنها الوحيد و كانت تقعد معنا ساعات تتفرج على
التلفزيون ولو حط إيده عليا لازم تطلب مني حاجة تخليني أقوم من جنبه
ولما نكون في شقتها تحت تطلب منه يقعد جنبها وتمسك إيده تمنعه يقوم
من جنبها لو حب يساعدني في الأكل ولا حاجة ، وبتهيألي والله أعلم إنها
ممكن تطلب تنام معنا فوق بس من باب الغيرة ، طيب ليه تغيري يا حجة ده
ابنك عاش معاكي عمري يعني سيبيه لي شوية وانت كفاية عليكي كدا.

لما كان أحمد يشتري لي هدية تعيط وتقوله :

انت خلاص نسيت أمك من يوم ما اتجوزت مبقاش عندك أهم من مراتك.
إيه يا حجة؟ انت بتقارني بيبي وبينك ليه؟ انت أمه وأنا مراته كل واحدة
فيها غير الثانية خالص وبعدين بيحبيب لي هدية في عيد ميلادي يجيب لك
انت ليه؟ ماهو بيحبيب لك في عيد الأم مثلاً أطلب أنا كمان هدية يعني ولا
إيه ؟



أحمد بقى ياعيني يجيب لي أي حاجة في الخبائة ويديها لي وإحنا عند ماما مثلاً علشان هي ماتعرفش أو يطلبني على الموبايل وأنزل له السبت يحط الحاجات فيه بقينا بنعمل زي الحرامية وكانت على طول سايبة باب شقتها مفتوح علشان تشوف اللي طالع واللي نازل وتراقب وأي حد ييزورني طبعاً لازم تشوف مين وتفحصه وبعد مايمشوا تطلع جري تشوف اللي جه جاب لي إيه ؟ وآه إذا مفرجتهاش على كل حاجة جابوها لي تعملها قضية وحكاية ، وحاجات تانية كتير من دي واستحملتها والله.

نسيب موضوع حماتي على جنب شوية ونرجع للشقة و قررت أكرم أحمد موضوع الشقة ونسخ المفاتيح :

يعني إيه مفتاح شقتنا يبقى مع والدك ؟

لازم يكون معاهم نسخة إ فرضي حصل حاجة وإحتاجوا يفتحوها وإحنا مش موجودين.

شفت بتقول إيه وإحنا مش موجودين يعني لازم يخطبوا وإحنا في البيت ولا إيه ؟ إبقى قول لهم بقى طول ما إحنا في البيت لازم على الأقل يرنوا الجرس.

أنا ماقدرش أقول لبابا كدا ده بيته ياسماح.

بيته آه بس شقتي ومن حقي إني أرتاح في شقتي و.....

فجأة اتفتح باب الشقة من بره ودخلت مرات أخوه وقالت :

سلامو عليكم . معلش حماتي عايزة قروانة كبيرة من عندك ؟



أنا نزل عليا سهم الله وفقدت النطق وتابعتها بعيني وهي رائحة المطبخ
ورجعت بالقروانة وضحكت وهي بتقول :

والله ما انت قايمة خليكي مرتاحة.

التفتت لأحمد بغضب وسألت :

إيه ده يا أحمد؟

مرات أخويا كمان معاها نسخة .

نعم !! يعني إيه؟ انت مديهم كلهم نسخة من المفتاح ويدخلوا كدا عادي
، إسمع انت لازم تمنعهم يدخلوا الشقة كدا من غير إحم ولادستور مينفعش

ده بيت بابا وما أقدرش أقول له كدا .

لازم تأخذ كل النسخ اللي معاهم.

طبعا كلامي كله في الفاضي لأن أحمد مكانش عنده الجرأة إنه يقول لهم
كدا ، اللي جنني بقى في ليلة كنا نايمين وصحيت على صوت تليفزيون عالي
قلت يمكن من شقة حماتي ولا شقة سلفتي بس كان عالي قوي قمت من
السرير وخرجت بهدوء واتجهت للصالة لقيت حماتي وسلفتي وجوزها وأخت
جوزي اللي لسه ماتجوزتش قاعدين في الصالة بيتفرجوا على التليفزيون
بتاعي ووقفت أبص لهم بدهشة ولمحتني أسماء أخت جوزي فقالت:

الله انت إيه اللي صحاكي؟



هي البت دي عبيطة ولا إيه ؟ يعني إيه اللي صحاني ؟ ده التلفزيون مسمع
لآخر البلد.

رديت وأنا بأكتم غضبي جوايا وسألت :

انتو بتعملوا إيه هنا ؟

بنتفرج على الفيلم أصل التلفزيون بتاعنا صوته باظ.

والله !!!

وإلتفتت لي حماتي وهي ماسكة كوباية عصير في إيديها طبعًا من اللي أنا
عاملاه وسايباه في الثلجة وقالت :

العصير ده حلوقوي ماتيجي تعملي لنا تاني أصل دي آخر كوباية.

شربتوا كل العصير وماسبتوش أي حاجة ليا أشربها بالسم الهاري الحقيقة
مسكت نفسي بالعافية وقلت :

بالهنا والشفاء ياحماتي بس مش هاينفع أعمل لكم دلوقتي علشان المانجة
اللي عندي خلصت.

ودخلت الأوضة وأنا بأرتجف من الغضب وبصيت على أحمد اللي نايم ولا
على باله ومسكت مخدة وحدفته بيها بقوة وقام مخضوض:

إيه فيه إيه ؟

قوم يا حبيبي شوف مين عندنا؟

مين؟

العيلة كلها طلعت تتفرج على التلفزيون وإحنا نايمين.



ياشيخة وفيها إيه نامي نامي .
أما انت بارد ومعندكش إحساس بقولك كلهم بره.
وأنا أعمل لك إيه يعني؟التليفزيون باظ وماما قالت لي فقلت لها إتفضلوا
في أي وقت
إتفضلوا في أي وقت وهم يعني مستنيين عزومة دول باردين ومعندهممش
أي إحساس.
اسكتي لأحسن يسمعي .
مايسمعوني ، هم يعني هايجسوا دول جيلات.
قام بسرعة يحط إيده على بقي وقال بخوف:
ابوس إيدك وطى صوتك مش عايزين مشاكل مع ماما.
خلي عندك إحساس ، أفرض إني خرجت من الأوضة بقميص النوم وجوز
أختك قاعد بره يبقى إيه المنظر؟
إبقى ألبسى الروب وانت خارجة من الأوضة.
ونام وسابني أكلم نفسي لكن الصبح كلمته تاني ورفض أحمد أو خاف أصلاً
يطلب منهم كدا وسكت ، واللي حرق دمي بقى إن مش بس حمايا وحماتي
بس اللي ممكن يدخلوا الشقة لأ ده كل اللي في البيت صغار وكبار معاهم
تصريح مفتوح بدخول الشقة في أي وقت وممنوع منعاً باتاً حتى إني اقلها
بالترياس يمكن يحتاجوا حاجة منها وعرفت كمان إن من حقهم مش



أنا قلت خير هاتعمل إيه دي شكلها ميظمنش ، بقيت بأصعب عرق وركبي
تخبط في بعضها وجه في بالي بقى الأغنية ياختي عليها ياختي عليها ، والدور
الدور موعودة يالي عليكي الدور والدنيا درات بيا وقلت بس دلوقتي تنادي
كمان على عبد العال وحسب الله ويخنفوني وبدأت أتشاهد على روجي وجت
أسماء وقفت حماتي أنا قلت دي هاتطلب منها السكينة ولا حاجة وتعمل
زي مسرور في ألف ليلة وليلة ونفخت صدرها قوي وقالت بصوت تخين:

تعالى إسمي مرات أخوكي بتقول إيه؟

أنا تنفست براحة ومسحت عرقى وإتظمنت على نفسي والحمد لله مش
هاتقتلي وسألت أسماء:

قالت إيه ياما ما ؟

وحماتي قالت لها والتعبير اللي ظهر على وش أسماء لم يختلف كثيرًا عن
تعبير حماتي وبعدين إلتفتت لي أسماء وقالت لي من المنقي خيار ، وكلام أول
مرة أسمعها في حياتي كلها بس اللي متذكراه آخر جملة لأن حماتي شبكت
فيها على طول لما أسماء ردحت وقالت لي :

شقة إيه يا أم شقة هو انتي ليكي حاجة هنا؟

وكملت حماتي :

دي شقة ابني ، والبيت ده ملكنا انت هاتمنعينا ندخل ملكنا.

وهنا توقفت ذاكرتي وباقي الحوار بقى فاكراه طشاش لأنه الحقيقة كان
سريع ومتبادل بين حماتي وبناتها وعالي لدرجة إن وداني فضلت ترن حوالى



إسبوع بعد الحوار ده وبقت هي بكلمة وأسماء بكلمة وألاقي دي بتصقف ودي بتصقف.

وأنا واقفة كأني في وسط العاصفة ولقيتيني بعد كدا في شقتي أنا مش فاكرة بقى أنا وصلت لها إزاي هل خرجت من عند حماتي لوحدي ولا هم اللي رموني بره مش مهم قوي التفصييلة دي ، المهم إني رجعت شقتي قطعة واحدة وسليمة والحمد لله.

اللي حصل بعدها إن كلهم عملوا إجتماع عائلي علشان يحققوا في الإهانة اللي أنا قولتها والجريمة اللي عملتها وكانوا عايزين أحمد يطلقني لولا إني كنت حامل، قاطعوني فترة كدا لكن بعد الولادة يعني رجعت المياه لمجاريها شوية خصوصاً لأنني جبت لهم الولد أول حفيد عندهم لأن ابنتهم التاني خلفته كلها بنات وده شيء خلاهم يقدروني شوية وكمان أنا ربحتهم على الآخر وسبتهم يعملوا اللي هم عايزينه، إيه يعني لما أي حد يدخل فجأة في الشقة وأنا قاعدة ؟ إيه يعني لما أقوم أروح الحمام بالليل ألاقي حد بيتفرج على التلفزيون أو حد في مطبخي ؟ إيه المشكلة لما يأخدوا حاجة ؟ مش هم بيرجعوها ، مكسورة بقى مصدية بس بترجع وكنت بأتضايق بس تفتكروا أنا فتحت الموضوع تاني ؟

إطلاقاً ولا اتكلمت فيه تاني وبقت شقتي عاملة زي محطة القطار وكل شوية حد يدخل وأنا قاعدة ولا بقيت بأخذ بالي أصلاً ، تأقلمت مع الوضع .



وفي مرة كنت بأفتح باب الشقة لقيت حماتي موطية قدامه وبترش حاجة
ولما شافتي إتلبخت شوية وبعدين ضحكت وسألتها :

بتعملي إيه يا طنط؟

وقفت مرتبكة ومعرفتش تجاوب وبعدين قالت :

النمل كنت بأرش النمل قدام الباب.

نمل إيه أنا معنديش ولانملة ولسه هاتكلم راحت مزعقة لي وقالت :

ماهو انتي لو بتنضفي مكانش بقى فيه نمل.

وسابتي ونزلت وبصيت على الأرض وبحلقت ملقتش أي نمل وشكيت إن

الست دي بترش لي عمل وقلت لأحمد :

أمك بترش لي حاجات قدام الباب يا أحمد.

يعني إيه؟

يعني بتعمل لي عمل.

ياشيخة بلاش إفتراء ماما دي ماما ملاك.

هي مين اللي ملاك؟ أمك!!

إسمعي ماحبكيش تتكلمي عن ماما بالأسلوب ده هي عملت لك إيه؟

أبدًا ولا حاجة دي متحكمة فيا وكأني عبدة عندها رايحة فين وجاية منين ؟

بتعملي إيه ؟ البسي ده ومتلبسيش ده ؟ مين اللي زارك وجه ليه ؟ ده غير باقي

تصرفاتها. دي أمك مورياتي الويل وقرفاني في عيشتي وتقولي ملاك لما هي

ملاك أمال مين الشيطان.



وطبعًا قلبت بخناقة ونمنا متخاصمين ليلتها وإتأكدت إنها عملت لي عمل
وربنا يستر .

ذات إحدي صديقاتي جت تزورني وقعدت معايا في شقتي وطبعًا كنت
أخذت إذن من حماتي قبلها وقاعدين أنا وهي في الصالة وكالعادة إتفتح باب
الشقة ودخلت بنت سلفتي الصغيرة وتوجهت للمطبخ من غير أي سؤال
ودخلت جابت حاجة مدققتش تأخذ اللي تأخده وسبتها وسالتي صديقتي :
مين دي ياسماح؟

دي بنت أخو جوزي .

انتي سايبة بابا شقتك مفتوح .

ضحكت طبعًا على الكلمة شقتي !! هي دي شقتي !!

وقلت لها :

ياأأأأأأه انتي عارفة آخر مرة قلت الكلمة دي جري ليا إيه؟ إتمسح بيا البلاط
وكنت هاتطلق فيها ، يا حبيبتي دي مش شقتي ، دي شقتنا كلنا .

يعني إيه شقتنا كلنا ؟ مش فاهمة .

معلش لسه ماتجوزتتش يا بختها وعلى نياتها انا هافهمها بدل ماتقع في المطب
اللي وقعت فيه وتشرب المقلب وقبل ما أبدًا في الشرح لقت واحد خارج من
الحمام ومغطي وشه بفوطة وبينشف وطبعًا عدلت نفسها بسرعة وقالت :

هو جوزك هنا مش تقولي ؟

لأ ده مش جوزي ، ده حمايا بيأخذ دش ، نعيمًا ياعمي .



رد عليا طبعًا :

الله ينعم عليكي يا بنتي .

وقبل مايسألني قلت له:

المشط عندك على التسريحة ولو عايز زيت شعرهاتلاقيه جنبه على طول
والبارفان بتاع أحمد في الدرج اليمين .

ودخل أوضة النوم وسألتي صديقتي :

هو حماكي عايش معاكي ؟

لأ هو له شقة تحت وعلشان أنا عندي سخان طلع يأخذ دش وبعدين
تقدري تقولي إنه عايش هنا تقريبًا لأنني بعد الجواز اكتشفت إن شقتي بقت
سبيل لكل من هب ودب في العيلة.

ومرت السنين وعشت حياتي معاهم وبقي معايا كمان ولد وبنت و بقيت
طول اليوم تحت في شقة حماتي أول ما أقوم من النوم لازم أنزل أنا وسلفتي
ننضف شقة حماتي مفيش مانع أبدًا إني أساعد في تنضيف الشقة لكن
الشيء المزعج حقيقي إني من يوم ما اتجوزت مطبختس طبخة في شقتي
والله ماقلت حتى بيضة : لأن الأكل كله تحت فطار غداء عشاء وحماتي
خلتني أنزل بوتجازي تحت علشان يساعد لما يكون فيه عزومة ولا حاجة
يعني حتى لو نفسي في كوباية شاي أشربها لازم أنزل تحت وحمدت ربنا إنهم
سابولي التلاجة عموما أنا جبت بويلر وبأعمل شاي برضه في شقتي اللي هي
مش شقتي واوعي تقولي أكل في شقتي قصدي فوق ممنوع.



طول اليوم متذنبه تحت ولابسة الزي الرسمي كله حتى في عز الحر العباية والطرحه لأن متوقع إن أي حد يبجي وطبعًا حماتي زوارها كثير لأنها كبيرة العيلة وأنا أفضل أخدم على ضيوفها ، مر عليها أوقات كثيرة حسيت إنني عايشة في فندق بس ولا فتحت بقي ولو حصل وأحمد حب يجيب فاكهة ولا حاجة حماتي تفتشه تفتيش ذاتي وتخلي الفاكهة عندها واللي عايز ينزل ياخذ من تحت.

نيجي بقى لتربية العيال هم ولادي أه لكن ماليش دعوة بهم عارفين ليه؟

وانتي في بيت العيلة يا حبيبي هاتعرفي يعني إيه ..

يعني بتحسي إنك مش انت اللي بتربي عيالك ، لأ يا حبيبي دي العيلة كلها بتربي عيالك مش معاكى لأ بدالك، بيبقوا عاملين جمعية مشتركة لتربية ولادك ، كلهم بيتدخلوا في كل حاجة يعني متعرفيش تمشي كلمة على عيالك لأن حماتك بتتدخل وانتي تقولى يمين حماتك على طول هاتقول شمال وممكن عمهم يمد إيداه عليهم ويضربهم وانت متقدريش تفتحي بقك ، عمهم وبيربهم وإذا إعترضتي تبقي انتي اللي وحشة قراراتك كلها بتنزل الأرض لأنهم لازم يمشوا كلامهم والكل بيعتهم مشاوير ويكلفهم بحاجات وإوعى تفكري تعترضى ومن ده كثير .. إلخ .

أكثر حاجة ضايقتني لما نروح نصيف المفروض إنني أروح أنا وجوزي وعيالي لأ يا حبايبي انتوا تبقوا بتعلموا لو فكرتم إنني كنت بأصيف مع جوزي وأولادي بس !!



مفيش الكلام ده المصيف ده مش بتاعك المصيف ده بتاعنا كلنا ، يعني حماتي بتيجي معانا هي وحمايا لازم يصيفوا وبعد مانروح بيومين أخت جوزي أسماء وجوزها وعيالها يحصلونا هي ملهش نفس تصيف يعني وبعدهم على طول أخو جوزي بعيله ومراته وأخدمى يا جارية كل دول ولما قلت لأحمد قال لي :

المصيف بيحب اللمة .

ماشي المصيف بيحب اللمة بس أنا مبعهاش يا أحمد ، وبعدين لو بيحبوا اللمة يأجروا شقة جنبنا مش يقعدوا على قلبنا يا حبيبي ، وبعدين دول مش واحد ولا أتنين دول عيلة كاملة ، نفسي أحس بأني ست متجوزة وعندي عيال وبأصيف زي باقي البشر مش كل مانروح أجزر ورايا العيلة وعيلة العيلة وألاقي نفسي في شقة زي البانسيون محشورة ناس وزحمة عايزة أهد راحتى شوية أشم نفسي ياناس هاطق ، أهزر مع ولادي أتدلع على جوزي شوية ، يعني مش كفاية بأستحمل أمك وأبوك لأ كمان أختك وجوزها اللي قاعد لي بالشورت طول اليوم في البيت ، ده أنا لما بأدخل الحمام بأخلي عيالي يقفوا يحرسوا الباب لأحسن حد يدخل عليا والله هو ده اللي بيحصل وبالليل لما بأقوم أدخل الحمام بالبس هدومي كلها حتى الطرحة وبأتسحب للحمام ولازم أصحي حد يقف لي على الباب يعني بيبقى مصيف عذاب ، المصيف بالنسبة لي بقى أشغال شاقة مؤبدة لأنى بأطبخ طول اليوم للجرمأ اللي معانا ومبعرفش أهد راحتى أبداً وأحمد يقول لي :



دول ضيوفنا ولازم نكرمهم.

ضيوف إيه ؟ دول أصحاب بيت بقوا جزء لايتجزأ من حياتنا بقيت أفضل
مخنوقة طول اليوم ولابسة الإسدال ومش عارفة آخد راحتي إطلاقاً
وماقدرش أفتح بقي بكلمة واحدة لأنني بأطلع وحشة في الآخر وأحمد بقول
لي :

انت بتكرهي عيلتي ومش طايقاهم ..الخ

ولذلك بقيت بأرفض أروح أصيف ولما أهلي بيروحوا المصيف بأخذ ولادي
ونقعد معاهم يومين أشم نفسي قبل مارجع المعسكر قصدي بيت العيلة .
آخر حاجة بقي هاتكلم فيها هي التدخل في حياتي كلهم بيبقى لهم رأي في
حياتي إلا أنا ، شئ طبيعي ما انت عايشة في بيت عيلة يعني مثلاً لو عايزة
تروحي لوالدتك وده مطلب عادي ومن المطالب اللي وعد سي أحمد جوزي
بيه لكن اللي بيحصل إني لما آجي أروح لماما وأعدي على حماتي تقول لي :

رايحة فين يامرات إبني ؟

ملحوظة .. كلمة مرات إبني بتتقال لما تكون حماتي ناوية على مشكلة .

طبعاً أنا رديت عليها بهدوء :

رايحة لماما.

ما انت كنتي عندها أول إمبارح هي صورة.

أصلها وحشاني و



أجلى الزيارة النهاردة أصلي جاي لي ناس وأسماء مش هنا وعمايزاكي تعملي
لهم عصير من الحلو بتاعك .

وييجي حمايا ويشارك برأيه وسلفتي تشارك برأيها وطبعًا بأقعد وماروحش
لما ما .

وانت لابسة كدا ؟

طالعة شقتك ليه ؟

صاحبتك جاية لك ليه ؟

هي أمك هاتبات هنا ؟

انت بتكلمى مين ؟

ومليون سؤال وتلكيكة المهم يتدخلوا في حياتي أنا كنت فاكرة أني هابقى
صاحبة بيت لما أتجوز، بيت أنا اللي أعمل فيه كل حاجة على راحتي بيتي وأنا
حرة فيه لكن اللي شفته بعيد كل البعد عن اللي كنت بأحلم بيه ولذلك
نصيحة من أخت مرت بتجربة في بيت العيلة إحذري ، إحذري؛ الزواج في
بيت العيلة فح قاتل و لما تتجوزي يا حبيبتي إتجوزي واحد مقطوع من شجرة
أحسن يعني لا أم ولا أب ولا أخوات علشان ترتاحي وتحسي بالخصوصية .



الفخ الرابع سبع صنایع

" انتي بابا وانتي ماما وانت كل حاجة في حياتي "

فاكرين الجملة دي؟

أكيد فاكرينها كانت في فيلم فيروز وأنور وجدي ، بعد الجواز هاتعرفي إنك بقيتي كل حاجة فعلاً ، هو ده إحساسي دلوقتي بعد ما أتجوزت بقيت كل حاجة وحسيت قد إيه الجملة دي صادقة ، أنا هاشرح لكم ليه أنا قلت كدا و من غير الدخول في تفاصيل الزواج أو ظروفه لأنها كانت جواز عادية يعني جواز صالونات النهاردة وأنا معايا ٤ أولاد بنتين وولدين أنا كل حاجة ، بالنسبة لهم بقيت بابا وماما والمدرس والخدمة والدادة والمربية والطباخة والسواق ... الخ.

محدث يتسرع أنا مش أرملة لو كنت أرملة كل ده كان هابقى طبيعي لأن مفيش معايا راجل لكن أنا جوزي مش ميت للأسف ، لأ عايش وكويس وزي الفل ويتمتع بصحة جيدة بس ركن على جنب بمعنى ساب لي كل حاجة ورفع إيده عن أي مسؤولية وبقيت أنا سبع صنایع يعني باختصار بأعمل كل حاجة في البيت وبرة البيت كمان وعلى فكرة أنا موظفة وجوزي موظف يعني أنا



مش قاعدة في البيت ،يعني بأشتغل بره وجوه وكل ماتكلم وأقول له إن شغل البيت ورعاية الولاد كثير عليا وأطلب منه يساعدي يرد يقول :

أمال إنا إتجوزتك ليه؟

ساعة ماقال كدا نسيت أخلاقي وتربيتي ورديت عليه وقلت له :

وحياة أمك ؟

أسفة على هذا التعبير بس ده كان الرد المناسب على كلمته مع الأسف جوزي زي باقي الناس بيعتبر الأعمال المنزلية مهمة الزوجة فقط علمًا بأن الزواج سكن ومودة ورحمة ومش خدمة وتنظيف وغسيل كنت دائمًا وأنا صغيرة تضايقي كلمة أي رجل يقول " أتجوز واحدة تخدمني "

وكنت بأسأل نفسي : هو ده مفهوم الزواج عند الرجل؟ هي الزوجة خدامة؟ ليه الزوجة تشتغل في البيت لوحدها والرجل مايساعدش ؟ إلى آخر هذه التساؤلات وبدأت أتأمل في المتزوجات حواليا ألاقى الزوجة بتقوم بكل شيء جوه البيت وبره البيت من الألف إلى الياء وكأنها تزوجت فقط لهذا وكل واحدة منهم تقول "أيام الدلع كانت في بيت بابا"

ويمكن كمان البنات في بيت أهلها تكون معززة مكرمة ويمكن ماتعملش أي حاجة في وجود والدتها ولكنها لما تتجوز تتحول الصورة تمامًا وتلاقى نفسها قدام أعمال شاقة تقوم بها وحدها من غير أي مساعدة وتصبح هذه الأعمال عبئ عليا و إذا كانت موظفة تبقى أعمال كثيرة جدًا وكانت لي صديقة دائمًا تقول:



" الزوجة خادمة بلا أجر"

وتقول كمان:

" بعد الجواز بقيت شلبية أم العيال ومفيش لا حمد ولا شكرانية"

ويعتبر الرجل أنه من العيب مساعدة الزوجة في الأعمال المنزلية (لأنه شغل

الستات)

من اللي قال أنه شغل الستات؟

فين هو القانون اللي يلزم المرأة بمثل هذه الأعمال؟ طبعاً مفيش وإنما هي عادات توارثناها عبر الأجيال من أيام سي السيد وحتى الآن وهذه الأفكار للأسف لم تتغير وفيه كتير بينظروا للست على أنها خلقت فقط لتكون زوجة وخادمة.

لكن في أيامنا دي الزوجة بتشتغل زي الرجل تمامًا وكل واحد فيهم بيحط مرتبه في البيت يعني الست بتساهم في مصروف البيت يبقى ليه بقى؟ زي ماهي بتشتغل بره وتساعد في المصاريف هو كمان يساهم معاها في شغل البيت ومذاكرة الأولاد؟ رسولنا الكريم صلى الله عليه وسلم وهو صاحب أعظم رسالة للبشرية وخاتم الأنبياء كان يساعد زوجاته في أعمال المنزل ليه الراجل بيترفع عن المساعدة؟ شئ عجيب .

مثالاً آخر وهو سيدنا عمر بن الخطاب أمير المؤمنين فقد ذهب رجل لعمر بن الخطاب يشتكيه من زوجته التي تخاصمه وترفع صوتها عليه فلم يجد خيرًا من أمير المؤمنين الذي عرف بالقوة في الحق ، وعندما وصل إلى بيت



أمير المؤمنين عمر بن الخطاب رضي الله عنه وإذ به يسمع زوجته وهي ترفع صوتها في وجهه وتخاصمه فعندما وجد الأمر كذلك هم بالإنصراف وإذ بأمير المؤمنين يخرج من بيته صدفة فقال للرجل ما الذي أوقفك ببابي يا رجل ؟ قال جئت أشتكك زوجتي يا أمير المؤمنين فسمعت زوجتك تخاصمك فقلت في نفسي هذا أمير المؤمنين تفعل معه زوجته هكذا فكيف بي أنا ، فقال سيدنا عمر رضي الله عنه يارجل والله لقد بسطت منامي و طهت طعامي وتحملت أوزاري أو لا أحتملها أنا كذلك إذا رفعت صوتها في وجهي ..

إذا كان عمر بن الخطاب يقدر خدمة المرأة له وقيامها بالأعمال المنزلية عليه الرجالة ميفهموش كدا؟

أنا بقى أكبر مثال للكلام ده لأن جوزي ركن وسابني لوحيدى أبقى ماما وبابا وكل حاجة المحروس جوزي بقى إمتى ركن على الرف ؟

على فكرة أنا مش بأتريق هو فعلاً اسمه المحروس على المحروس سموه على اسم جده.

اسم النبی حارسه وصايته عمل إيه بقى ؟ أقولكم مرة كدا صحينا متأخر من النوم وهو خاف ليتأخر على الشغل قمت اتشكيت في لسانى وقلت له:

إنزل انت وأنا هاوصل الأولاد للمدرسة .

أنا قلت كدا لأنى بأنزل بعده بحاجة بسيطة بس ومن يومها على كدا بقت حجته إنه هابتأخر على الشغل وأوصل أنا العيال للمدرسة وبقى يكسل كمان يجيبهم وبقيت أنا أروح أجيبهم ودي كانت أول مسؤولية يرميها عليا



وحاولت أكثر من مرة أخليه يرجع هو يبقى مسؤول عن الحكاية دي لكن كان عنده ١٠٠ حجة أمري لله.

طبعًا أنا المسؤولة عن شراء الخضار ساعات كتير وأنا راجعة من شغلي بأجيبه زي أي ست وهو كان مسؤول عن باقي الطلبات في مرة برضه إتشكيت في لساني اللي عايز قطعه وكلمته وقلت له:

متجيبش عيش أنا جبت من الفرن اللي جنب ماما .

وهو نام في الخط بعد كدا وبقيت بأشغل سواق أودي العيال وأجيبهم من المدرسة وأذاكر لهم ده غير الطبخ والغسيل والتنظيف وغيره وغيره كل ده وأنا بأشغل كمان ومرة إتشكيت له وقلت له يساعدني في أي حاجة رد وقال لي :

أنا بأشغل ياهانم من الساعة ٨ لحد ٢ وبارجع مهدود حيلي .

وأنا كمان بأشغل زيك ولازم تساعدني وبعدين انت بتشتغل في المكتب يعني مش بتنحت في الصخر ولا بتشتغل في الجبل كلهم شوية ورق بتكتيمم وخلص.

انتي فاكراني من حديد وإلا إيه ماقدرش .

إשמعني أنا اللي أقدر؟

انتي الست ودي واجباتك كزوجة .

أه زوجة إيه بقى ؟ انت خلّيت فيها زوجة !! ده أنا الجارية اللي جابتها لك أمك ، هي الحياة الزوجية أنا اللي أشيل فيها كل الشغل وانت تيجي زيارة ولا



إيه ؟ سيادتك مُشرف ولا إيه ؟ ملكش أي دور ، يعني كل حاجة على دماغي
وانت كزوج وأب واجباتك إيه؟ رئيس قسم ولا ريس عمال؟
قال إيه بقى المحروس :

أنا بأشغل علشان أجيب لكم فلوس أصرف عليكم بيها.
نعم !!بتشغل علشان إيه !! تجيب فلوس !! أمال أنا باعمل إيه؟ يعني انت
بتجيب فلوس وأنا بأجيب لب ما أنا برضه بأجيب فلوس وهي فلوسك بتيجي
من بنك مصر وأنا بأجيها من بنك الحظ ؟ زي مابتجيب أنا بأجيب ، انت
بتشغل وأنا بأشغل بس الفرق يا حبيبي انت بترجع من شغلك تتغدي وتنام
لكن أنا في عرض مستمر ، بأذاكر للعيال وباروح أوديمهم الدرس وساعات
بأقف في الشارع بالساعة والأثنين لحد ما يخلصوا وأرجعهم البيت وماسكة
كل شغل البيت من أوله لأخره لوحدي ده غير شغلي كمان عايز إيه أكثر أنزل
أمسح سلم العمارة وأنضف شقق الجيران وأجيب لهم الخضار كمان ؟
بلاش مبالغة وحياتك كل الستات بتعمل كدا .

مش كل الستات يا حبيبي ! دي الستات اللي بختها مايل زي ، كان يوم مهبب
يوم ما وافقت عليك والله ياريتي فضلت في بيت بابا مكنتش إتهدلت كدا.
الراجل سابني أكلم نفسي وقام نام ولا كأني قلت له أي حاجة ، خلاص اعتبر
نفسه بيشتغل يعني خلاص شغله بره البيت كفاية ، يشيل إيدته من كل
حاجة ويسيب الخدمة اللي جايينها له تقوم بكل حاجة وكل شوية يقول لي

:



أنا الراجل أنا الراجل لما زهقني .

هو الراجل كلمة وبس يعني مش تعمل اللي بيعملوه الرجالة وبعدين تتكلم يعني أنا أتحمل مسئولية البيت في كل حاجة وكل ما أجي أعترض يقول لي نفس الكلمة اللي معندوش غيرها أنا الراجل وهو الراجل ياكل ويشرب وينام ويخرج وبس يعني ميغسلش وميطبخش فالج بس يقول لي :
دي شغلتك انت .

ومرة إتحديته وقلت له :

طيب والله ماتقدر تعمل اللي بأعمله ولاتستحمل ..

ياسلام ليه يعني ؟ الراجل أقوى من الست و أنا أقدر أعمل شغلك ده كله من غير ما أتعب حتى.

ده كلامه طيب هو مين بالطبط الأ أقوى؟ الراجل ولا الست ؟

لأول وهلة طبعًا ولما نسمع السؤال ده هاتكون الإجابة الرجل طبعًا أقوى من الست لأنها المخلوق الأضعف فرينا سبحانه وتعالى إدي للرجل قوة جسدية وبناء جسمي قوي علشان يتحمل العمل الشاق ويبقى عنده القدرة على بذل المجهود المطلوب منه ولكن بعد التفكير شوية نكتشف انها إجابة غير صحيحة بالطبع يتمتع الرجل زي ما قلت بالبناء القوي للجسم والعضلات ولكنه ليس الأ أقوى ومش هقول آم الولادة التي تتحملها المرأة وهي أكبر بكثير مما يتخيله الرجل ولأعتقد أن أي رجل مهما بلغت قوته يمكن أن يتحمل أمها ولكن سوف أذكر مثالاً بسيطاً جدًا يكشف لنا



إيه جالي برد بلاش أعطس ؟

وهي دي عطسة دي قنبلة .. إبقى إعطس بس من غير صوت .

إزاي يعني ؟

وإدانا عطسة قوية رجت في أرجاء الشقة

هاتشوووووووووووووه.

والواد الصغير طار من قدامي والمحروس بقى دور البرد هده ومبقاش قادر

يصلب طوله وعمل لي فيها عيان ليه بقى؟

والمحروس إنهار مع أول عطسة و بقى بيعاني بشدة من أقل حاجة ويضخم

الأمر وغاب من الشغل يومين ، عيان بقى ويأخذ الأدوية وإذا طلبت منه أي

حاجة لن يقول إلا:

" مش قادر "

وكل شوية يشتك راسي بتوجعني .. عيني بتحرقني.... عظمي كله بيوجعني

.....إلخ ويمكن أيضًا أن يأخذ أجازة يومين لأنه مريض ويبقى طريح الفراش

لاحول له ولا قوة إذاً من الأقوى ؟ الست طبعًا فالست عندها القدرة على

تحمل الألم والصمود والعمل في أسوأ الظروف أكثر من الراجل بكثير وتقدر

تكتم ألمها والاستمرار في العمل بلا كلل وطبعًا هذا لا ينطبق على كل الرجال

ولا كل الستات لكن البعض منهم ولكن الست لما تتحمل كل ده وهي صاحبة

الجسم الأضعف إذاً فهي بلا جدال الأقوى.



وفضلنا على الحال ده هو يروح الشغل ويرجع من الشغل ينام ويقوم من النوم يخرج مع أصحابه ، ومرة كنت حقيقي مرهقة وطلبت منه يقعد يذاكر مع الولاد وقف وإنحنى زي اللي عنده ٧٠ سنة وعمل لي فيها راجل عجوز وقال بصوت ضعيف واهن :

أنا النهاردة تعبت قوي في الشغل ومش قادر هنام شوية.
والله قدرت إنه تعبان فعلاً وسبته يدخل ينام وريح حوالي ساعتين وقام من النوم ماسك دماغه:

عندي صداع جامد قوي إعملي لي شاي وهاتي لي حباية أسبرين.
عملت له الشاي وجبت له الأسبرين وبقي قاعد ياعيني مش قادر يفتح عينه
ولسه هقول له يعمل الواجب مع العيال قام قال لي :
أنا هامد شوية لأحسن مش قادر.

تمدد إيه يا حبيبي ؟ ما انت لسه صاحي من النوم وبعدين شغل إيه اللي
عامل فيك كدا؟ هو انت بتشتغل في الجبل ؟ ده انت موظف يعني قاعد
على مكتب ومرتاح آخرراحة.

معبرنيش طبعا ومدد على الكنبه وسابني أكمل الواجب مع العيال وفجأة
موبايله رن ورد عليه كان واحد صاحبه وفجأة الراجل اللي كان مش قادر
يصلب طوله من التعب وبيفتح عنيه بالعافية من الصداع دبت فيه الروح
ونط من على الكنبه ووقف زي طرزان وسمعتة بيقول :
لأ مافيش ورايا حاجة ربع ساعة وأكون عندكم.



سبت اللي في إيدي ودخلت وراه أوضة النوم وكان بيلبس و كله حماس وهو
مليان نشاط وحيوية وسألته :

رايح فين يامحروس؟

أنا .. أنا خارج.

ما أنا عارفة إنك خارج، السؤال بقى خارج ليه وفين؟

طبعا تحاشي إنه يبص لي وكمل لبسه عادي وفضل ساكت وهو بيفكر و
يدور على أي حاجة يقولها وقال :

ده حسن صاحبي كلمني وهانتقابل عند محمود أصله عيان رايح فين ؟
على ماما يا محروس !! متعملش الشوية دول عليا يا حبيبي أنا فاهماك
وعارفاك.

يعني إيه؟

يعني اللي ربي خير من اللي اشترى يا حبيبي ، من إمتي و انت صاحب واجب
كدا ؟ انت خارج تسهر مع صحابك صح ؟

وفما إيه أنا من حقي إني أرفه عن نفسي بعد يوم مرهق زي ده.

ترفه عن نفسك!! آمال مين اللي كان عامل فيميت من شوية وصعب
عليا ؟ انت مش كان عندك صداع ؟

راح الصداع راح .

وضهرك اللي كان بيوجعك ؟

خف ياستي .



والله ربنا يبارك لصاحبك ده مكالمته فيها الشفاء ، طيب ماتخرجني معاك ؟
تخرجي معايا فين أنا خارج مع أصحابي ومينفعش تيجي معايا .
يعني انت تخرج وتشم هواء وتسيبيني كدا محبوسة بين أربع حيطان والعيال
بيهدلوا فيا ؟

محبكتش النهاردة يعني يوم تاني إن شاء الله .

أنا كمان تعبانة وعايزة أشم هواء .

تعبانة من إيه هو انت بتعملي حاجة متعبة كل شغلك سهل وبسيط وأي
حد يقدر يعمله .

بصيت له بغيظ وكنت هانفجر وحلفت إنني مش هاسيبه يخرج يعني أنا أقعد
أعمل الواجب وأذاكر وهو يخرج يمتع نفسه ويشم هواء ويرفه عن نفسه
أمبوسيل .

وقفت عند الباب لحد ماكمل لبس وأنا بأراقبه بهدوء وترقب وهو مش
دريان أنا بأفكر في إيه ؟ واکتملت الإيافة والشياكة وأول ماوقف واتجه لباب
الأوضة بسرعة حطيت رجلي فسكيتة وطبعاً وقع وقعة تمام ومخرجش
الليلة دي ولا أي ليلة لمدة ١٠ أيام ، مش علشان سمع كلامي لأ ، لأن صباح
رجله الصغير اتكسر ورجله اتجست ، متظلمونيش أنا مش شريرة بس هو
راجل أناني لما أطلب منه حاجة ولا أطلب منه إننا نخرج يركبه المرض
والتعب ولما يبجي يخرج مع أصحابه الصحة تدب فيه و يبقى زي الحصان
وكان لازم أتصرف .



بعد مافك الجبس كل حاجة استمرت زي ماهيا .. أنا كل حاجة وهو عايش مع نفسه وبعد فترة جالي سفرتبع شغلي أسبوع وأنا فرحت جدًا و هو رفض وبشدة طبعًا وأنا عارفة ليه وقال لي :

تسافري إزاي وتسببيني ؟ والعيال والبيت؟

أنا عارفة طبعًا إنه من غيري يغرق في شبر ميه فرديت عليه وأنا بأبتسم إبتسامة خبيثة:

مش انت قلت لي إن شغل البيت سهل وممكن تعمله لوحدك إتبسط فرصتك جت ولحد عندك عيش بقى.

وقف لي وكرامته نقحت عليه فشد نفسه قوي وقال:

طبعًا كل اللي بتعمله سهل وأنا أقدر أعمله انتي اللي كنتي بتضخمى الأمور لكن أنا مهمني إن نظام الأولاد يفضل زي ماهو علشان كذا لازم تلغي التدريب ده.

ماقدرش اسمي جاي للتدريب من الوزارة ومينفعش يتلغي ، انحول للتحقيق .

يعني إيه هاتسببيني لوحدني ؟

ضحكت ضحكة شريرة وقلت له وأنا مستمتعة :

أيوه ، هاسيبك لوحدك تمامًا ولمدة أسبوع بحاله.

وبدأت أدي له التعليمات:



- شوف بقى هاتعمل إيه ؟ من بالليل تطلع لحمة أو فراخ من الفريزوتسيها
- تفك على الرخامة وتقوم من بدري يعني حوالي ٥ ، ٥ ونص.
- يآآه بدري كدا ليه ؟ ده أنا مش هلحق أنا.
- طبيعي ده ميعاد مناسب علشان تعلق على الفراخ أو اللحمة يتسلقوا قبل ماتنزل.
- طيب هاعلق عليهم وأكمل نوم.
- تكمل إيه ؟ خلاص كدا النوم بالنسبة لك خلص لأنك هاتحضر الفطار وتصحي العيال وتلبسهم وتوصلهم للمدرسة ومتناساش تعمل لهم سندويتشات وبعدين تعدي تجيهم بعد الشغل وتجييب خضار وانت راجع لأن معنديش حاجة في التلاجة .
- وأدخل أنا شوية.
- تنام إيه والغداء ! أول ماترجع تطبخ الأكل وتغدي العيال.
- وبعدين أنا .
- لأ تنام إزاي؟ تنزل توصلهم للدروس وتقف تستناهم يا حبيبي على ما يخلصوا.
- أستناهم فين ؟
- في الشارع زي ما كنت بأعمل.
- يعني مارجعش البيت أنا.
- متلحقش ترجع وتروحهم تاني .



- ماشي أجيبهم من الدروس وأنام .
- لأ نوم إيه بقى ؟ هاتقعد تذاكر لهم وتحل الواجبات كلها معاهم .
- وأقوم أنا .
- طبعاً لأ تغسل المواعين وتروق الشقة .
- وهنام !
- انت طالع عليك عفريت اسمه أنام! أنام أنا ! إنسى الكلمة دي خالص ،
مفيش نوم
- إيه !! مفيش نوم !!
- طبعاً مفيش نوم ، تدور بقى في الأوض كلها تلم الحاجات اللي عايزة
غسيل وتشغل الغسالة و.....
- وقع المحروس على الأرض مغمى عليه وقفت أبص عليه بانتصار وشماتة
،الراجل ماستحملش الكلام أمال لما يبجي يشتغل فعلاً هايعمل إيه؟
- كنت فرحانة قوي وفي قمة سعادتي أخيراً هاتخلص من مهماتي ويتحملها هو
ويحس بيا شوية ويقدر اللي كنت بأعمله والله وبدون مبالغة كل يوم طول
الأسبوع اللي أنا غايباه كان يتصل بيا كل يوم وهالين عليه يعيط مسكين
وعرفت إنه أخذ أجازة أسبوع من الشغل مش ملاحق ياعيني على الشغل
وكل شوية يتصل يسألني على مكان حاجة ولا أعمل دي إزاي؟ وأتصرف
إزاي؟ وأنا في منتبى الإنشكاح وعملت زي يوسف وهي وهو بيسمع مراته
وهي غضبانة يالالالي يالالالي .



خلص التدريب وحن وقت رجوعي ، مقلتش على ميعاد رجوعي علشان يبقى مفاجأة ولما وصلت فتحت باب الشقة ودخلت بغض النظر عن منظر الشقة اللي كانت تضرب تقلب والأرض مليانة مية ، عارفة إني هاتعب بس عادي أنا متعودة على كدا، وتنضيفي للشقة هايبقى تمن قليل قوي قصاد فرجتي عليه وهو شقيان ومتهدل زي ، وكان المهم عندي أشوف آثار الأسبوع ده على اسم النبي حارسه وصايينه المحروس جوزي وأمتع نفسي ، فجأة لقيته خارج من المطبخ وهو رابط دماغه بطرحة من بتوعي ومشمربنظلون البيجاما لفوق وماسك الكبشة في إيده وهدومه غرقانه ميه وعلما صلصة وشكله يموت من الضحك وبيجري وراء البنت الصغيرة ويقول :

يابت هديتي حيلي أقعدي بقى على ما أخلص الأكل والله لو إتحرق لأوريك، مش كفاية أكلتي كل البطاطس اللي حمرتها لسه هاحمر تاني .

وفجأة وهو بيجري وراها اتزحلق ووقع على الأرض وأخذها زحلقة لحد مابقى عند رجلها ورفع عنيه وبص لي وأنا واقفة ، طبعًا منظره مضحك جدًا ومقدرتش أمسك نفسي وضحك بصوت عالي والأولاد خرجوا بسرعة ورموا أنفسهم عليا وكانوا طبعًا متهدلين وهدومهم وسخة وشكلهم يقرف وهو حاول يقف بصعوبة ووقف زي التمثال وعنيه اتملت دموع :

إيه يامحروس ؟ انت عامل في نفسك كدا ليه؟

الحمد لله إنك رجعتي لنا بالسلامة.



وضمني بلهفة مشفتهاش من شهر العسل وفضل يحضن فيا ويبوسني

ويبوس إيدي والله ده حصل ووقف يبص في وشي وقال بصوت متأثر:

أنا شفت الويل في غيابك ، ياخراي ياخراي على اللي جرى لي ياختي ياختي

ياختي ، وسطي إتقطم وضرهري إتخلع ، والعيال ، العيال يهدلونى ودوخونى

السبع دوخت ، دول طلعاوا أشقياء ومبيسمعوش الكلام ولايبطلوا طلبات ،

بيستحموا بالعافية وبيغيروا هدومهم بالعافية وبيذاكروا بالعافية ومكنتش

ملاحق عليهم وعلى دروسهم وخدمتهم ، انتي كنتي بتتعاملني معاهم إزاي؟

والغسيل أه من الغسيل ده كوم لوحده ، انتي كنتي بتلاحقي تعلمي

الحاجات دي إمتي وإزاي؟ ده أنا كل حنة في جسمي بتوجعني ومن يوم

ماسافرتي ماعرفتش أنام لضهر ولاليل .

رفعت راسي بفخر وقلت له :

قدرات بقى مش قلت لك اللي بأعمله ماتقدرش عليه قلت لي أنا قوي

والشغل ده أعمله بسهولة .

أبصم لك بالعشرة انت بطلة ، انت ست مفيش منك إثنين ، سوبروومن .

وقفت بانتصار وأنا بأبص له بالأطة مسك إيدي وقال بحنان :

إوعي تبعدي عن البيت تاني ولا يوم واحد .

يعني عرفت قيمتي أهو؟

طبعًا يا حبيبتى .

وناولني الكبشة وقال :



إستلمي الراية في إيدك وأنا هاشتغل معاكي في كل حاجة ومش هسيبك
تعملي كل حاجة لوحدهك تاني .
تفتكرو إنه اتغير؟ أبدًا ، وهم يومين إثنين فضل يساعدني ويعمل معايا كل
حاجة وبعد كذا ربح تاني ونسي معاناته ورجعت ربما لعادتها القديمة ورجع
تاني يرمي الحمل عليا وكأن مفيش حاجة حصلت يعني أنا لسه ماما وبابا
وكل حاجة في البيت أدبي آخرة الجواز.



الفخ الخامس

قبل الجواز حاجة وبعد الزواج حاجة.

الكل بيتكلم عن تغيير المرأة بعد الزواج وأن جسمها يتغير وتكف عن الإهتمام بنفسها أو جمالها ولا تتأنق إلا وهي ذاهبة للخارج فقط وتظل داخل البيت مثل شلبية بالجلابية والإيشارب وبعد البرفان تكون رائحتها دائماً طيبخ على لبن ، كما يقول معظم الرجال ويزداد وزنها بشكل كبير وإذا تحدثت لايحتوي حديثها إلا على الأولاد ومشاكلهم وأسعار الخضار وإزاي تعبت في البيت وبعد الصوت الرقيق يتحول صوتها إلى صوت خشن ملئ بالصراخ والزعيق وتختفي الإبتسامة الناعمة ويحل محلها تكشيرة شبه مستمرة ولقد سمعت كثير من زملاء العمل يتحدثون عن زوجاتهم بسخرية :

" مش عارف يا أخي الست بيجرى لها إيه بعد الجواز بتتجوزها هند رستم

تبقى ماري منيب "

وبالفعل معاهم حق فالبننت تكون خالية البال وليس لديها مسئوليات وتعتمد على أمها في كثير من الأمور ولذلك فيكون أمامها وقت كبير لتهتم بنفسها وجمالها ورشاقتها وتتأنق دائماً داخل وخارج البيت و بعد الزواج تظل هكذا حتى تنجب أول طفل فيبقى كل ما هو متاح من الوقت لهذا



المخلوق الصغير الذي يعتمد عليها إعتقادا كليًا ويقل إهتمامها بنفسها وبزوجها وبالطبع بعد الإنجاب يتغير جسمها الرشيق وتتحول كما يقولون إلى ماري منيب ولكن هل تتغير وحدها؟ طبعًا لأ فالرجل أيضًا يتغير .. هل ظل الرجل في جمال ورشاقة جيمس دين أكيد لأ ، فبعد البرفانات الغالية وحلق الذقن على الزيرو والإهتمام بالشعر واللبس الأنيق يصبح الرجل أصلع و بكرش كبير ويرتدي نفس القميص والبنطلون لعدة أيام وربما لايحلق ذقنه إلا يوم الجمعة للصلاة وأشياء أخرى كثيرة هل دمه خفيف ورومانسي مثل رشدي أباطة وكلامه كله يكون عن الحب والغرام بالطبع لأ ، وأكيد مع الرجل العذرفتغيرات الجسم أمرطبيعي جدًا مع تقدم العمر ومشاكل الحياة تمنعه عن كلام الحب إذا فالرجل والمرأة على حق ولكن يجب أن يقبل كل منهم التغيرات في شريك الحياة وكما يطلب الرجل من زوجته أن تنظر إلى نفسها في المرأة فليتنظر هو أيضًا لنفسه في المرأة فهي لم تتغير وحدها لأنه أيضًا تغير ولم يعد الشاب الوسيم الذي تزوجها لايمكن أن يبقى أي شخص على حاله وإذا أراد أن يراها متأنقة دائمًا فيجب أن يحضر لها خادمة تنظف المنزل وطباخ يطهو لهم الطعام ومربية لرعاية الأولاد ويودعها بقى صالونات التجميل علشان تعتي بنفسها ويودعها للكوافير فستبقى دائمًا هند رستم ويحاول هو أن يبقى رشدي أباطة وربنا معاهم .
نشوف بقى عروستنا مع جوزها وحكايتهم إيه؟



أنا ميرفت مثال حي على الموضوع ده لأن جوزي معجبوش شكلي بعد الجواز وطلب مني إني أهتم بنفسي ولما إهتمت بنفسي معجبتوش، بصوا انتوا لازم تعرفوا الحكاية الأول علشان تعرفوا أنا أقصد إيه؟

أنا اتجوزت حسين من 8 سنين ومعايا طفلين ، جوازتنا كانت عادية ومن غير مشاكل وأنا وحسين متفاهمين جدًا و الحقيقة جوزي راجل طيب وحنين وابن حلال بس مش دي المشكلة ، المشكلة إننا كنا عرسان زي القمر هو وسيم وطويل وشعره مسبب وأنا كنت مانيكان لكن طبعًا بعد الجواز كل حاجة اتغيرت حسين بقى أصلع وبكرش وأنا جسمي اتغير بعد الولادة من أول مرة ووزني زاد وده شىء عادي يعني محدش يبفضل على حاله ، اللي مش عادي بقى إنه كل مايتفرج على التلفزيون ويشوف ممثلة حلوة أو مطربة يقول لي :

شوفي الستات عاملة إزاي ؟

بلعتها له كام مرة والله وماتكلمتش خالص ماهم برضه ستات حلوة وبتلعلط وكلها أنوثة وبقيت بأقلب الكلام لهزار..

ونضحك بس بيبي وبينكم أنا كنت بأزعل ماهو برضه بيقول كلام يجرح الإحساس و كل شوية يقول لي شوفي الستات القشطة اللي زي القمر ولاعودهم آخر رشاقة ويحرق دمي وأنا مالي يعني هو أنا مش ست ؟ ولا علشان تخنت شوية أما راجل معندوش ذوق ، وبعدين يبص لنفسه الأول قبل مايلقح بالكلام ، وفضلت آخذ الموضوع بهزار لحد مرة كنا بنتفرج على



- لازم تكوني حلوة وتحافظي على نفسك علشان جوزك وتبقى زي الستات القشطة دي مش بدل ما أبص بره ولا اتجوز عليكى .

ياخويا انت بتشوف أصلاً ولا حتى بقى فيك رمق .. وبعدين مين دي اللي هاترضى بيك ؟ انت شفت شكلك بقى عامل إزاي ؟ احمد ربنا إني ساكتة .
الله انت هاتقلبي عليا ليه كل ده علشان عايزك تهتمى بنفسك شوية وتبقى زي الستات الحلوة دي .

ياحبيبي الستات الحلوين اللي بتشوفهم دول بيروحوا مراكز تجميل يصرفوا بالألوفات وبيعملوا شفت وحقن وتجميل وجسمهم اللي هاتتجن عليه برضه بيعملوه بالنحت يعني مش طبيعي وكمان بيناموا للضهر وعندهم خدامين بيخدموهم مش زي شقيانة طول اليوم عايزني أبقى زيهم هات لي خدامين يقوموا بشغل البيت وشوف لي معاك كام ألف جنيه أروح مركز تجميل وأنا أبقى أجمل منهم كلهم قلت إيه؟

طبعاً هو منطقتش صحيح إحنا دخلنا كويس بس منقدرش على مصاريف الحاجات دي بس أنا فكرت برضه في اللي قاله و قلت بقى لازم أتصرف مع الراجل ده مش كل مرة يجرني كدا ويقول جملة بايخة قوم لازم أحرجه أنا كمان فعملت إيه؟

كان قاعد بيلبس الشراب وطبعاً ياعيني مش عارف يوطي من الكرش وفكرني بنفسي وأنا حامل وبطني مش مخلياني عارفة أوطي ألبس الشراب زيه بالظبط دلوقتي وكان هو بيتقف يضحك عليا بدل مايساعدني وبقي ينهج



وكانه بيجري ويجيب كرشه يمين شوية وشمال علشان يعرف يلبسه ومفيش
فايدة وبقى بيشرح طيب أنا عملت إيه بقى؟

جبت موبايلي وصورته فيديو وهو بيعافر كدا يايعيني وأنا حايشة ضحكتي
وبعد ما أخيرًا لبس الفردتين وعدل نفسه كان بيصب عرق وبينهج وكأنه
جاي من سباق وحط إيداه على قلبه لدرجة إني خفت عليه ورفع عينه لقاني
واقفة بأصوره وسألني :

بتعملي إيه؟

بأصور لك فيديو للذكرى .. وضحكت لما بطني وجعتني .

وقام يجرى ورايا وهو يهدد :

إسمعي لما أقولك الفيديو ده تمسحيه لأحسن مش هايجصل لك طيب ،
وأنا لسه مشغلة الكاميرا وبالف له أصوره هو بيجري ورايا وكرشه بيترج
وبيمشي قدامه وضحكتي جايبه لآخر الدنيا وكل شوية يقف يأخذ نفسه
وطبعًا مقدرش يخليني أمسح الفيديو وكل مايقول لي شوفي الستات عاملة
إزاي أخرج الفيديو وأتفرج عليه قدامه وأضحك وبقى وسيلة تهديد كمان لما
أحبه يعمل حاجة أهدهه أني هاوري الفيديو لقرايبنا وأصحابنا يخاف وينفذ
لي اللي أنا عايزاه على طول ومن غير مناقشة، أمال يعني أسيبه يذلني ؟

مرة كنت قاعدة لوحدي هو راح عند أمه والعيال بيلعبوا عند الجيران
فقممت كدا أشوف شوية هدوم وفساتين من جهازي و حاولت ألبس فستان
من بتوعي لما كنت عروسة والحقيقة إتحشر عند كتفي ومرضيش ينزل ولا



حتة بعد كدا وإتخنقت وروحي كانت هاتطلع ومعرفتش أخلعه غير لما قصيته وقست واحد تاني هو دخل الصراحة بس بصعوبة شديدة وبصيت في المرآية لقيت قدامي واحدة مبعجرة وكلها مطبات ، بقيت حاجة ملخبطة كدا ملهاش وصف ، وكلمت نفسي :

إيه القرف اللي أنا شايفاه ده ؟ إخييييييه ، إنا إيه اللي جرى لي ؟ فين غصن البان والقوام الممشوق ؟ إزاي أنا سبت نفسي لما بقيت كدا ؟ وزعلت على نفسي وقلت والله الراجل عنده حق أنا إزاي أهمل في نفسي كدا؟ فقررت إنني أهتم بنفسي ووفرت قرشين وقللت أكلي شوية ووزني نزل حاجة بسيطة، كنت لسه تخينة بس أهو معقولة ..

قوم إيه؟ رححت عملت شعري بروتين وغيرت لونه واشترت أدوات مكياج جديدة وفي ليلة قلت أعمل له مفاجأة بعد ما نزل يروح لأمه ونيمت العيال هو قال لي ساعة وراجع ، لبست واتشيكيت وحطيت مكياج وظبطت شعري ولبست فستان شفتشي بين كل إشي زي مايقولوا ووطيت النور في الصالة وخليته ضوء شاعري ، قلت أرجع له أيام زمان وشهر العسل بقى وقعدت استنائه وهو اتأخر بقيت كل شوية أغير في قعدتي علشان تبقى شكلها حلو وسكسي كدا وفضلت أتقل مرة على الجنب اليمين ومرة على الجنب الشمال ومرة أمد رجلي ومرة أتنها ومرة أقف وقفة إغراء عند باب البلكونة زي بتوع الفيديو كليب وفضلت على الوضع ده لحد ماجسمي نمل وعينيه اتقلبت وهو اتأخرورحت في النوم وفجأة صحيت لقيت الساعة ٣ الصبح :



الله هو الراجل ماجاش ولا إيه؟

قمت بسرعة أشوفه في أوضة النوم لقيته نايم وبيشخر.

الراجل جه ومشافنيش ودخل نام حتى من غير مايدور عليا قربت منه وهزيتيه مرضيش يصحى فمسكت مخدة علشان احدفها في وشه بس قلت لأ هو عايز حاجة تفوقه رحى بسرعة جيت مضرب الدبان وضربته بيه لسعوعته قام مفزوع :

إيه ؟ فيه إيه؟

قوم ياسبعي ، انت رجعت الساعة كام إمبراح؟

بص بدهشة وقال لي:

انت مين؟

ماتفتح ياراجل ، مين يعني إيه؟ أنا مراتك.

دور على النظارة ولبسها وبص لي وبرق عينيه وقال :

انتي عاملة في نفسك كدا ليه؟ إحنا رايجين فرح؟

أعمى القلب والنظر والله ، طيب ده أرد عليك أقول لك إيه؟

كنت عاملة لك ليلة رومانسية يا حوسين وانت بوظتها خسارة فيك المجهود اللي عملته والمصاريف اللي صرفتها والله، انت لما دخلت الشقة بالليل إزاي

مشفتنيش ؟

كنت مستنياني فين؟



في الصالة على الكنبه اللي في وش الباب لزق ، انت إتعميت يا حسين؟
وبعدين مش تدور عليا ؟ فيه واحد يدخل شقته بالليل ميلاقيش مراته
ينام كدا عادي براحتة ويشخر؟

أنا قلت يمكن تكوني نمتي مع العيال.

قلت يابت عدي الموقف كدا وإتعدلي ومتضيعيش مجهودك على الفاضى
وعملت حركة هند رستم ومديت شفافي في حركة من حركاتها المغرية
واتقصعت بدلع وقلت له:

- سونة ... إيه رأيك في اللي أنا عاملاه ياسونة ؟

- كويس .

- بس ! كويس بس !

لوح أنا متجوزة لوح وقبل ما أتكلم قالي :

والفستان شكله وحش قوي عليك قوي ، المفروض تنزلي وزنك بيعى ٤٠
كيلو بقيتي تخينة قوي .

أخص عليك راجل معندوش ذوق بقى فيه واحد يقول لمراته كلمة زي دي ؟
ده بدل ماتقول لي انت حلوة ولا أي حاجة تجاملني على الأقل بدل ما تلبخ
كدا ، طبعا جملة زي دي ممكن تدمر أي ست وقلت والله ماهعديها له
وقلت له :



طيب أنا تخينة وعندي أسبابي ، علشان حملت وولدت مرتين لكن انت تخين من إيه ؟ أقول لك أنا كرشك ده اللي عامل زي الحامل ٩ شهور زاد من الأكل والحشر .

طبعًا غسلت وشي ولميت شعري ورحت أكمل نوم في أوضة العيال وفضلت غضبانة عليه شوية بس هو برضه مهانش عليه زعلي وجه يراضييني ، فضلت شائلة منه وزى ماهو كان بيحرق دمي بقيت أنا كمان أحرق دمه وكل ماشوف ممثل وسيم خصوصًا في المسلسلات التركي أقوله:

شوف الرجالة وجمالهم ياعيني عليا وعلى بختي .

وماله بختك بقى ؟

بختي !! اتجوزت أحمد مظهر وطلع بعد الجواز عبد الفتاح القصيري و مسكت الموبايل وشغلت له الفيديو قعدت أضحك قام هو بغضب وساب لي الحتة .

في يوم ثاني قررت استقبله استقبال عاطفي زي الأفلام فلبست استريتش وبادي وسرحت شعري أبو بروتين وحطيت مكياج ماهو أنا لازم أعيشه في جو رومانسي ، وأول ماسمعت الباب بيتفتح جريت عليه بلهفة مش عايزة أقول لكم قد إيه هو إتفاجئ بيا وبمنظري ؟ ظهرت عليه الصدمة على طول ووقف يا حبيبي جنب باب الشقة فاتح بقه ومبرأ عنيه وأنا رايحة ناحيته وكل حنة في جسمي بتترج والشقة بتتهز من خطوتي وكأن فيها زلزال وقلت اسمه وأنا بأنهج:



حسييييييييين.

هو طبعًا لما شاف كدا وقف برعب شوية وبعدين خاف وجري مني وأنا
فاكره بيلعب معايا زي عمر الشريف وفاتن حمامة أتاريه كان خايف مني
وغنيت له:

سونة ياسنسن جتلك أهو.

وفضلت وراه هو يجري وأنا أجري وراه لحد ماوقع على الأرض وأنا وقعت
فوقه ولقيته بيشاور بإيده من غير مايتكلم وأنا لسه عايشة في الدور والجو
الرومانسي لحد مالقيت وشه بدأ يتغير ويزرق ، عرفت إنه مش قادر يتنفس
مني طبعًا وكان تقريبًا بيطلع في الروح قمت بسرعة ولحقته وفضلت أهوي
عليه لحد مارجع بتنفس تاني ودي كانت آخر مرة أحاول أعمل أي حاجة
رومانسية معاه ، والله أنا نييتي كانت سليمة بس كل ماعمل حاجة تقلب
بنكد وهو من يومها ياقلبي بقى يفتح الباب بحذر ويمد راسه يبص يمين
وشمال الأول ولما يشوفني رايحة ناحيته يتدارى وراء أي حاجة لحد مايتأكد
إني مش هاستقبله تاني بالطريقة دي ولما يحس بالأمان يتصرف عادي .

كملنا حياتنا عادي خالص زي ماكنا وعايشين حياتنا زي أي زوجين لكن
حوسين جوزي بقى لقيته عامل إيه؟

البيه لقيته بيشتكى مني إني مشغولة في البيت وبأهمل في نفسي ووزني زاد
وعمل إجتماع جاب بابا وماما واشتكى مني لما قال بس أقول لكم الحق؟ أنا
دمي اتحرق منه واتقهرت بس الكل وافقه ونصحوني إني لازم أنغير علشان



أحافظ عليه قلت وماله هو برضه جوزي وأبو عيالي ولحد دلوقتي مشفتش منه أي حاجة وحشة وقد كان أخذت قرار بياني لازم أتغير و هاعمل زي نجومات السينما وفعلاً عملت جمعية ورحت مركز تجميل وعملت شفت دهون وتجميد دهون لما رجعت تاني غزال وكل يوم والثاني عند الكوافير بأعمل ماسكات على وشي وحمامات كريم وبقيت إيه بقي؟ قمر كدا قمر.. وحسين فرح بيا قوى لأنني رجعت كمان أحلى من الأول وعشنا تاني جو شهر العسل وكل يوم أعمل له مفاجأة وعشاء رومانسي وجو شاعري ، بس طبعاً مكنتش بأطبخ كنت بأجيب الأكل من بره وطبيعي إن شغل البيت اتأثر ما أنا مش فاضية يوم ويوم في الجيم وكل يوم والثاني في مركز تجميل أو عند الكوافير ماهو اللي هو عايزه له تمن برضه وهو أسبوع واحد كان نازل رايح لأمه وبيدور على حاجة يلبسها وطبعاً أنا مغسلتش أي حاجة ولقيته بيتخانق معايا :

إيه ده ياميرفت؟ مفيش ولاقميص ولابنطلون نضيف.

معلش أصلي النهاردة اتأخرت عند الكوافير وملحقتش أغسل ياسونة. وتوالت الخناقات كل يوم خناقة شكل لأن البيت بقي ناقصة حاجات كتير ومصاريفه زادت

فين الغداء ياميرفت؟

مطبختش النهاردة لأنني كنت متابعة برنامج عن الكولاجين إبعث هات دليفري ياسونة.



منضفتيش الشقة ليه ياميرفت ؟
كنت حاطة مانيكير وكريم على إيدي ياسونة .
والعيال سقطت الشهر ده ليه ياميرفت؟
مشس فاضية أذاكر لهم ياسونة .
الفلوس اللي كانت في الدرج راحت فين ياميرفت ؟
أخذتها علشان أدفع تمن الكولاجين ياسونة.
أخذتي مصروف الشهر للكولاجين.
أيوه أعمل إيه فلوسي خلصت ياسونة.
ونصرف منين لأخر الشهر؟.
إتصرف مش انت اللي عايز تحس بأنك متجاوز هيفاء وهبي عيش بقى
حياتك ياسونة .
الراجل ياعيني بقى هين عليه يرمي نفسه من البلكونة فقلت له:
انت لازم تجيب لي شغالة ياسونة.
نعم ياختي منين ؟ انت مشطبة على فلوسي أول بأول علشان جمالك
ورشاقتك.
مش انت اللي عايز كدا ياسونة؟
وهكذا يا حضرات راحت فرحة حسين بيا كسبت جميلة ومهتمة بنفسها ورجع
للراجل اللي كل همه هدوم نظيفة وأكل في البيت وعيال تترى وحياتنا بقت
عبارة عن خناق وبعد ماكنت زوجة مليانة شوية وست بيت هائلة بقيت



ست حلوة ومغرية وببتي مهمل وبعد ما كنا سعدا وراضيين بقينا في مشاكل على طول وحسين اشتكى من المصاريف لأن اللي كان بيتصرف في شهر بقيت أنا بأصرفه في أسبوع على جمالي ورشاقتي والدليفري دي بقى حاجة تزعل؟ مش هو اللي عايز كدا؟ قلوا لي إذا كنت غلطانة ، أنا كنت بأحاول أرضي جوزي.

حوسين جوزي اللي عمل إجتماع لأهلي علشان يشتكي بأني مهملة في نفسي فاكرين؟ هو نفسه اللي عمل نفس الإجتماع علشان برضه يشتكي لأهلي مني وبدأ يشتكي مني ومن إهمالي ومصاريفي وقال لبابا :

بتصرف كل دخلنا على التجميل وعلى شعرها وأنا مش ملاحق مصاريف وكمان بطلت تطبخ وتنضف البيت و تذاكر للعيال.

وسألني بابا:

ليه كدا يابنتي؟

أعمل إيه يابابا هو اللي عايزني حلوة ورشيقة زي الفنانات والحاجات دي عايزة مصاريف.

وبيتنا اللي بقى مهمل وعيالنا اللي سقطوا؟

اجيب لك وقت منين بقى أنا مشغولة على طول وعندي مواعيد علشان أحافظ على شكلي.

أنا عايز زوجة تهتم بيا وبببتي وبأولادي ومش عروسة حلوة.



لاحول ولا قوة إلا بالله انت مش عايرتي علشان جسمي تخين ومش مهتمة
بنفسي أديني عملت اللي انت عايزه مش مبسوط ليه بقى ؟
علشان مش مرتاح في بيتي كل حاجة ناقصة .
عايز ترتاح في البيت؟ بسيطة.

بسيطة إزاي ؟

هات لي خدامة تنظف البيت وواحدة تغسلي الغسيل وهات لي مربية
للأولاد وانت ترتاح وأنا أفضل لك هيفاء وهي ونعيش حياتنا كلها شهر غسل
ياسونة.

بصلي بغيظ طبعًا لأنني دلوقتي مش عاجباه وقال بنفزة:

لأ طبعًا مينفعش الكلام ده خالص ، أنا عايزه دمة نضيفة وأكلة حلوة وبيت
نضيف ومتروق .

عجائب !! انت عايز إيه بالضبط ؟ الرجالة عايزة إيه؟ نرضيكم إزاي يعني ؟
قولي؟

لما كنت ست بيت وزوجة مجتهدة معجبش ، عملت لك اللي انت عايزه
وبقيت اهتم بنفسي برضه معجبش ، أعمل لك إيه أكثر من كدا ؟

صحيح هي الرجالة عايزة إيه ؟ عايزين يتجوزوا واحدة في شكل وجسم
هيفاء وهي وفي نفس الوقت تكون زوجة شاطرة وست بيت زي فردوس
محمد ، دي معادلة صعبة لكن الرجل عايز كل حاجة يعني أنا رضيت
بتغيير جسمه وشكله ليه هو كمان ميرضاش بتغيير جسمي وشكلي ، يعني أنا



قبلتك على عيبك انت كمان المفروض تقبلني على عيبي ولا إيه ؟ عجائب
والله !!



الفخ السادس قسمة ونصيب

كل الجوازات قسمة ونصيب إلا أنا جوازتي كانت قضاء وقدر أوروبما تكفير ذنوب ليه؟ سؤال مهم .

المثل بيقول إيه؟ إمشي في جنازة ولا تمشي في جوازة مقولة صحيحة ١٠٠% لأ مليون % تدخل في جوازة اتنين ليه ماتخليكي في حالك، خلي كل واحد يتجوز كدا بالصدفة وإلا مش ضروري جواز خالص الوحدة أفضل بكثير .

أنا بأقول كدا ليه ؟

لأن الست اللي جابت لي سامح جوزي منها لله جابت لي مصيبة وربنا مصيبة، والله مابتفوت صلاة إلا وأنا بادعى عليها حقيقي حسبي الله ونعم الوكيل ، اسمها زينب وكانت جارة تيتا وشافتني كتير وأنا باروح لتيتا وجت لماما في يوم مطلعتلوش شمس وقالت لها :

أنا جايبة لفاتن عريس لقطعة.

وللعلم إن كل اللي كان بيحب لي عريس كان لازم يقول كلمة لقطعة دي وأنا ساعتها بأحط إيدي على قلبي علشان إتعلمت إن نص الكلام اللي بيقولوه من نوع الزيادات والتحايبش علشان تحلي العريس يعني الكذب الأبيض اللي بيصفي على مفيش ، يعني تقول ده عمره ٣٥ أروح ألاقيه ٥٠ سنة ، تقول لي



ده رشيق وأمور أقابله أشوفه تخين وبكرش ، تقعد تعد لي في أملاكه
وفلوسه وتقول :

ده عنده عمارة ه أدوار وعربية وحساب في البنك.

تقولش أنا هاتجوز شركة وبعدين يطلع بخيل جلدة كله كذب في كذب
وحجتهم المصلحة والستر.

نرجع لما ما بقى لما سمعت سيرة العريس اللقطة من طنط زينب منها لله ،
فرحت ورفعت إيديها علشان تزغرط قمت أنا زعقت بأعلى صوت:

ماما!!!!

الست يا عيني اتخضت وشرقت وكانت حوسة جبت لها مياه وفضلت أهوي
عليها والحمد لله نجت مش باقولكم طنط دي وشها مش حلو المهم لما ماما
بقت كويسة قلت لها :

إيه يا أمال ؟ إيه ؟ انت ماصدقتي هاترميني لأي عريس مش تسألني عن
تفاصيله الأول ، قولي ياطنط صفات العريس اللقطة.

وطلع اسمه سامح محاسب عمره ٣٧ سنة وأنا وقتها كان عمري ٢٣ وأنا
قلت سنة ١٤ فرق كتير قالولي مش مهم ده راجل مايترفضش وطبعًا طنط
ماسابتش صفة كويسة إلا وقالها فيه هادي ومؤدب ونضيف ووووو.....

لدرجة إنى حسيت بأني هاتخطب لملاك كامل الأوصاف ومن كلامها والله
صدقت اللي قالته وأستنيت بقى علشان أشوف فارس الأحلام اللي وصفته



طنط زينب منها لله وجه مع أمه وأبوه وظهري مايقولوا إنه هادي ومؤدب
بس لاحظت إنه موطي على طول ومش بيرفع راسه فسألت مامته :
هو رقبته واجعاه ؟
لأ ده بس هايب الموقف.

هايب الموقف ليه ده هو الراجل المفروض إن أنا اللي أكون كدا مش هو
وبعدين قلت وماله الراجل متربي ومحترم وبعد ما قعدوا قعدتهم اللي
ماقالش فيها كلمتين على بعض ومسمعتش صوته خالص ،مشيوا وإتجمعوا
حواليا يسألوني عن رأيي وأنا قلت لهم:
والله موافقة مبدئيًا.

والله ماقلت غير كدا ولقيتهم بينطوا من الفرح وبيحضنوني وأنا بأحاول
أشرح لهم بأني لسه مش موافقة ولازم أقعد معاه شوية قبل ما أدي رأيي
النهائي ..

أنا قلت مبدئيًا يا جماعة مش رأي نهائي و ..

قام بابا قالي :

أقعدني معاه براحتك بعد الخطوبة وأعرفيه على مهلك ألف مبروك.

ألف مبروك إيه يا جماعة؟ هو سلق بيض طيب استنوا بس

محدث سمعني طبعًا وبعدين كروتوني ولقيتني مخطوبة إزاي ما عرفش !!
معلش إستحملوني هاحكي لكم شوية على الخطوبة قبل ماندخل في
تفاصيل الزواج لأن المرحلة دي كانت مهمة جدًا بالنسبة لي واللي حصل فيها



مش قليل لأنني اكتشفت فيه حاجات تخلييني أفسخ الخطوبة وكلها حاجات واضحة وبينة مش ليا أنا لوحدي لأ دي لكل اللي حواليا لكن هم بقى عايزين يجوزوني ويستروني قبل ما أوصل لسن الثلاثين المرعب اللي كل الناس بتخاف منه وكانوا خايفين إني أعنس لأنني كنت بأرفض كثير وماما تقول لي :

انتي رفضتي ناس كثير قبل كدا وسامح راجل زي الفل.

فل !! فل إيه ياماما ؟ انتي بتتكلمي عن مين ؟ عن سامح ؟

ولقيت بابا كمان بيشارك في سرد مميزات عريس الغفلة وبيحلي فيه وافتكرت جملة عبد الفتاح القصري في فيلم ابن حميدو وهم بيقنعوا هند رستم تتجوز الباز أفندي ويقول لها ده راجل أنا نفسي أتمناه ومسكتي الضحك وبابا إتجنن مني وسألني :

بتضحكي ليه يابنت ؟

علشان هاتجوز الباز أفندي .

تصوروا أنا أتجوز الباز أفندي ومن يومها بطلت أقول له سامح لأنه بالنسبة لي بقى فعلاً الباز أفندي ولو إن الباز أفندي كان متكلم وظريف . وبعد كل اللي قالوه برضه مكنتش مرتاحة خالص وأقولهم ساكت يقولوا ده هادي أقولهم ده بينام وأنا قاعدة معاه يقولوا لي من التعب ماهو محاسب وطول اليوم بيشتغل وتعبان وفضلت أقولهم وأقولهم بس هيات . الأقي الرد جاهز من ماما وأخواتي :



أغسل وشي وأروح ثاني أقعد معاه وييجي لي صداع من كلامه وقلت لهم
كثير:

مش عايزاه يا جماعة ده راجل ممل قوي ومش مرتاحة .
والكل يعارضني ، المهم يوم مارحنا نشتري الشبكة فضلت أنا أنقي مع أخته
ومامته وهو !!!كان معانا طبعًا بس حد يفكر كدا كان بيعمل إيه؟ لأ مكانش
بينقي معايا الشبكة.

كان نايم في المحل !!

والله العظيم نام على كرسي وصحينا بعد ما حاسبنا ده لأنه بينام الساعة
٩ بالظبط وياعيني وإحنا بننحدد ميعاد شراء الشبكة معملناش حسابنا
وكانت الساعة تجاوزت ٩ فلازم ينام حاجة هم حقيقي .
لما كان بييجي لي زيارات بقى كان لازم ييجي مع أمه وبيقول لي ميصحش أدخل
من غير محرم.

عبيط ده باين ولا إيه ؟ محرم إيه انت فاهم الموضوع غلط المحرم يبقى من
عندي أنا مش من عندك أنا البننت على فكرة مش انت .

وكان يقعد قعدته زي البننت الخجولة كدا موطي في الأرض ومبيتحركش وأنا
أسأل السؤال أمه تجاوبني ، اتكلم معاه أمه ترد عليا شوفتوا المصيبة والله
كنت هاسأل أمه :

هو الزرار اللي بيشفله فين؟ بس مسكت نفسي والمهم بقى إن (تانت) كانت
كأي أم حست إنه من واجيها تعرفني طباع إنها وعاداته وقالت لي :



- ابني بيحب يشرب شاي باللبن كل يوم الصبح .
ضحكت وفكرت ده على أساس إنه رايح المدرسة لأنني آخر مرة شربت فيها
شاي باللبن كان في إعدادي وقلت عادي يمكن بيحبه وكنت هاسألها بيحب
السيريلاك ولا لأ؟ علشان أبقى أعمل حسايي وأشتره .
فقالت :

- والحلبة بيشرها على الساعة ٥ كدا .
الكلمة بقى خرمت ودني ، قالت حلبة صح !! آه والله قالت حلبة ، ساعتها
بقى اضريت أعلق وقلت لها:

- إيه ؟ بتقولى إيه يا (تانت) حلبة ؟ اللي ريحتها بتطلع دي ؟؟ لأ كله إلا دي
مستحيل أدخلها بيتي .
ماما اللي ردت وقالت:

وماله يافاتن لو بيعها إبقى إعملها له .
ده في المشمش إن شاء الله
وكنت عايزة أسألها وبالنسبة للمغات بيعها إمتى ومسكت نفسى بالعافية
قوم إيه زودت بقى وقالت :

ابني بيحب البيضة تكون مسلوقة لمدة ٤ دقائق لو أكثر من كدا ميأكلهاش
والشاي تحطي الفتلة في الكوباية ٣ دقائق ونص بس وبعدين تشيلها .



إيه اللي بتقوليه ده يا حاجة؟ يعني أسلق البيض 4 دقائق والكلام الفاضي ده هأمسك معايا ستوب واتش جنب البوتاجاز؟ وشاي إيه اللي أسيب فيه الفتلة ٣ دقائق ونص هو أنا بأعمل مركب كيميائي ده شاي؟

أنا كنت لسه هاغلط والله وأقول لها مانشاء الله ما أكل بيض ولاشرب شاي فدخلت على الطبخ وبتقول :

أما بقى الطبخ فهو

لأ لحظة يا (تانت) بالراحة عليا شوية أنا هابقي مراته مش طبخة والحاجات دي بقى نبقي نكتشفها عن بعض على مهلنا.

لأ لازم تعرفي كل حاجة بيعهما من دلوقتي فيه أكل مش بيعبه ومستحيل يأكله يعني ممكن ميرضاش يأكل خالص لو عملتي حاجة مش بيعهما وينام زعلان .

قماص يعني زي العيال الصغيرة و.....

ماما حست بأني هاكمل بكلام لاذع فلحقتني ومسكت إيدي جامد لأنني كنت هالبخ فعلاً ، طبعاً مسكت لساني قامت طنط اللي هي حماتي قالت لي إيه؟

وهدومه لازم تكون مكوية على طول.

هو مش هايكويهم يا (تانت) !!

لأ ده واجبك انت .



أنا فضلت ماسكة لساني طول القعدة بس الرد طلع مني غضب عني والله
وقلت لها :

لما يتشل إن شاء الله هاكويهم له.

ماما جت لها كحة جامدة و (تانت) سألتني :

بتقولي إيه ؟

فحببت أصلح وقلت لها :

- بأقول إن شاء الله .

وكملت (تانت) وقالت:

ابني مش بيحب السمك خالص ياريت متبقيش تجيبي منه في البيت.

وأنا مالي يا تانت إذا كان بيحب السمك ولا لأ هو انت جاية برنامج عالم
المرأة وبتنقي تأكلي إيه ولا قاعدة في مطعم وبتختاري ، هو مينقيش ، هو
يأكل اللي هاعمله من غير ولاكلمة إن شاء الله بيض مقلي ، ده إيه فقعة
المرارة دي ، ياشيخة ده أنا استحملتك كثير، إحمدي ربنا إن ماما قاعدة
وإلا كنت قمت بهدلتك وعملت معاكي الواجب .

كل ده كان حوار في عقلى المشتعل طبعاً وأنا عمالة أسمعها وهى بتقول لي
قائمة الحاجات اللي ننوس عين أمه بيعها والشبشب يتحط فين وشارباته
معرفش فين وقاطعتها بقى لما فاض بيا :

ياتانت انت مش جاية تخطي واحدة من عند المخدم ولا بتجيبي فليبينية ده
جواز .



ما أنا عارفة إنه جواز أنا بأعمل كدا مع جوزي بالظبط .
دي انت وجوزك ، هو بقى لما يبقى جوزي هاننظم حياتنا زي ماننطق وإلا
إيه يا
بصيت عليه لقبته نام.

يادي النيلة هي الساعة جت ٩ ، ملحقتهش أتكلم معاه كدا ياتانت ، ضيعتي
فرصتي طيب كان يستنى أحكي له حدوتة قبل النوم .
أمه قالت لي :

ياريت توطي صوتك علشان هو ميصحاش .
تحي أجيب له غطاء ولا ننقله جوه على السرير أحسن .
وكنت لسه هاواصل بجملة طويلة لكن ماما قاطعتني طبعًا وهي بتقول:
قومي يافاتن هاتي عصير .
ماهم لسه شاربين عصير .
هاتي تاني قومي .

طبعًا من بصة ماما ليا عرفت إن الليلة دي أكيد فيها خناقة كبيرة فقامت
من سكات اعمل لهم عصير ورجعت وكانت ماما بتكلم طنط بشويش وهو
نايم فطبعًا إتغظت قمت رزعت الصينية جامد دلقت نص العصير وهو قام
مفزوع من النوم يا حرام وابتسمت ببلاهة وأنا بأعتذر ، كان لازم أصحيه
علشان نتكلم شوية هو أنا مخطوبة لمومياء ولا مخطوبة لأمه .



وبعدين غمزت لماما تأخذ الولية اللي قاعدة على قلبنا دي بعيد كنت عايزة اتكلم معاه شوية وأخذ عليه مش هايبقى جوزي المهم ماما أخذتها بحجة إنها هاتفرجها على قماش ستاير وأنا قعدت معاه فضل ساكت إتحنحت برضه ساكت وموطي زي ماهو ، كحيت برضه ولاحركة ، خبطت على التراييزة ماتهنش قلت أهزه ليكون مات ولا حاجة إتخض من هزتي وقلت ألحق أتكلم معاه قبل ماينام :

مش نتكلم كدا مع بعض شوية ؟
إتفضللي .

ياختي على كسوفه ده أنا البننت مش مكسوفة كدا قلت بقى أسأله شوية حاجات وبدأت :
انت ليك هوايات ؟
لأ .

إيه الرد المقتضب ده طب طول شوية في الحوار قول أي حاجة سألت:

طيب بتحب تعمل إيه في وقت فراغك؟
بأتفرج على التليفزيون .

فرحت بقى وقلت كويس بيتفرج على التليفزيون أكيد هانلاقي حاجة مشتركة وسألت :

بتحب بقى المسلسلات والأفلام وكدا؟
لأ بأتفرج على الأخبار والكورة .



الخير وتصبحوا على خير ده إذا قالهم ، بس كان مطيع بينزل يجيب لي الخضار من السوق ويشترى الطلبات وده آخره ، غير كدا مبيعلمش أي حاجة يرجع من الشغل يتغدي وينام وويقوم من النوم يفضل قدام التليفزيون زي التمثال يقلب في المحطات ، البلاعة تنسد أنا اللي أسلكها أي حاجة تنكسر أنا اللي أصلحها وأنا اللي أكلم السباك والنجار والمدرسين بتوع الأولاد وكان جوزي مسافر مثلاً أو ميت .

مش موجود في حياتنا ولما يكون قاعد معنا وإحنا بنتكلم ولا نهزر لا يشارك في أي حوار يجيب جرنال من أي حته حتى لو جرنال قديم عمره ١٠٠ سنة ويمسكه يقراه سطر سطر من الآخر مالوش دعوة بينا اللي كان مجني منه إنه مكانش بيحب يحلق دقنه ولا يغير هدومه أبداً أفضل أتحايل عليه بالكام يوم علشان يحلق ويغير هدومه بس على مين لاحياة لمن تنادي وكان فاضحني وسط القرايب والمعارف ومنها لله طنط زينب حسبي الله ونعم الوكيل.

سامح بقى كان تخصص مياتم يعني يموت في الهم والغم زي عينيه أي ميتم يجري يحضره على طول لكن الأفراح مش جوه إطلاقاً ، لأنه شخص كتيب بطبعه ومالوش في الأفراح ، لو لقاني أنا وأولادي بنتفرج على حاجة كوميدي يبص لنا بدهشة وكأننا مجانين وهو مستغرب قوي إحنا بنضحك ليه ويسأل:

انتو بتضحكوا على إيه ؟



انت مالك خليك في الغم بتاعك وسيبنا في حالنا.
زي مايكون عايزنا نقدر حالته النفسية اللي هو معيش نفسه فيها بدون مبرر
ونقعد نعيط جنبه ، ياعم روح عيش النكد براحتك وابعد عننا وكنت بأفرح
قوي لما يروح لأمه ولا حد من إخوانه .

بالنسبة للمصاريف بقى هو كان بيقبض ويجيب لي مرتبه وأحطه على مرتبي
وأنا اللي بأصرف هاتقولوا دي حاجة كويسة !! فعلاً كويسة بس المرتب
مكانش بيكفي وأنا اللي كنت بأتصرف أعمل جمعيات وأرتب أموري وهو
ساييني لايصة ومرة دفعت مصروفات ولادي في المدارس وأيامها مكانش
معانا فلوس وقلت له:

انت عارف أنا جبت الفلوس منين ؟

يرد ويقول لي :

ما أنا عارف إنك إتصرفتي .

ياراجل !! اتصرفت منين يعني؟ هو أنا مديرة البنك الأهلي ولا عندي حساب
حتى في البنك ؟ طيب اسألني جبتهم منين مش يمكن استلفت من حد ،
يمكن بعت حتة ذهب ، بعت حد من العيال ، لكن هو مسألش ولا بيسأل
ولاعمره هيسأل ، هو بيلاقى البيت مش ناقصه أي حاجة ومصاريف العيال
بتدفع وباجيب لهم طلباتهم ولا مرة فكر الفوس كفتني ولا لأ ولو مكنتش ست
مدبرة مكانش عرفنا نعيش ياللا ربنا مايحرمه مني .



أي راجل في الدنيا يحب ينقل لمراته الأخبار السعيدة المفرحة إلا الباز أفندي
بيجيب لي كل الأخبار المهببة مرة ينادي لي علشان عمارة وقعت في إسكندرية
ومرة تانية يبلغني إن فيه حريق حصل في مصنع راجل غريب جدًا يعشق
الأخبار السيئة ويموت في الكآبة ، في مرة كنت في المطبخ ومنهمكة في عمل
الأكل لقيته دخل على المطبخ مخضوض ووشه أصفر زي الليمونة وهو
بيقول بفرع :

إلحقى عارفة مين مات؟

اتخضيت طبعاً ووقعت اللي في إيدي وإتكسر وكان هايغى عليا أنا قلت حد
من قرابيننا ولا حاجة لقيته بيقول لي على ممثل أجنبي مات في حادثة ..
منك لله ، مايموت أنا مالي جاي تخضني علشان ممثل معروفش مات سببت
ركبي الله ينتقم منك أخرج من المطبخ أخرج وسيبني أشوف شغلي كان يوم
أسود.

كنت قاعدة بأذاكر للعيال وطبعاً خرجوني عن شعوري وعصبوني وبقيت
أتشال وأتهبد كدا زي القردة شيتا وصوتي جايب لأخر الشارع وهو قاعد في
مكانه المفضل يتفرج على التلفزيون وماتهزش سنتي واحد ولا حتى إلتفت لي
وفجأة لقيته وقف وقرب مننا قلت ده ناوي يشخط في العيال ولا حاجة
لقيته راح المطبخ عمل لنفسه شاي وخرج حطه قدامه وكمل فرجة على
التلفزيون وسابني اتفلق فقمتم له:



طيب أعمل منظر ، حسسنى بوجودك ، أشخط في العيال شخطة وزعق لهم.

ولا كأني قلت حاجة عليت صوتي عليه بقى:

إيه أنا مش بأكلمك العيال جننوني ومش راضيين يسمعوا الكلام قوم زعق لهم ولا اعمل حاجة.

هو قام فعلاً المرة دي وراح ناحية العيال وقال لهم لهدوء:

وبعدين معاكم مش تسمعوا كلام ماما ، عيب كدا .

ورجع تاني لكرسي العرش قدام التليفزيون ومسك كوباية الشاي وأنا وقفت وشي أحمر وضغطي ببعلى تدريجياً وحاولت أتكلم بدون عصبية وقلت له :

تصدق أنا خفت منك وكنت بأرتعش، ده أنا إنبهرت بقوة شخصيتك ياشيخ ، إيه اللي انت قولته ده ؟ هو ده اللي ربنا قدرك عليه ؟ ياريتك ماقت من

مكانك، قال جبتك يا عبد المعين، وقلت جملي المأثورة منك لله ياطنط زينب .

ومن ده كتير الطامة الكبرى بقى إنه ساعات كتر خيره كان ببعرض عليا المساعدة وأنا من عبطي كنت بأوافق كان بيهدل الدنيا يعني بيحى يكنس

ويلم التراب ألاقه موزعه حوالين الباسكت كله على الأرض، يحاول يغسل طبق يشطفه بمياه وبس ينشر غسيل ولا يلم غسيل يوقع نصفه في الشارع ،

يكوى لي حاجة يحرقها إلخ.



مرة كنت عيانة وراقدة دور برد تعبني شوية ودخل ينضف المطبخ وفضلت يوم ونص عيانة والحقيقة هو قام بشغل البيت بكل حماس ومن غير مايتكلم كالعادة وقمت من المرض وخرجت من أوضتي أبص على الشقة ظاهرياً هي كانت نظيفة نشوف بقى عمل إيه؟

لم الهدوم كلها في الدولاب بقوة الدفع بأفتح دولابي أجيب فوطة إنهارت الحاجات كلها فوقي وسألته:

إيه ياسامح انت مبتعرفش تطبق الهدوم؟

هو هز دماغه ماعرفش كان يقصد إيه بس هو إعتقد إني فهمت مش مهم ، ووطيت أَلَم الحاجات اللي وقعت وجات لي صدمة أنا قلت عيني جرى لها حاجة من المرض ، بسم الله الرحمن الرحيم، أنا ليه شايفة كل حاجة ملونة ؟

وفركت عنيه كام مرة، أبدأً والله كل حاجة ملونة أبيض وأحمر وأزرق وأخضر وفتحت الضلف وبصيت على باقي الهدوم والملايات لقيت كل حاجة فيها ألوان الطيف وجريت على أوضة العيال لقيت هدومهم بنفس الشكل فقلت له:

يا نهار إسود ، إيه ده؟ انت عملت إيه؟

غسلت الغسيل.

غسلته ولا وسخته؟

لقيته وقف ساكت شخطت فيه :



لأده مش وقت سكوت لازم تتكلم . غسلت إزاي؟ إنطق.

حطيته في الغسالة مع المسحوق وشغلتها.

حطيته كله مع بعضه في الغسالة ، كله كله من غير تصنيف ؟
أيوه .

أيوه إزاي ؟ أيوه إزاي ؟ يعني الملون على الأبيض مع اللي ببيته وهيصة !!
الهدوم باظت .

كنت هارقع بالصوت ، حد يجيب لي لطامة ألطم بيها الراجل بوظ لي كل
الفرش والهدوم منك لله ياطنط زينب.

دخلت بقى على المطبخ أفحصه أشوف الكوارث اللي عملها فيه برضه كان
نضيف ظاهرياً فتحت الثلاجة لقيتها فاضية تقريباً فسألته :
كان فيه هنا شوية رز في طبق وشوية فاصوليا راحوا فين؟
رميتهم .

نعم !! رميتهم !! رميت أكل من الثلاجة.

كانت زحمة على الفاضي وروقتها ورميت كل الحاجة اللي مالهاش لزوم.

لقيته رمى كل بواقى الأكل الموجودة بصيت له وأنا على آخري وقلت له:

تحب أقول لك إيه اللي مالوش لزوم عندي وعايذ يترمي ؟

بس مسكت نفسي والله وفتشت الضلف كمان علشان أشوف عمل إيه

لقيت الكوبايات ناقصة سألته :

باقي الكوبايات فين؟



همهم بحاجة مفهمتهاش زعقت له:

بتقول إيه مش سامعة؟

إتكسروا .

كسرت الكوبايات ياسامح؟

وشوية أطباق كمان .

شوية أطباق وإيه ده اللي في الحوض؟

هنا بقى تقريبًا كان ممكن يجي لي إنهيار عصبي الطاسة التيفال اللي ممنوع تحكها بحاجة معدنية لقيتها في الحوض منظرها شوارع والحفر فيها شمال ويمين بالطول والعرض لوحه منقرشة بكل شكل .

أنا فضلت على نغمة واحدة :

لأ لأ لأ كله إلا التيفال حسبي الله ونعم الوكيل فيكي يازينب .

وطبعًا منعته يدخل تاني المطبخ وكفاية عليه يدخل يعمل شاي زي ماهو متعود .

اللي خلاني بقى أطق من الغيظ إن الباز أفندي بقى اللي مبينطقش في البيت بكلمة وعامل زي خيال المائة رحت له مرة الشغل علشان آخذ منه فلوس وقعدت في مكتبه وعرفني بالزملاء بتوعه وبالزميلات وراح هو للمدير وسأبني معاهم لقيتهم بيشكروا فيه وقالوا :

ده سامح طيب جدًّا ومؤدب.



دي أنا عارفها هو فعلاً طيب ومؤدب وعمره ماجرحني بكلمة وواحدة تانية

قالت لي :

وخدوم قوي.

ودي برضه أنا عارفها لكن واحدة بقي ظريفة كدا قالت جملة غريبة جداً

عارفين قالت إيه ؟

قالت لي :

سامح دمه خفيف قوي .

عملت زي سميرغانم وسألتها بدهشة:

مين؟

سامح جوزي أنا دمه خفيف طب إزاي؟

إلا عمره ماقال نكتة ولاهزر معايا حتى هزار بايخ أفكره له ، ده أنا

مسمعتش ضحكته إطلاقاً وشفيت إبتسامته مرة واحدة بس وكانت يوم

الفرح لما المصوراتي قاله ابتسم ، لأ لأهم أكيد بيتكلموا على سامح تاني مش

سامح اللي أنا متجوزاه وعارفاه كويس مستحيل يكون هو أكيد أنا فاهمة

غلط ، بس عرفت هم بيقولوا كدا ليه ؟

لقيت اللي في المكتب باز أفندي تاني غير اللي معايا في البيت ، أنا معايا

مومياء محنطة من أيام الفراعنة لكن هنا لقيت بني آدم تاني وشخص

مختلف إختلافًا كليًا لازم أحكى لكم اللي حصل بالتفصيل واللي حصل

كالآتي :



زميلته كانت بتعمل لنا الشاي وتقول له أحط لك سكر قد إيه؟
إبتسم !! أه والله كان بيبتسم الابتسامة اللي مشفتهاش من يوم الفرح في
الاستوديو دي وقال لها :

كفاية تحطي صباغك فيه هايبقى مسكر.

ردت هي عليه وقالت له :

بس كدا هايبقى سكر زيادة .

وضحكت الزميلة العزيزة وضحك معاها تصوروا سمعت ضحكته والله
مايكذب الباز أفندي النكدي بيضحك وبصوت عالي ، طيب ماهو شغال
أهو ، أمال في البيت عندي عطلان ليه ؟ السوفت ويربتاعه مش شغال في
البيت خالص ليه؟ على طول صامت !وعلى وشه تكشيرة تقطع الخميرة من
البيت !!

فتحت بقي من المفاجأة وسألت نفسي:

مين ده؟ هو ده المومياء اللي أنا عايشة معاها ؟ مش معقول وفاجئني أكثر
وهي بتجيب لنا الشاي وسمعته بودني اللي هايأكلهم الدود وهو بيقول لها
برقة ومحتفظ بالابتسامة على وشه :

تسلم إيديك شكرًا.

شهقت بصوت عالي وكلهم بصوا لي وشرقت وبسرعة جابو لي مياه ، مكنتش
مصدقة نفسي ، بقى الباز أفندي اللي عمره ماقال لي كلمة حلوة ولا مجاملة
عليها القيمة ولاحتي كلمة شكرًا طلعت منه يقول الكلام ده لواحدة غريبة ،



الله طيب ما أنا أولى ياسامح تكلمني وتضحك في وشي ، أنا أحق بابتسامتك وضحكتك دي ، في البيت عاملى فيها الخرساء وفي الشغل لسانك منطلق ولا أحمد الحداد في دور الرغاية ، ماشاء الله كلام وضحك وإنبساط ماتوريني الحاجات دي أنا كمان ولا أنا ماليش نفس يعني والله لو عاملني كدا هاكون أسعد واحدة في العيلة مش في العالم لأنه برضه مش لقطه بس أهو حاجات نقدر نكمل بيها حياتنا مع بعض.

سألت نفسي هو ليه الراجل يببقى ذوق ومجامل ومتكلم بره البيت بس ؟ ليه بيبقى لطيف وظريف وكويت مع الستات بره البيت ؟ حد يعرف ؟ بس أنا إتغظت منه قوي وحلفت ماسيبه فضلت أسن في سناني لحد مارجع البيت ولما وصل إتفتحت فيه :

بقى انت مكشر على طول في البيت ومبتقولش كلمتين على بعض وعمرك ماضحكت في وشي ولا في وش ولادك وفي الشغل بسم الله ماشاء الله الابتسامه من الودن للودن والضحكة بترن ، لأ ولسانك بينقط سكر مع زميلاتك كلهم أنا فين من ده كله ؟ أنا مش مراتك وأولى بالمعاملة دي ؟

زمايلي في الشغل عايزاني أكشر في وشهم ؟

لأ اضحك في وشهم زي ما انت عايز بس توريني أنا كمان زهم ، أنا أحق منهم بكلامك الحلو وضحكتك وإبتسامتك ومجاملاتك.

وبعد ماسمعي بأقول كل اللي في نفسي بصلي بمنتهي البرود و بص للساعة وقاتلي لي بهدوء:



-
- أوعي من قدام التليفزيون علشان أتفرج على الأخبار.
- ياخواتي الرجل هايجنني وبعد كلام كتير وشكوى لأهلي ولأهله محدش
نصفني ولا وقف جنبي وقالوا لي:
- خليكي عايشة علشان ولادك يعني هايتكلم يقول لك إيه والنبي ده انت
مرتاحة.
- ده كفاية إنه مبيتحكمش فيكي وسايبك براحتك ، إحمدي ربنا.
- ضل راجل ولاضل حيطة .
- روجي ربي عيالك.
- وجمل زي دي كتير والي ضيعت نص ستات مصر وعشت زي كل الستات
معاه علشان خاطر عيالي عرفتوا بقى أنا ليه بأقول جوازتي قضاء وقدر ؟
وحسي الله ونعم الوكيل فيكي ياطنط زينب .



الفخ السابع الزوجة الأم

معاكم أخوكم عادل في فخ الزوجية ، أنا مراتي على فكرة ست زي الفل والله
، ست بيت شاطرة وأم فاضلة ومحافظة على بيتي وعيالي والبيت على طول
نضيف ومترتب وهدومي مغسولة ومكوية والولاد مذاكرين وعاملين الواجب
، يعني أنا عايش حياة رائعة من وجهة نظر كثير من الناس وفيه أصدقاء
كثير بيحسدوني عليها :

يا بختك ده انت عندك زوجة تتناقل بالذهب.

إحمد ربنا إنها ست بيت كويسة ده أنا مراتي لحد دلوقتي مبتعرفش تعمل
محشي.

مراتك معندهاش أخت اتجوزها الله يسترك .

ده انت متني والله حظك من السماء .

وكلام كثير من ده وفعلاً أنا في نعمة ومدرك وعارف كدا والله لكن واحد منهم

وأنا بقول له إني مش سعيد سألني :

مراتك بتطبخ كويس ؟

أيوه ، أستاذة في الطبخ والحلويات .

وبيتها نضيف ومترتب ؟



أيوه على طول نضيف .

ومهتمة بعمالك وبيك ؟

جدًا جدًا .

الله ماخالص ، بنشتكي ليه ؟ وتقول مش سعيد ليه بقى ؟ هو الراجل عايز إيه أكثر من كدا؟ ياريتني مكانك يا أخى ، انت تلاقيك بتخزي العين.

هو الراجل عايز إيه أكثر من كدا ؟ على فكرة الراجل بيبقى عايز أكثر من كدا أيوه هاتقولولي عايز إيه ؟ عايز زوجة ، أيوه عايز زوجة .

أنا مش حاسس بإنى متجوز خالص، أنا بس راجل عايش في البيت ، ببساطة شديدة لأن مراتي سلوى تحولت من زوجة لأم بقت صورة طبق الأصل من أمي وفجأة تحولت من زوجة في أواخر العشرينات لأم في أواخر الخمسينات ، أه والله ، كل كلامها عن شغل البيت والخضار والطبخ والغسيل .

والله باتكلم جد كل كلامها عن أسعار الخضار في السوق ، الصبح تتغدوا إيه ؟ بالليل تحضر العشاء ودايمًا تتفرج لي على برامج الطبخ وتتابع المسلسلات الهندي والتركي دي متعتها في الحياة .

تختفي ساعتين في المطبخ وتطلع لنا بصينية كيك معتبرة ولا فطير كل ده حلو قوي ورائع وفيه ناس كتير بتحسدني عليها طيب أنا فين بقى ؟

أنا كراجل وكزوج فين من ده كله ؟ فين إحتياجاتي أنا ومتطلباتي أنا ، المسألة مش أكل ولبس وبيت نضيف أنا عايز أعيش مع زوجة مش أم ، ما



أنا لو كنت عايز أفضل مع أمي مكنتش اتجوزت لكن أنا اتجوزت يبقى عايز زوجة ، ببساطة شديدة مش هاتفهموا اللي بأقوله غير لما أحكي لكم على حياتي مع أمي قصدي مع مراتي سلوى.

جوازنا كان قسمة ونصيب يعني لا حب ولا غيره وعجبتني وحبينا بعض ومحصلش بينا أي مشاكل ولا مرة لأنها زي الأم صبورة وبالها طويل ، بعد الجواز بفترة ولما بقى عندنا أولاد اتغيرت سلوى ٣٦٠ درجة ، وبعد ماكنت ست جميلة وشيك بقت حاجة مختلفة وتعمل دلوقتي اللي أمي بتعمله بس بعد ٤٠ سنة جواز يعني بعد اللبس الشيك والأنيق حتى داخل البيت بقت على طول لابسة مقفول ولبس واسع وشعرها بعد ماكان بيتعمل بالسيشوار وشكله جميل تحول إلى شكل هندسي ملفوف على هيئة شكل دائري اسمه كحكة ، وبتخاف على المصاريف ومعدش عندها أي حس بالرومانسية إطلاقاً وأصبحت كائن بيتوتي ملتصق بالبيت جداً ولا عايزة تروح في حته ولا تغير من نظام حياتها ولا تخرج ولا تتفصح ولا .. ولا

بقت تلبس حاجة كدا بيسموها العباية واسعة وطويلة ماعرفش مين اللي اخترعها منه لله وتلم شعرها وتغطيه بالبونيه برضه الشيء العجيب اللي مش فاهمه لحد دلوقتي وإحنا لسه صغيرين وجوازنا يعني يادوب مر عليه ٦ سنين وقلت لها كام مرة :

- انت لابسة كدا ليه ياسلوى ؟

- لأحسن حد بيعي وانت مش موجود وأبقى عايزة أفتح الباب.



- ياستي وأنا موجود هابقى أفتحه أنا ولا حد من العيال طيب قومي
إلبسي حاجة مريحة ومفتوحة شوية .
- ولما الباب يخبط بقى أجري أشوف ألبس إيه وأعطى شعري بلا حيرة.
- ياستي بأقول لك هافتحه أنا ، طيب مغطية شعرك ليه ؟ وريه لي أنا
نسيت شكله.
- ببحررني وبضايقتي وكمان بأخاف يقع في الأكل.
- واتكلمت معاها أكثر من مرة في إني عايزها تلبس حاجات شيك ومودرن في
البيت ، عايز أشوف مراتي يا جماعة حلوة وجميلة زي أول ماتجوزنا لكن كل
ما أكلمها يطلع منها شخصية الأم اللي طاغية عليها وعلى كل تصرفاتها
وتقول لي :
- خلاص بقى إحنا بقى عندنا عيال .
- يعني إيه عندنا عيال؟ مش فاهم هانبطل نعيش يعني ونستمتع
بالحياة إحنا لسه صغيرين ياسلوى .
- حاولت أرجع لها أيامنا الأولى في الجواز وقلت لها:
- فاكرة شهر العسل ياسلوى كانت أيام جميلة ، انت كنتي زي الحلم
بالنسبة لي .
- انت إيه اللي فكرك بالأيام دي ؟
- هي دي أيام تتنسي برضه كنا سعداء ومبسطين وبنهتم ببعض وأكدت
قوي على كلمة بنهتم ببعض ردت وقالت لي :



- آدي إحنا خدنا لنا يومين حلوين .
- مش بأقول لكم بتطلع منها الأم على طول بدأت اتضايق وقلت لها :
- انت محسساني إننا متجوزين بقالنا ٢٠ سنة.
- إحنا هانأخذ زمننا وزمن غيرنا ؟
- هي أمي ... والله ده كلام أمي بالحرف ، بس إمتي ؟ دلوقتي مش زمان ، أنا فاكرو إحنا صغيرين كانت أمي بتلبس كدا زي شادية في الأفلام وعمري ماشفتها في البيت بلبس نص نص ولا حاجة مدهولة وعلى طول شعرها معمول عند الكوافير وحاطة مكياج فرديت على سلوى وقلت لها:
- انت مالك كدا عايشة دور الست الكبيرة إسمعي خدي فلوس وروحي إعملي شعرك عند الكوافير وإشتري لك طقم جديد كدا و.....
- قاطعتني في ساعتها بإستنكار شديد وقالت:
- كوافير !! هانرمي فلوسنا على الأرض يا عادل !
- أنا عايزك تعمله و....
- نوفر فلوسنا لحاجة أفيد مش كدا ؟
- محاولاتي معاها كلها بائت بالفشل وأصبحت أعيش مع نموذج مصغر من أمي وبدون مبالغة لأنني ساعات بأحس إنها بتتعامل معايا وكأني واحد من العيال يعني تقول لي :



قوم خد دش، اغسل إيدك ، غير هدومك ، اغسل سنانك واحلق دقنك ، ماتكلمش على الأكل ، وطى صوتك إلخ وناقص تقول لي قوم اعمل الواجب وأدخل الحمام قبل ماتنام، مش بأقول لكم أم .
اللي ضايقني قوي منها إنها بعد ماخلفنا مبقتش تنده لي باسمي خالص بقت على طول بتقول لي :
يا أبومنة.

ماشى أنا فرحت لما بقيت أب وحلو إنها قالت لي فترة من فرحتها أبومنة !!
لكن اسمي بقى فين ؟ المفروض تنده لي بيه ، بأحب أسمعها منها لكن هي اتربت على كدا يعني طول اليوم:

تعالى يا أبومنة ، روح يا أبومنة وأنا أرد عليها أممنة .
ضاعت هويتنا تمامًا وبعد كدا بقت تقولي بابابا وأنا أقول لها ياماما ، بابا وماما ده إيه ؟ يعني بعد ماجبنا ولاد أنا بقيت مش موجود ؟ إيه الجوده ما كل واحد ينادي للتاني باسمه و برضه مفيش فايده مش عايزة تتنازل أبدًا عن إعتقادها بإن ده أفضل ، أمري لله .

الكائن البيتوتي الملتصق بالبيت اللي هي سلوى مراتي زي ماقلت لكم بتكره الخروج وكل تسليتها في البيت وكل خروجاتنا يادوب نزور أمى أو أمها وإذا حصل واتعزمتنا على فرح بأروح لوحدي في الغالب لأنها مبتحبش الدوشة ومهما اتكلمت معاها ثابتة على مبدأها.



يوم الخميس اللي فات كنت نايم يعني دخلت أريح بعد الغداء لقيتها دخلت الأوضة وقعدت جنبي وهزتني وقالت :

- عادل ... عادل.

- أيوه ياسلوى .

- قوم خرجني .

أنا بايني بأحلم وإلا إيه سلوى بتقول لي قوم خرجني طبعاً نطيت بسرعة قعدت على السرير وأنا هاموت من السعادة أخيراً مراتي حست بيا وعايزة تخرج معايا وبدأت أتخيل عبد الحليم وشادية في فيلم معبودة الجماهير وهم راكبين العجلة وبيغنوا" علشان احنا مع بعضينا" وسألتهما:

- عايزة تروحي فين؟

قمت بسرعة أفتح الدولاب وأطلع طقم شيك يا عالم هاخرج مع مراتي وكملت:

هاأخد دش في أقل من دقيقة وأكون جاهز ، تحبي ندخل سينما ولا أقولك تعالی أعزمك على أكل بره.

- إيه اللي بتقوله ده سينما إيه وأكل بره إيه؟

- أمال عايزة تروحي فين؟ إوعي تقولى نروح لأملك ؟

- لأ ... وديني المول عايزة أشتري شوية طلبات .

- نعم ياختي !! طلبات !!

- أيوه عايزة أشتري زيت ورزوصابون وشوية حاجات كدا .



امتأأت نفسي بالحسرة وجالى إحساس بالحزن وقلبت على أغنية راح راح
لعبد الحليم برضه ورجعت الطقم تانى للدولاب وشدتها قومتها من على
السرير بعنف ونمت تانى مكاني وأنا بأقول لها :

- كلمى حد من إخوانك ييجي معاكي وخذوا تاكسي يا أم منة .. قال طلبات
قال .

أنا غلبت معاها بقى نفسي تحس بيا وفضلت أحاول و لم أياس وفي ليلة
كدا قلت أما نخرج نشم شوية هواء ونغير جو فقلت لها :
بقولك إيه ياسلوى ماتيجي نخرج شوية نتمشى و
ومكملتش جملتي والله لأنها قاطعتني على طول ووقفتها في زوري وقالت:
لأ نخرج إيه ؟ خلينا مع العيال أحسن .

ياستي هم هايجصل لهم إيه يعني ؟ شوية وهايناموا قومي إلبسي ياشيخة
خلينا نشم نفسنا شوية.

شهقت وحطت إيد على إيد وقالت برضه بإستنكار زي المرة اللي فاتت بس
ده كان شديد شوية :

لأ ياخويا مايجيليش قلب نخرج من غيرهم.

الله هو إحنا هانسافر ياسلوى دي خروجة ساعة مش أكثر قومي بس أنا
نفسى أتكلم معاكي و.....

قاطعتني كأم وقالت :

أنا هاقوم ألبس العيال ونخرج مع بعض كلنا.



وأصرت إننا منخرجش من غير العيال ووافقنا مرغمًا المهم نخرج وخلص
وخرجنا إسألوني كدا عملنا إيه ؟ أقول لكم : كانت خروجة زي الزفت
العيال نكدوا علينا عياط وحناق طلبات مبتخلصش:

- شيلني بابا.

- بابا أنا عايزة حمام.

- هاتولي فشار .

- أنا عايزة أنام إلخ .

وقرفونا آخر قرف وباضت الخروجة ومن يومها حرمت أطلب منها نخرج
سواء لأنها كل مرة عايزة تأخذ العيال.

قررت يوم أريحها من الطبخ وقلت أجيب أكل من بره وطلبها قلت لها
متبخيش وطبعًا فتحت لي تحقيق:

ليه ؟ علشان إيه؟ أمال هانأكل إيه؟ ، وقلت لها بياني عامل لهم مفاجأة
ورحت مطعم وجبت لكل واحد مننا وجبة فراخ ورز وبطاطس ومعاهم
حاجة ساعة فيها حاجة دي ؟ غلظت أنا ؟

أي زوجة تتمنى إن جوزها يعزمها على الحاجات دي ويقول لها ريجي النهاردة
وأنا مرضيتش أخذها للمطعم لأنها أكيد كانت هاترفض كالعادة المهم أول
مافتحت لي الباب ولقت الأكياس في أيدي بدأت في اللوم والعتاب:

مممكن تقولى ليه قلت لي متبخيش النهاردة.

لأنني جايب لكم أكل من بره .



العيال هللوا من الفرح وهي بقي ظهر على وشها تعبير غريب جداً وإمتعاض
مش عارف سببه وقالت :

- أكل من بره أما مالکش حق وليه كدا؟ هو أكلي مش حلو ولا أنا ميعرفش
أطبخ؟

- ياستي والله أكلك حلو بس قلت النهاردة تغيير ياللا أقعدي كلي .

قعدنا على السفرة وفتحنا الأكل وأول كلمة قالتها:

- أنا والله مش عارفة إيه القرف اللي هاتأكلوه ده؟

- قرف !! الملائظ سعد ياسلوى.

- آه هو انت عارف العك ده أتطبخ إزاي ولا اللي عمله غسل إيديه ولا لأ؟

وعرفت طبعاً بأن زوجتي العزيزة هاتقرفنا على الأكل بس ولا عبرتها أهم
حاجة إن ولادي مبسوطين وقعدت وبدأت أكل وهي فضلت تبص لنا
باستغراب وقالت:

- والله الفراخ اللي بأعملها أحسن من دي ميت مرة وعلى الأقل أنضف

و

أضطريت أعلي صوتي عليها قبل ماتقلب القعدة لنكد وقلت لها:

- سلوى سيبينا نأكل ونستمتع من فضلك وبلاش تعكنني علينا وأهي مرة
ومش هاتتكرر .

- أنا مش هأكل من الحاجات دي.

- أحسن برضه كلوا يا أولاد ياللا.



دخلت الهانم للمطبخ وقلت بيض وجابت جبنة وعيش وبدأت تأكل وهي
لسه بتبص لنا بنفس بصة القرف وفجأة سألت:

- وإن شاء الله دفعت كام في الأكل؟
250 جنييه .

شهرقت بقوة وخبطت على صدرها جامد وقالت :

- يانهار أسود !! ٢٥٠ جنييه !!

- إسود ليه ياسلوى ؟ ليه ؟ حرام عليكي الحكاية كلها أكل جبتته نغير شوية
مرة في السنة هاتطفحينا اللقمة يعني ؟

- ده سفه ، تصرف ، ٢٥٠ جنييه على أكل وحش ده أنا اغديكم بالفلوس دي
٣ أيام ولا أربعة والله حرام عليك.

وفضلت تقطم فيا تقريبًا أسبوع وكل ماتحط الغداء تجيب تاني سيرة
الوجبة اللي جبتها والفلوس وطبعًا دي كانت بالنسبة لي آخر مرة أفكر أجيب
أكل من بره.

جه الصيف وكانت موجة حارة شديدة جدًا فاقترحت عليها نروح نصيف
فيها حاجة دي؟ وقلت لها:

- إيه رأيك نروح نصيف أسبوع في شرم الشيخ فيه شركات سياحة عاملة
عروض حلوة قوي و

مقاطعة كالعادة:

- وعلى إيه؟ إحنا نروح نقضي يوم في راس البر وخلص.



-
- بقولك نروح شرم الشيخ وأهو مكان لسه مشفنا هوش.
 - يا شيخ وعلى إيه المصاريف نوفر فلوسنا للعيال أحسن.
 - وهم العيال ناقصهم حاجة ياستي متقلقيش بأقول لك عروض كويسة وفرصة.

- الله هو انت غاوي شحططة وخلص ما راس البر هناك أهي ساعة ونص ونكون هناك ..

- لزمته إيه نطخ مشوار بعيد كدا ونشيل شنط وهدة حيل .
- فيه إيه يانينا الحاجة ؟ فيه إيه ياسلوى ؟ انت بتتكلمي زي أمي بالظبط .. ، إيش جاب راس البر لشرم الشيخ ؟

- هو يعني البحر اللي هنا مش هو اللي هناك ، أهو كله بحر واحد وشوية رمل إحنا نروح يوم الجمعة راس البر نقضي اليوم ونفرح العيال ونرجع .
حاولت أقنع فيها مفيش فايده دماغها أنشف من الحجر الصوان وصممت على راس البر وأنا من غيظي منها قلت لها :
- طيب والله ما أنا رايح في أي حتة ، خلينا هنا في الحر .
تفتكروا زعلت ولا اتأثرت ؟ إطلاقاً دي سلوى اللي عايشة في الزمن البعيد ،
بالعكس فرحت وقالت :

أحسن والله خلينا في بيتنا من خرج من داره اتقل مقداره .
كدا بقى مبقتش زي أمي لأ دي تحولت إلى جدتي .



بالرغم من كل الحاجات اللي كانت بتضايقني منها برضه فضل عندي أمل ولم أياس وحاولت معاها إنها تزحزح من البيت وتغير العادات الغربية بتاعة أمي وجدتي لكن مقدرتش عليها وقلت أتغاضى عن الحاجات دي هم يعني كل الناس بيتفسحوا ويبخرجوا مش ضرورى نخرج ولا نتفسح خرينا نخلل في البيت، اللي أزعجني بقى إهمالها ليا تمامًا بقيت كأني مش موجود أنا باشتغل وأجيب فلوس وفي البيت بابا وخلص ونسيت إني زوج ولي زوجة بالذمة ده ينفع ؟

في ليلة بقى أنا كنت قاعد قدام التلفزيون وفكرت باني أقضي معاها وقت خاص بقالنا فترة بعيد عن بعض وهي خلصت شغل المطبخ وخرجت تتفرج معايا وأنا قلت ده وقت مناسب أتقرب منها وحشتني وقعدت جنبها وسألتها بصوت عاطفي :

- هم الولاد ناموا ؟
- أه ناموا بعد ماطلعوا روجي بشقاوتهم .
- طيب عايزين نقعد مع بعض شوية.
- ماحنا قاعدين مع بعض أهو .
- لقيت الفكرة ماوصلتش فقربت منها وإستعرت جملة عادل إمام علشان تفهم أنا عايز إيه وقلت لها وأنا بأضحك:
- ماتيجي نشرب شاي ؟
- طبعا مفهمتش ووقفت بهمة الأم وهي بتقول:



-
- عايز شاي؟ هاعمل لك حالاً.
- لأ شاي إيه مش قصدي أنا كنت أقصد ..
- جريت طبعاً على المطبخ قبل ما أكمل كلامي وراحت تعمل لي كوباية الشاي ولما رجعت بيها ابتسمت لها وقلت لها:
- تسلم إيدك أقعدي جنبي بقي.
- قعدت جنبي ومسكت ريموت التلفزيون وقلبت في القنوات لحد ماجابت مسلسل تركي متابعاه وقعدت تتفرج وأنا خلصت كوباية الشاي وانتظرت الفاصل الإعلاني وقربت منها شوية ومسكت إيدها بحنية إلتفتت لي وسألت:
- عايز حاجة ؟
- ابتسمت إبتسامة خاصة و بصيت لها بعاطفة وسبلت عنيه وغمزت بعيني فقالت بقلق:
- مالك يا عادل انت عينك تعبانة ؟
- لأ ياستي عيني مش تعبانة أنا كنت عايز.....
- إستنى الإعلانات خلصت.
- وكملت متابعة مسلسلهما وهي عمالة تحكى لي :
- البطل أصله إتحانق مع حبيبته وسافرت وعمال بيدور عليها في كل حته يا عيني.
- مايتخانقوا ولا يتفلقوا هم كانوا من بقية قرايبنا.
- أسكت بقي علشان أسمع.



- سبت إيدها طبعًا و كتمت غيظي وقلت أستنى لما المسلسل يخلص وبعد ساعة فرجة وأنا قاعد جنبها زي العبيط مش فاهم حاجة في مسلسلها البايخ ده لقيته مش بيخلص فسألتهما:
- هو المسلسل ده طويل كدا ليه ؟
 - أصل ده تجميع لحلقات الأسبوع.
 - والله !! تجميع آه ده انت سهرتك طويلة بقى ؟
 - اتاوت ومسكت إيدها تاني برضه بحنية وقلت لها :
 - ماتيجي ننام أحسن بلا مسلسل بلا بتاع.
 - لو عايز تنام قوم انت أنا هاكمل المسلسل دي الفرصة الوحيدة اللي بأقدر أشوفه فيها.
 - يخربيت كدا ، كل ده ومفهمتش أي حاجة طيب أعمل إيه؟ أقوم أظفي التليفزيون يعني ؟ وكنت فعلاً هاعمل كدا والله بس قلت بلاش أنكد عليها وقلت:
 - أنام !! لأ خليني قاعد معاكي .
 - فضلت مركزة مع المسلسل قوي وكل شوية تعلق عليه وقالت :
 - شوف دي هازال.
 - هازال مين ؟
 - أخت البطلة كمال بيحبها وهيموت عليها.
 - كمال !!



- آه زميلها في الشغل وهي مش حاسة بيه خالص يا عيني شوف شوف
بيبص لها إزاي إفهمي بقى يابت ، أنا مش عارفة هي مش فاهمة إزاي إنه
بيحبها ، إيه مش بتحس؟.

بصيت على سلوى مراتي وأنا مليون غيظ كنت عايز أقول لها قولي لنفسك
لكن قلت لها:

- فعلاً باردة ومش بتحس ولا بتفهم، البعيدة جبلة ياسلوى .

- هي لو كانت بتفهم كانت خدت بالها على الأقل من نظراته ومن حنيته
ولمسه إيده بت غبية.

بصت لإيدها اللي في إيدي بقالها ساعة وقلت :

- فعلاً غبية ياسلوى .

لما لقيتها مش فاهمة حاجة قررت أجيها لها صريحة بقى وقلت:

-بأقولك كنت عايز.....

قاطعتني تاني وهي بتقول :

- إستنى لما أكمل المسلسل بقى .

فضلت تعلق لي على المسلسل وأنا طبعاً مش فاهم حاجة وفضل المسلسل
شغال ساعتين وأكثر ومش راضي يخلص وأنا محسيتش بنفسي ونمت على
الكنبة جنبها وفجأة صحيت على صوتها وهي بتصحيني :

- أبومنة ... أبومنة.



يقطع أبو منة وسنين أبو منة قولي عادل حرام عليكي فتحت عيني لقيتها
طافية التليفزيون ومنورة السهاري وبتقول:

- قوم نام جوة يأبو منة أحسن ضهرك يوجعك.
- المسلسل خلص.

- أه خلص من شوية .

- ومصحتنيش ليه لما خلص ؟ هي الساعة كام دلوقتي ؟
- الساعة بقت ٢ .

رميتها بنظرة غاضبة ووقفت وقلت لها وأنا بأكتم جوايا :
!! 2 -

طبعاً عضمي وجعني من النوم على الكنبه وأنا قاعد ورقبتي إتخشبت
ولقيتها بتقول لي :

- كنت عايز إيه بقى ؟

- أنا !!

كنت عايز امسكها من رقبتها وأخنقها والله ورننت في وداني أغنية عبد
الحليم بعد إيه بعد إيه ؟ وقلت لها بإحباط:

- مش عايز أي حاجة خلاص ، نفسي إتسدت ، تصبجي على خيريا أم منة .
- وانت من أهله يا أبو منة .

أهي دي مشكلتي مع أم منة ، نسيت إنها زوجة وبقت ست بيت وأم بس وأنا
ولا كأني موجود، هو أنا برضه مش ليا حق علمها والمفروض تهتم بيا



وتراعييني زي مابتهتم بالولاد وتراعيهم وتخصص لي وقت برضه ولما قلت لها
ردت وقالت لي :

- انت هاتغير من ولادك يا أبومنة ؟
- معدتيش تقولي أبومنة دي تاني أنا ليا اسم ناديني باسمي .
- الله انت جرى لك إيه ياراجل إتجننت ولا إيه ؟
- إتجننت علشان عايزك تناديني باسمي ؟
- هو فيه أحلى من إني أناديك بإسم ولادك ياأبومنة ؟
- تاني بتقولها تاني هو خلاص بعد ماجبنا العيلين مبقاليش وجود في
حياتك ، كل يومك في شغل البيت ومع العيال وأنا فين من ده كله ؟ فين
الوقت اللي بتخصصيه ليا أنا ؟ فين إهتمامك بيا ؟
- هو أنا قصرت معاك في حاجة؟
- أيوه مقصرة في حقي ياسلوى .
- طبعا هي إتترفزت ووقفزت لي متحفزة وقالت بغضب وإيدها في وسطها :
- ليه بقى إن شاء الله؟ جيت مرة لقيتني مطبختتش، ولا هدومك مكانتش
مغسولة ومكوية ، دخلت البيت لقيته مش نضيف ولا مكركب .
- هو الجواز بس أكل وهدوم نضيفه وترتيب بيت؟
- انت عايز إيه أكثر من كدا؟



لما تتكلم مع واحدة بالعقلية دي هاتقدر تقنعها إزاي هي إتربت على كدا إن طالما بيتمها نضيف وعاملة أكل وقايمة بأعمالها كما ينبغي يبقى خلاص كدا دورها انتهى بس أنا مسكتش وقلت لها:

- عايز زوجة ياسلوى ، زووووووووووجة .

- زوجة !! امال أنا إيه؟

- انتي ست زي الفل مباحولش حاجة ، بس نسيتي نفسك ونسيتيني وكدا مينفعش .

- عايزني أعمل لك إيه يعني؟ ده أنا طول النهار واقفة على رجلي بأشغل والبيت مش ناقصه أي حاجة والعيال زي الفل و ..

وغلبتها دموعها طبعًا ومقدرتش تكمل كلام وعيظت وصعبت عليا وصالحتها وماتكلمتش معاها تاني في الموضوع ده .

وعلشان أحافظ على بيتي وحياتي معاها سكت بس تفتكروا دلوقتي لو إتجوزت أبقى غلطان ؟

شوفوا لى واحدة بنت حلال تهتم بيا وتعاملني على إني زوج مش أبو العيال وبس .



الفخ الثامن

بنت أمها "رويدر"

مراتي من يوم ما اتجوزنا وهي تقريبًا بتزورني في وقت فراغها والله ، ليه؟ لأنها مرتبطة ببيت أهلها إرتباط مش عادي ومبالغ فيه جدًا ، على طول عند مامتها وبتيجي لي البيت زيارات ، أحنا مش منفصلين لأ متجوزين بس هي مرتبطة بأهلها جدًا وخصوصًا أمها وحتى لما بتبقى في البيت بتكلم مامتها في التليفون، في البداية قلت ماشي مفيش مشكلة عندي إحنا متجوزين جديد وهي لسه حاسة بالغربة ومش واحدة على العيشة في بيتنا الجديد و كل البنات بتبقى مرتبطة بأمهاتها وهي بتحب مامتها وده شيء عادي جدًا جدًا لكن من يوم ما اتجوزنا مأكلتش من إيدها ولا مرة والمصحف ما طبخت حاجة لأننا يوميًا بنأكل عند أمها بعد الجواز كانت مامتها زي ماهو معروف في العادات الأسرية بتطبخ لنا أكل وتبعته وبعد ما انتهت المدة دي وخلص رجعت شغلي وأنا متلهف بقى إني أكل من إيد مراتي ، الاقيها بتكلمني في الشغل وتقول لي :

- عدي عليا بعد الشغل عند ماما علشان هانتغدي عندها .

- النهاردة هاقضي اليوم عند ماما.

- إعمل حسابك نبات الليلة عند ماما .. إلخ



حسيت بأني مش متجوز سهاًم لوحدها لأ ده أنا واخذ أمها وأهلها معاها
كمان وبقوا حدث يومي في حياتنا ومفيش يوم بيعدي علينا من غير مانكون
زرنا الست الوالدة وقعدنا معاها ملناش حياة خاصة بينا وطلبت منها كتير
تقلل زياراتها لمامتها تزعل وتقولي :

- انت هاتمنعني عن ماما.

- طبعاً لأ بس كدا كتير إحنا من يوم ما اتجوزنا ماأكلناش كام مرة على
بعض في البيت حاولي تحبي بيتك الجديد وتقعدي فيه شوية مينفعش كدا .
بس فضل الحال على ماهو عليه وإذا رفضت أروح معاها بيت مامتها
تسيبني في البيت لوحدي وتروح هي واللي زاد وغطى بقى في أول حمل كانت
متدلعة على الآخر وراحت إقامة كاملة عند أمها طوال شهور الحمل وبقيت
أروح عندهم مش قاعد واخذ راحتي ولا عارف أكل و كنت بأحس بالإحراج
طبعاً وحماي يسيبني ويدخل ينام بعد الغداء وأفضل أنا قاعد كدا قعدة
بايخة ملهاش طعم يا إما أروح أقعد في شقتي لوحدي زي الغلبان وإذا جعت
اعمل لنفسى سندويتش جبنة وخلص وكأني عازب وطبعاً ما كنت أقدر
أروح لأمي لأنها كانت هاتقول لي :

مش قادر على مراتك وسايها على مزاجها.

وأنا مش ناقص كلام من حد لأن اللي فيا مكفيني والله ، ورجعت تاني
أغسل هدومي وأعمل أكل لنفسى والهانم عايشة في بيت أهلها بسبب
الطفل ياللا أهي فترة وعدت وأنا قلت بقى أكيد هاتعقل وتفضل في بيتنا



بعد ما بقت أم ، شفتوا الأمل والله ماتحقق لأن فترة الحمل اللي خلصت لكن
جت بعدها فترة تانية خالص " المولود وفضلت برضه عند أمها .

: أنا مش عارفة أعمل إيه مع النونو ، لازم ماما تبقى معايا يا حسام .
طيب خلمها تيجي تقعد هنا .

مينفعش متقدرش تسيب بابا .

أه يعني هي متقدرش تسيب بابا لكن انتي تقدري تسبي جوزك مش كذا؟
هو حد في بيت ماما زعلك ولا قال لك حاجة؟

لأ بس أنا مش واخد راحتي ياسهام ، بيت أهلك مش بيتي ، انا عايز آخذ
راحتي وأفضل في بيتي .

قربت مني ومسكت إيدي بحب وقلت كلامي جاب نتيجة أخيرا و خلاص
هاترجع معايا البيت قامت قالت لي :

خلاص خليك في شقتنا وإبقى تعالى كل يوم أقعد معنا شوية .

يا عالم هاطق ، هافرقع ، هو أنا متجوز علشان أقعد في بيت أهل مراتي ؟
عمومًا مش هاتكلم كتير عن الحكاية دي لأن صوتي اتنيح معاها وملقتش
أي استجابة منها وقلت برضه عادي أول مرة تبقى مسئولة عن طفل
وطبيعي تحتاج لأمها جنبها .

اللي مش عادي بقى ولا يمكن السكوت عليه شيء مزعج جدًا اكتشفته عنها
إنها مبيتبلس في بقها فولة يعني كل حياتي عند أمها ، حتى أدق أدق



الخصوصيات بتتحكي في بيت أهلها كل حاجة بتحصل بتتنقل فورًا وتحولت حياتنا لبث مباشر على الهواء لأمها في البيت وتكلمها في التلفون :
ماما حسام دخل ينام ، ماما حسام دخل يأخذ دش ، ماما حسام بينام وهو قاعد ، ماما حسام زعق لي ، ماما حسام حسام حسام.
الله يحرق حسام على اليوم اللي إتجوز فيه حسام ، بتحكي لأمها وأخواتها كل حاجة ، بتسألوا كل حاجة اللي هي إيه ؟
هو أنا معنديش أسرار بس فيه حاجات تتحكي وحاجات متتحكيش لكن أدق أسرارنا بلاقي حماتي عارفها وأنا أول مرة عرفت الموضوع ده وأنا في زيارة لمراتي في بيت أهلها وقعدت الست حماتي معايا ولقيتها بتقول لي إيه بقى :
انت إزاي يا بني مبتلبسش فانلات وكلاسين ؟
أفندم !!

ده عمك الحاج بيلبسهم على طول تحت الهدوم .
أنا طبعًا معرفتش أرد وبصيت لمراتي بدهشة واتصدمت ليه بتقولي لأملك إني مش بألبس فانلات ، هي أمك يهملها إيه في معلومة زي دي؟ وبعدين هي مالها ألبس فانلات ولا لأ؟ أنا حر .
هاتقولولي عادي وبلاش مبالغة ماشي عادي ، شوفوا اللي جاي بقى بعد ما رجعت سهام لبيتنا وهي على مضض مش علشان سمعت كلامي إطلاقًا أنا كلامي كله بيمرقدام ودانها مرور الكرام لابتسمعه ولا بتعبرني من أصله ، لأ هي أضطرت ترجع لأنها سلمت بيت أمها لأختها الثانية اللي كانت حامل



ورايحة تقيم في بيت أمها زي ماهم متعودين والحمد لله عادتهم دي جت
بفايدة بالنسبة لي لأنهم خلوها ترجع البيت وتلم فيه شوية بقى، وأخيرًا
حسيت بأني راجل متجوز بيتي مقفول على مراتي وابني معايا ، وهى بتطبخ لي
الأكل وأنا قاعد براحتي بقى أنام أقعد أفتح التلفزيون أقلب في المحطات
أنا حر.

زارتنا حماتي وبناتها وأزواجهم وجم يسلموا على سهام وكأنها جاية من
السعودية مثلاً مش لسه سايباهم من يومين إثنين بس أو كأنها عايشة في
بلاد الغربية وحمايا مسك ريموت التلفزيون وأنا بأتفرج على برنامج بأحب
أتابعه وقلب المحطة طبعًا من غير مايقول أي حاجة كالعادة ، منتهى قلة
الذوق كمان في بيتي هاتعمل اللي انت عايزه .. المهم كتمت غيظي وقلت
معلش ضيوفي برضه وسابتنا سهام ودخلت ترضع الولد واناخرت دخلت
أمها تشوفها لقتها نايمة جنبه وفضلوا هم قاعدين معايا لحد ماتصحى ،
فاجئتنى حماتي العزيزة وقالت:

راحت في النوم أصلها مبتعرفش تنام طول الليل.

قلت لها بسلامة نية:

آه علشان الولد و

قاطعتني حماتي وقالت :

لأ مش الولد هي مبتعرفش تنام من شخبرك يا حبيبي .



أنا حسيت بأن وشي طلع صهد وقبل ما أتكلم ولا أحاول أبلع الكلمة قالت
أخت مراتي :

أه ماهي قالت لي إن شخيره بيبقى جايب لآخر الشارع.
وردت حماتي :

ماتروح تكشف يا حسام وتشوف لك حل البت مبتعرفش تنام .
هنا بقى فهمت حجم المصيبة اللي أنا عايشها ، مراتي الغالية سهام
فاضحاني وبتروح تحكي كل حاجة لأمها وأخواتها وكملت حماتي كلامها وأنا
بقيت في نص هدومي وقالت وهي بتضحك :

لأ وكمان بيرفص الغطاء زي العيال الصغيرة.
وانطلقوا في الضحك كلهم:

هي هي هي هي .

وكأنهم سمعوا نكتة وأنا كنت بحاول أمسك نفسي ، لا والله ده انتوا خفة
قوي وفكرت بياني لازم أحاسب سهام على كدا بس ما أنا حاولت معاها طيب
قولوا لي أعمل فيها إيه ؟ مراتي اللي عاملة زي الحنفية اللي ملهاش جلدة و
بتقول كل حاجة دي ، يعني أضربها وإلا أولع فيها ، أروح أخنقها وأرتاح
وغلبت فيها ومفيش فايذة ومرة بقى فاض بيا فقلت لها :

ياسهام دي أسرار ميصحش تحكي كل حاجة لماما.

وهي ماما غريبة يا حسام؟



دي حياة فيها خصوصيات لازم تبقى بين الزوجين وبس ، مش مشاع والكل يبقى عارفها واللي يحصل بينا مش لازم أي حد يعرفه سامعة أي حد.

حتى ماما !!

خصوصًا أمك ، دي بالذات مش لازم تعرف عننا أي حاجة.

وقلت كتير وزعقت وطلعت اللي جوايا إيه اللي حصل بقى ؟

أقول لكم أنا اللي حصل، بعدها بساعة واحدة بالظبط يعني مسافة المواصلات من بيتها لبيتي ، حماتي عملت علينا كبسة وجاية زعلانة مني

ووشها مقلوب على الآخر وفضلت تعاتبني ساعة وتلوم فيا :

ملكش حق يا بني أبدًا ، هو ده اسمه كلام ، والله زعلت منك قوي ..

وأنا مش فاهم حاجة وحاولت أعرف بالظبط إيه الموضوع ؟ وبعدين عرفت الحلوة مراتي حكّت لها اللي قلته لها بالحرف الواحد ، مش قلت لكم بث مباشر وطبعًا حماتي زعلانة لأنّي إعتبرتها غريبة.

- هي لحقت تحكي لك وإلا انتم مركبين كاميرا في الشقة ؟ هي فين؟ هي فين؟

- هي إيه يا بني؟

- الكاميرا اللي بتراقبوا بيها حياتي ، كل حاجة بتوصل لكم إزاي ؟ انتوا

حاطين جهاز تصنت صح ؟

- مش عايز بنتي تحكي لي ليه ؟ أهي بتفضفض.

- لأ يا حماتي دي مش فضفضة لما الست تقول أسرار جوزها لأي حد يبقى

مش فضفضة.



وكانت مشكلة كبيرة وخاصمتها كام يوم يمكن تتعدل لكن مستحيل ، ده طبع مستحيل تغيره وفضلت على وضعها تحكي كل حاجة لأمها بدون فلتر .
المرّة الأخيرة بقى اللي جابت آخري معاهم إن في يوم إتصلت بيا اختي وطلبت مني أسلفها مبلغ محتاجاه ضروري وده شىء عادي يعني مفيش مشكلة في إنني أساعد أختي لما تكون في أزمة ورحبت وجهزت لها ٥٠٠٠ جنيه كنت حاططهم على جنب لأى ظرف و بسلامة نيتي وبلساني اللي عايز يتقطع قلت لمراتي :

أنا نازل رايح لأختي ؟

ليه ؟ فيه حاجة ؟

أه هاودي لها فلوس .

فلوس إيه ؟

طلبت مني سلفة وقلت أديها اللي معايا وتبقى تردهم في أي وقت .
ونزلت رحت لأختي وأنا مش واخذ خوانة والله ورجعت لقيت رويتر الكبيرة اللي هي حماتي عندنا هي وحمايا وناصبين لي محكمة ، ليه ؟
لأن رويتر الصغيرة اللي هي مراتي بلغتها أول مانزلت على طول بأنى هاسلف فلوس لأختي ..

أنا دخلت شقتي بس وعنيكم ماتشوف إلا النور ، حماتي نزلت في زعيق ولوم وتسلف أختك ليه؟ ماهي جوزها ماشاء الله ، دي فلوسك وبنتي أولى بيهاإلخ وفضلت تهاتي وتزعق وأنا ساكت وماسك نفسي لحد ماقلت :



هو أنا غريبة؟

المرة دي مقدرتش أستحمل بقى لازم أرد وقربت من حماتي وأنا كلي غضب
والست خافت وبقت ترجع لورا و انفجرت فيها :

أيوه انت غريبة ، بالنسبة لي ست غريبة ومينفعش اللي بتقوليه أو بتعمليه.
وهو أنا عملت إيه يابني ؟

أبدًا !! انتِ بتعملي حاجة ؟ ده ما فيش حد في العيلة ميعرفش إني بأشخر
وعندي إمساك وبأرفص الغطاء ، كل حياتي منتشرة بسببك وبسبب لسانك
انتِ وبتنك والله أعلم بتحكي لمين تاني ؟

انتِ ست مش عاقلة وبتنك طالعة زيك بدل ماتعقلها وتقولي لها متطلعش
أسرار جوزها بره بتشجعها وتسمعي لها ، لأ مش كدا وبس ، ده انتِ كمان
بتساعدنها وبتنشري الأسرار في العيلة كلها وفضحتوني تحيي أعمل زيك ،
قولي لي آخر مرة جوزك باسك كانت إمتى ؟

شهقت حماتي طبعًا وقالت:

يادي العيبة ! إيه اللي بتقوله ده ؟

طيب علاقتك معاه عاملة إزاي ولا انتوا عديتوا المرحلة دي وكل واحد بينام
لوحد.

بصلى حمايا بإستنكار ووقف وقال:

عيب يابني اللي بتقوله ده.



يعني عيب مني ومش عيب منكم ، مش عيب لما تعرفوا أسراري كلها
والحاجات الخاصة اللي المفروض مفيش مخلوق يعرفها ، وبتعرفوها من
مين ؟ من رويتر ، اللي ربيتوها على إنها تنقل لكم كل صغيرة وكبيرة بالحرف
سواء يصح ولا ميصحش ، ياناس فيه حاجة اسمها أسرار ولا هم عملوا
بيوت بجدران ليه؟ ماكنا كلنا نعيش مع بعض في مكان مفتوح وخالص
ونعرف كل حاجة عن بعض، العيب هو اللي عملتوه معايا ، ده أنا كل حاجة
بتحصل في بيتي بنتكم بتقولها فورًا ، شوفوا بقى أنا هاجيب من الآخر، وفيه
شوية قرارات تسمعوها مني وتنفذوها يا إما مش هيحصل طيب ، سهام
هاتزوركم يوم واحد بس في الأسبوع ..

رويتر اعترضت وقالت :

إيه مرة واحدة ؟

أيوه يارويتر مرة واحدة بس ، انت متجوزة وليكي بيت ولازم تعيشي فيه
وانتوا كمان نفس الشيء تزورونا مرة واحدة في الأسبوع وتتصلوا بالتليفون
قبل ماتيجوا.

شهقت حماتي وقالت:

نتصل أما مالكش حق هو إحنا

نطيت زي الضفدع من الغضب وزعقت فيها:

إوعي تقولها تاني لأرتكب جريمة دلوقتي .

أنا عارف كانت هاتقول إيه؟ طبعًا زي كل مرة هو أنا غريبة ؟



هم إتخضوا مني ومن حركاتي اللولبية الغاضبة بس أنا ولاهمني وكملت
كلامي:

مفيش بيات عندكم إطلاقًا ومن النهاردة هانعيش ونأكل في بيتنا مش كل
يوم والثاني تعالي خدني من عند ماما والكلام الفاضي ده ولما تحبوا تعزمونا
تكلموني أنا وأنا اللي أقرر أقبل العزومة ولا لأ ، مش كل مرة هي تبلغني
وتحطني قدام الأمر الواقع ، والموبايل بتاعك يهانم هاحط عليه باس ورد
أنا اللي هافتحه لك ومكالمتك مع ماما أو أي حد من إخوانك تتم قدامي
مفهوم ؟

طبعا سهام كانت عايزة تعترض :

بس يا

وكمان لما نكون عندهم تفضلي قاعدة جنبي متنقليلش من مكانك غير لو
رايحة الحمام لأنني ماقدرش أسيبك دقيقة من غير ماتكلمي وتحكي حياتي
لأني حد فيهم.

- إيه اللي بتقوله ده ؟ انت هاتحبس حريتي؟ أنا مش متعودة على كدا.

- تتعودي يارويتر .

- طيب أوعدك باني.....

- ماتوعديش علشان انت وعدتي قبل كدا ومهما عملي مش هاغير أي قرار
من اللي اخدتهم.

- بس كدا ظلم وكثير قوي و



-
- لومش عاجبك اللي بأقوله هاتروحي معاهم وننهي المهزلة دي .
وبصيت لحمايا وحماتي وكملت:
- إذا سهام حكيت لكم أي حاجة تانية تخصني قسماً بالله لأطلقها ، قلت
إيه؟
- طبعاً محدش رد عليا منهم بدمتكم أنا معايا حق ولا لأ؟ حد يقول لي إذا
كنت غلطان .



الفخ التاسع

مراتي عنيفة ومتسلطة

الست بطبيعتها بتكون حنونة ورقيقة وبتحتوي الراجل دايمًا سواء كان والدها أو أخوها فمابالكم بقى بالزوج ، لازم يكون له معاملة خاصة لأنه هو شريكها في الحياة وبيكون معاها أسرة وطبيعي تكون حنينة معاها وعطوفة لكن فيه بعض الزوجات بيبقى حنانها وحبها كله لأهلها وأخواتها وبس وبتحرم جوزها من عطفها وحنانها وساعتها الراجل بيبقى مسكين محتاج للحب ، علشان كذا الزوجة لازم تكون سكن لجوزها ووطن وتكون له زوجة حنونة وتغمره بعطفها وحنيتها ، الكلام ده كله جميل وحلو قوي في الخيال وبس لأنه على أرض الواقع مش موجود أو نادر الحدوث وأنا من موقعي هذا أؤكد لكم بأن مش كل الستات حنينة ليه ؟ لأن مراتي عكس الكلام ده كله ، وهي بعيدة كل البعد عن أي حاجة من المكتوب فوق ، عدوة المشاعر والكلام الحلو ، لاتعرف شئ عن الحب والعطف والحنية مش معايا أنا وبس لأ مش أولادنا كمان ، عمري ماسمعت منها كلمة حلوة ولاشفت منها حنية على طول بتزعق وتشخط على أقل حاجة ومبيعجهاش العجب ، من الآخر محدش بيعرف يتكلم معاها ولا حتى أنا، تعالوا بقى وإعرفوا حكايتي .



أنا عادل ومراتي عفاف جوازنا بقاله ١٠ سنين أنا مش حاسس بإنني متجوز واحدة ست ، حاسس إنني متجوز أبلة الناظرة ولا لواء في الجيش مش بأبالغ ولاظالمها محدش يتسرع في حكمه غير لما يعرف اللي بتعمله فيا أنا والولاد. مشكلتي مع مراتي إنها شديدة جدًّا ومتحكمة وعصبية وده شيء بيخليني على طول متوتر وبأحاول أتجنّبها علشان متحصلش مشكلة بينا وكمان موسوسة وغاوية نظام وترتيب يعني عندها هسهس اسمه النظام والنضافة ، عايزانا نمشي بالمسطرة والمواعيد ، كل شيء منظم أكثر من اللازم وكل حاجة بالمقاس وكل حاجة بميعاد ، النوم ، الأكل ، الدش حتى الفرجة على التلفزيون ناقص تخلي الضحك بميعاد أنا عايش معاها زي ماكنت عايش أيام الجيش من غير مبالغة والله ، وعلى طول هي صح وأي حد تاني غلط ، وإذا حد فينا أنا أو الأولاد خالفنا الأوامر يبقى نهار مش فايت تعمل له طابور ذنب وتفضل تزعق وتتعصب ومحدش بيقدّر يهديها ، وعلى طول هي صح وإحنا كل تصرفاتنا غلط ، مش هاتفهموا غير لما أحكي لكم اللي بأشوفه منها .

في يوم كنت قاعد في أوضتي وسمعتها بتزعق بصوت مربع :

مين اللي عمل كدا؟

أنا وقفت على طول وحسيت بالخوف وركبي خبطت في بعضها وبدأت أسأل نفسي هو أنا سبت نور الحمام واللع ؟ لا أنا متأكد إنني طفيفة ، طيب شربت من إزازة وهي في التلاجة؟ برضه لأ أنا بأشرب من الكولن دايمًا ، يبقى



وقعت أكل ولا شاي في أي حطة ؟ أكل إيه إحنا واكلين بقالنا ٣ ساعات مش معقول هاتكتشف حاجة زي دي دلوقتي ، المهم اتسحبت لحد باب الأوضة وفتحته بحرص ووقف أبص منه وهو موارد لقيتها واقفة زي هولالكو وفي أيدها إيد المقتشة أنا قلت بس أكيد ناوية على الشر وكانت عمالة تزعق بلا توقف وصوتها جايب لآخر الشارع:

هو أنا حديد أفضل ألم وراكم ماكل واحد يلتزم بالنظام ولا انتوا أعداء الترتيب ، أنا عملتكم كتير وغلبت ومفيش فايده أبدًا.

وسألت نفسي إيه الغلطة الكبيرة اللي حصلت وخلتها تتنرفز قوي كدا وفتحت الباب ووقفت عنده والله ما قدرت أتحرك سنتي واحد بعد كدا وسألتها بصوت منخفض:

هو فيه إيه ؟

أنا قلت ميت مرة اللي يشيل حاجة يرجعها مطرحها.

أيوه ما أنا عارف و.....

يبقى مين اللي شال الفوطة من على الفواطة ومحطهاش مكانها تاني ؟ قدرت أتنفس أخيرا لأنني دايماً ملتزم بترتيب الفوطة زي ما كانت وبصيت على الفواطة لقيت الفوطة مكانها فقلت :

ماهي موجودة أي .

موجودة لكن معوجة حوالى ٣٠ سنتي .

المهم إنها في مكانها وخلص.



جامد ولبس في وشي والنتيجة كدمة جامدة جدًا في وشي ومناخيري، علشان تفكرني بياني ماتدخلش تاني في أي حاجة بتعملها وهي متعصبة يا إما هاخسر حياتي .

ودي كانت مرة ، مراتي بقى مش بس عصبية وعنيفة لأ دي كمان متسلطة بتتدخل في كل تفاصيل حياتي وعازية تسيطر عليا بأي طريقة ، كانت بتتدخل في أكلي .. أكل إيه وما أكلش إيه ، أقابل مين وماقابلش مين، أكلم فلان وماكلمش فلان ، اخرج مع أصحابي ولا لأ ! وبتتدخل حتى في لبسي عايزاني زي الخاتم في صباعها وإذا حاولت اعترض على طريقته أو أسلوبها تبقى خناقة ومنخلصش بقى ، شكلكم مش مصدقني طيب شوفوا عملت فيا إيه ؟

في ذات يوم كنا معزومين على فرح ودخلت ألبس وبعد ماخلصت لبسي دخلت مراتي العنيفة وبصت لي بعدم رضى وقالت :

إيه ده؟

إيه يا عفاف؟

انت لابس الطقم ده ليه؟

لفيت قدامها وأنا معجب بنفسي وقلت لها :

البدلة مش عاجباكي دي

مكملتش كلامي وقاطعتني فورًا وقالت:

لأ لأ .. غير الطقم ده مش حلو.



البنطلون إتقطع ياهانم قلت لك إنه ضيق مسمعتنيش.

الحق عليا اللي عايزاك تبقى شيك.

وهو أنا مبقاش شيك غير في بدلة محزقة وصغرت عليا ؟

قلعت جاكيت البدلة ولفيته على وسطي وكملت كلامي :

أنا طالع أغير، استنوا هنا.

هاتلبس إيه ؟

الطقم الشيك اللي خليتيني أقلعه.

لأ أنا هاطلع معاك أختارك حاجة .

برضه يعني مفيش فايده ؟

وظلعت معايا الشقة تاني ولبستي على مزاجها تاني ورحنا الفرح وأنا فضلت مبوز وقرفان آخر قرف ده أنا أبويا مكانش عارف يلبسني على كيفه تقوم هي تعمل فيا كدا ، آه يازمن ، أنا إيه اللي خلاني أتجوز ما أنا كنت مرتاح وعائش على حريتي ، أجبب واحدة تتحكم فيا وتتأمر عليا في كل حاجة ؟ مييلة بخت والله .

حاولت اتكلم معاها بتعقل وهدوء وأقنعا بإنها مينفعش تتحكم فينا كدا أنا وولادي لكن موصلتش معاها لأي تغيير دايمًا تقول لي :

البيت ده ولازم يكون له نظام وكفاية قوي إني بأظبطه ولو سبته لك هاتخسر الولاد والنظام اللي أنا عاملاه.



نظام إيه هو إحنا في الجيش ده إحنا أسرة ولازم نعيش حياة طبيعية في بيت مش معسكر تدريب ، ماعلينا الكلام معاها بقى زي ما يكون الواحد بيخبط راسه في الحيطه.

أخوها زارنا في يوم واستقلته بالبوس والأحضان ، الله ما انت بتعرفي تتصرفي بحب أهو أمال منشفاها عليا ليه؟ ده أنا لوغبت شهر مش هاتستقبلي كدا ، أخوها اللي لسه شايفاه إمبارح تقابله كدا طيب ده أنا فاكرا إني مرة بعد جوازنا راجع من بره وبأمد بوزي أبوس خدها سابتي واقف وبعدت بقرف وقالت لي بصرامة:
اغسل وشك الأول.

ولا حتى ابتسمت في وشي إيه مش مهم ، أخوها قعد معانا بقت رايحة جاية تجيب له السخن والساقع والضحكة اللي بأشوفها في المواسم والمناسبات بس مافرقتش وشها وقعدت جنبه وبعد كل كلمة وكلمة تقول له يا حبيبي وتمسك إيدته بحنية وأنا هاموت من الغيرة ، إيه مستغربين ليه وبتسألوني أغير من أخوها ؟ أه أغير ماأنا مباشوفش الكلام ده خالص وكأني عايش مع واحد صاحبي وإيه صاحبي الغتت كمان ، بقيت بأراقبها وهي عمالة تدلوق حنية وحب على أخوها وأنا قاعد بأتحسر على حالي ، عمرها ما قالت لي يا حبيبي دي ولا سمعتها حتى أيام شهر العسل ، كل معاملتها معايا ناشفة جدًا ، قلت يمكن العيب فيا أنا مش فيها وسألتها :
انت متضايقه مني في حاجة يا عفاف؟



أيوه متضايقة منك.

كوبس قولي لي إيه اللي بيضايقك مني وأنا أحاول أتغير.

كنت يائس والله عايز أشوف حنية من مراتي ، معذور ياناس ردت عليا رد صادم جداً:

انت عامل زي العيال الصغيرة وعايز تدلع وتهزر .

إيه اللي هي بتقوله ده ؟ هو أنا شفت منها دلع ولازفت ده كل حياتي عبارة عن معاناة شديدة وجفاف في المشاعر والحب وكل حاجة كنت عايز أرد بس لقيتها كملت :

انت كبرت خلاص وبقيت أب ولازم تبقى تقيل شوية .

الله إيه كبرت يعني هو أنا مش بني آدم وبأحس عايز زوجة تحبني وتحسني بالحنان مش حتى لو كبرت هو الحب والعطف لهم سن معين يعني أنا كنت مسترسل بأفكاري المعارضة على كل كلمة بتقولها وفجأة انتهت لجملتها:

وكمان معندكش نظام ودايمًا تلخبط النظام اللي أنا عامله.

هنا بقى اضطريت أمنعها تكمل وقلت لها بهدوء :

النظام ده في الجيش ، في المدرسة العسكرية لكن مع الأسرة لأ مينفعش

و.....

ومكلمتش طبعًا لأنها إنفعلت عليا وقالت بعصبيتها المعروفة:

مش قلت لك انت مش متعود على النظام بتكرهه لأنك متسيب و.....



وقعدت تعد حاجات فيا مش عاجباها وسببها تكمل براحتها وأنا بأقول ياريتني ما اتجوزت ، كنتي فين يا لأ لما قلت أنا آه ؟ أنا كان إيه اللي رمانى الرمية دي وخالاني أتجوز ؟ بقى أنا اللي مش عاجبها كمان ؟ مش كفاية إني مستحمل معاملتها وطريقتها اللي تطفش أي راجل وساكت ومبفتحش بقى ، ده أنا عايش كأن معايا شريك في السكن والله وجالي اكتئاب فترة كبيرة والله لكن كان لازم أكمل حياتي علشان خاطر أولادي وكنت بأحاول إني أعاملهم بحنية وأعوضهم شوية عن قسوة أمهم والصرامة اللي بتعاملهم بيها ، وكنت بانتهاز أي فرصة تخرج فيها وألعب معاهم وأهزر واخلمهم يشوفوا شوية حنية من المحرومين منها دي .

يوم الجمعة نزلت تشتري الخضار من السوق وفضلت لوحدي مع العيال وقلت فرصة وقعدت أهزر معاهم ونهلل ونلعب وجرينا وراء بعض وعملنا عمال و طبعًا كركبنا النظام شوية وكان المفروض إنها ترن عليا وأروح أجيبها من السوق بالعربية لكن اللي حصل كالاتي :

سمعنا مفتاح الشقة بيدور في الكالون وقفنا بفرع ، كبسة !! وأنا رحنت بسرعة وفضلت الباب بالترباس قبل ماتفتح وجرينا أنا وولادي ياعيني زي المتكهربين في كل حته في الشقة نرتب المكان ونرجع كل حاجة لأصلها وهي بترن في الجرس ومرضيتش أفتح لها إلا بعد ماخلصنا كل حاجة وفتحت لها وأنا فاكر بياني نظمت المكان ودخلت طبعًا وهي بتزقق:

إيه نايمين على ودانكم مبتفتحوش ليه ؟



أنا كنت في الحمام والولاد كانوا بيذاكروا في أوضتهم .
وقافل بالترباس ليه بقى بقالي ساعة واقفة على الباب.
قافل بالترباس علشان ... علشان .. انت مش قولتي هاترني عليا علشان
أجيبك جيتي لوحدك ليه؟

لقيت تاكسي وصلني لهننا هات الأكياس وحصلني .
ودخلت الشقة ، هي أخذت خطوة واحدة بس ووقفت تبص حوالها بنظرة
فاحصة ثاقبة وأنا قلبى بقى بيدق زي الطبل يارب تكون كل حاجة رجعت
لمكانها يا إما هانقضي أسبوع نكد .. غمضت عيني وقعدت أدعي ولما فتحهم
لقيت وشها قدامي بالظبط إتخضيت ورجعت لورا :

إيه يا جفاف ... قصدي يا عفاف ؟

إيه اللي حصل في الصالة دا ؟

محصلش حاجة .

عaaaaaaaaاادل قول اللي حصل وإلا

لقيتني عملت زي أمينة مع سي السيد واعترفت بكل حاجة طبعاً تحول
اليوم إلى يوم غير معلوم المنظر وندهت للولاد وعملت لنا طابور ذنب
وسمعت أنا كمان كلمتين:

انت مستهتر بقى أغيب عن البيت لأفيك قالبه بالشكل ده والولاد تضيع
وقتهم وتخلهم يسيبوا المذاكرة ويلعبوا .. يلعبوا يا عادل ؟



إيه يا جفاف محسساني إني خليتهم يسيبوا الذاكرة ويشربوا سجائر مثلاً
وقلت لها:

الولاد محتاجين وقت يلعبوا فيه و.....

ماعندهم الأجازة يبقوا يلعبوا براحتهم.

هو اللعب كمان له ميعاد ؟

أيوه كل حاجة لازم تكون بميعاد بعد كدا ممنوع اللعب في البيت مفهوم.

وألقت علينا بعض الأوامر ومحدث فينا قدر يتكلم .

دي هي حياتي مع زوجتي اللي قررت من النهاردة إن اسمها هايبقى جفاف لأن

عندها جفاف في المشاعر ومحدث يقدر يصدقها وجفاف كمان في الابتسامة

وشها مبيضحكش للرجيف السخن والله وده برضه شيء مهم ، يعني الرجل

بعد يوم طويل متعب في الشغل بيبقى عايز واحدة تستقبله بإبتسامة ووش

بشوش لكن مراتي جفاف بتستقبلي بتكشيرة وهي منعقدة الحاجبين

ومفيش غير جملة واحدة:

إتأخرت ليه على ميعاد الغداء فيه مواعيد لازم تحترم وأنا قلت الغداء

الساعة ٣.

كان عندي شغل والطريق زحمة.

ولسه هاقعد أريح على كرسي قالت لي :

انت هاتقعد روح غير هدومك بسرعة علشان نأكل واغسل إيدك ووشك.

حاضر يا فندم .



والله كنت عايز أعمل لها التحية العسكرية.

ده استقبال واحدة لجوزها مفيش حمد الله على السلامة ، أقعد أرتاح شوية وشم نفسك ياساتر ، العيال لما شافوني جم عليا طبعًا بفرحة ما أنا الجانب المحب الحنين ولسه هاسلم عليهم زعقت لهم على طول:

بس ياولاد بلاش دوشة وهرجلة ياللا إغسلوا إيديكم.

على الغداء بقى مبطلتش توجهات وأوامر مش للعيال وبس وليا أنا كمان : كل من غير صوت، مفيش شرب على الأكل ، خلص طبقك ، أمسك المعلقة كويس.

وحاولت أتكلم مع ولادي شوية شخبطت فيا آه وربنا شخبطت فيا وقالت لي : ممنوع الكلام على الأكل .

إيه القرف ده هاتنكد عليا كمان وأنا بأكل أنا مبقتش متحمل بقى وقمت طبعًا معجهاش:

قمت ليه؟

شبعتم الحمد لله.

أقعد كمل طبقك كله.

بأقولك شبعتم ماقدرش أكل أكثر من كدا.

دلوقتي الولاد يقلدوك ويقوموا أقعد كمل أكلك وبلاش تعمل مشكلة.

مرضيتش أجادلها قدام الولاد وقعدت كملت أكل غصب عني وقمت من على السفارة بسرعة قبل ما اتخانق أو أرفع إيدي وألزعها قلم على وشها .



وفضلت حياتي معاها على هذا الحال هي على طول عصبية وعلى طول
متسلطة ومبيعهماش أي حاجة أقولها أو أعملها ودايمًا هي اللي صح وكنت
كثير بأخرج من غير أي سبب بس علشان أطفش من البيت وبأتحجج بأي
حاجة علشان أريح أعصابي لكن هي معجهاش كالعادة وكل ماخرج تفتح لي
تحقيق:

رايح فين؟ مع مين؟ رايح ليه؟ إرجع بدري ممنوع التأخير.

حسستي إني عايش في بيت الطلبة مش بيتي وكنت محتاج أبعد كام يوم
والحمد لله جت لي سفرية أروح أحضر فرح واحد قريبي في إسكندرية قلت
فرصة أبعد عن النكد والقرف ده وغبت يومين وعشت كأني في الجنة والله
وطبعًا لما رجعت ولادي هم اللي جريوا عليا يحضنوني بفرحة:
وحشتنا يابابا قوي .

البيت من غيرك كان وحش.

وهي بصيت لها مستني حتى تقول حمد الله على السلامة قالت:

طبعًا جايب معاك هدوم وسخة ياريت تخطها في الغسالة .

هو ده استقبال مراتي لي بعد عودتي من السفر.

عيد جوازنا صحيح مش كل الناس بتحتفل بعيد جوازها بس أنا قلت فيها
إيه لما نحتفل يمكن نكسر الجليد اللي بيننا وتفك العقد اللي مكلكة فيها
دي وتحس إنها واحدة ست مش عقيد في الجيش ورتبت كل حاجة جبت
التورته وأنا والولاد جبنا هدايا وهي راحت مع مامتها للدكتور ووظبنا كل



حاجة بلونات وشموع وخفضنا الإضاءة واستنينا لحد ماجت وفتحت باب
الشقة ووقفنا وقلنا لها عيد جواز سعيد وقربت منها بالهدية ولسه هادها
لها وأنا بقول:

كل سنة وانتي ط

رفعت عينها وبصت في الساعة وقالت:

الولاد لسه صاحيين ليه لحد دلوقتي ؟

علشان نحترف بعيد جوازنا مع بعض . كل سنة وانت ط

هم مش وراهم مدرسة كان لازم يناموا في ميعادهم.

ياستي محصلش حاجة ده يوم ..كل سنة وانت ط.....

لو لخبطنا يوم يبقى خلاص مش هانعرف نظبطهم تاني .

طيب نحترف ويدخلوا يناموا على طول كل سنة وانت ط

غسلتوا سنانكم ؟

الولاد ردوا عليها بلاً طبعاً وقلت لها :

لما يأكلو التورته الأول كل سنة وانت طي

مفيش أكل حاجة حلوة بالليل ...ياللا روحوا أغسلوا سنانكم وأدخلوا ناموا
فوراً.

وطبعاً بوظت جفاف السهرة وصممت تحط التورته في التلاجة ونهت عليا :



تاني مرة متعملش أي حاجة تبوظ النظام في البيت وتسألني قبل ماتعمل أي حاجة كان لزمته إيه اللي عملته ده هو إحنا عرسان جدّاد نحتفل بعيد جواز وكلام فاضي من ده.

منك لله يا شيخه ، داهية تأخذك انتِ والنظام بتاعك ، بس والله معاها حق أنا كان جري لي إيه في عقلي علشان أفكر إني أحتفل بجوازي من جفاف ده أنا كان المفروض أقف دقيقة حداد ، لأ دقيقة إيه؟ ساعة حداد أعوذ بالله ، لميت الهدايا وحلفت لأدبهم لإخواتي وأمي وهم أولى منها ياساتر !!

الولاد دخلوا ناموا وهم زعلانين وأنا كمان لسه رايح أوضتي ندهت عليا فرحت وقلت بس هاتشكرني ولا حاجة ولا يمكن تكون إتحججت بالنظام ونيمت العيال علشان نبقى لوحدنا لفيت لها وأنا مبتسم والهدية في إيدي ولسه بأقول:

كل سنة وانت ط

قاطعتني بغضب وقالت:

رجع الصالة زي ماكانت قبل ماتنام.

ودخلت الأوضة وهي بتكمل كلامها بسخرية:

بلالين في كل مكان وشغل عيال.

شغل عيال فيه واحدة ترجع بيتها تلاقي جوزها عامل لها مفاجأة وتورته وهدايا ومزوق البيت وتعمل كدا ؟ دي كان لازم تنتنطط من الفرحة مش تزعق دي حتى ماقلتش شكرًا ؟ إيه متجوز تلاجة ؟ والله خسارة إني فكرت



فيها ، مرة ومش هاتتكرر ومش هاتشوف متي أي هدية بعد كدا ، مسكت البلالين وفرقتهم واحدة واحدة من غيظي وبعد ماخلصت الترتيب دخلت أنام مع أولادي حبايبي وأخذتهم في حضني ، ماحنا ملناش غير بعض في المعسكر ده ويمكن حضنهم يعوضني عن الحرمان اللي أنا عايش فيه، ويارب يصبرني على اللي أنا فيه.

الحاجة بقى اللي خلتنى أعيد النظر في جوازنا وحياتنا وأعيد ترتيب الشخصيات والأدوار في البيت إني في يوم عزمت واحد صاحبي يبجي يشرب معايا الشاي وده شيء مش غريب يعني بيتي وحببت أستقبل فيه صديقي بدل مانقعد على قهوة ولا حاجة ، ده فيه حاجة غلط ؟ على اللي عملته فيا ؟ أنا دخلت صديقي الصالون ورحت لها تعاملت معايا وكأني الواد الصغير اللي عزم عيل تاني وجابه على البيت من غير ماياخذ إذن ، وقالت لي:

انت إزاي تجيب صاحبك من غير ماتقول لي ولا تستأذن؟
أستأذن ده إيه؟ ده بيتي .

لأ يا أستاذ ده بيتي ولازم تقولي لي مين جاي وجاي ليه ؟ مش سهيلة هي.

اللي حصل ، عزمته يبجي يقعد معايا شوية فيها إيه؟
فيها إنك بوظلت نظام البيت .

إلهي يتحرق النظام بتاعك ياشيخة ، نظام إيه ؟ إسمعي معايا ضيف
إعملي لنا شاي وهاتيه دلوقتي .

مش هاعمل أي حاجة .. بما إنك جبته من غير موافقتي يبقى إعمل انت .



بلاش تعملي مشكلة يا جفاف.
إيه وكمان بتتريق على اسمي؟
ياستي مش قصدي غلطة غصب عني .
هي دي آخرتها طيب إيه رأيك أنا هاروح امشيه ؟
ميصحش كدا يا عفاف ده ضيفي.
ضيفك !! ليه انت عايش في البيت ده لوحديك ؟
وطي صوتك أرجوك لأحسن يسمعك.
أنا أتكلم زي ما أنا عايزة واللي مش عاجبه يمشي .
حاولت أسد بقها بأي طريقة وبصت لي بغضب وقالت:
أنا داخلة أوضتي وياريت تمشيه يا إما هاخرج أنا بعد ربع ساعة واطرده .
وفعلاً راحت دخلت أوضتها وقفلت على نفسها الباب وأنا عملت الشاي
ورحت لصاحبي اللي فضل ملطوع في الصالون ووقدمت له الشاي وقلت له:
معلش إتاخرت عليك كنت بأعمل الشاي أصل المدام ماتت .
صاحبي إتخض فصلحت على طول وقلت :
قصدي نامت يا أخي نامت .
بصلي بطريقة أدركت منها إنه سمع كلامها وبقيت قاعد معاه قلقان لأحسن
تخرج من أوضتها وتيجي تعمل لي مشكلة وقفلت باب الصالون علينا وهو
يادوب شرب الشاي واستأذن على طول وده اللي خلاني اتأكد بإنه فعلاً سمع



كلامها وبعد ما مشي صاحبي ويادوب قفلت وراه باب الشقة خرجت لي زي العاصفة وهات يازعيق:

البيت ده له نظام ، تاني مرة ماتعزمش أي حد من غير ماتقول لي ، مش زريبة هي وفضلت تجيب من الشرق والغرب وأنا كنت بأستدعي الشخصية الحقيقية بتاعة راجل البيت وفجأة وهي بتتكلم قريت منها ومسكت ذراعها بقوة وزعقت :

إسكتي بقى .

إيه يا عادل ؟

أنا زهقت منك ومن نظامك وطريقتك ، قرفتيني ياشيخة وحولت حياتي أنا والولاد لهم ونكد وبقيت عامل زي الإنسان الآلي ..

انت جري لك إيه يا عادل ؟

قولي إيه اللي ماجراش كرهتينا في عيشتنا وختليني أكره البيت والقعدة فيه

هو حد يكره النظام؟

إحنا مش مكن علشان نعيش بنظام مفهوش حياة ، إحنا عايزين نعيش زي البني آدمين مش زي التماثيل أنا سكت لك كثير مش خوف لأ لكن علشان أحافظ على البيت وعلى الولاد بس انت نسيتي نفسك وإفتكرتي إنك راجل البيت لأ إصحي وفوقي أنا راجل البيت وكلامي هايمشي على رقبتك ، من النهاردة نظامك ده هاولع فيه والبيت هايمشي بنظامي أنا .. عجبك أهلاً



وسهلاً معجبكيش الباب يفوت جمل وإعرفي إنه لولا العيال كنت طلقتك من زمان بس أنا هأجى على نفسى ليه ؟ هاظلم نفسى ليه ؟ بعد اللي عملتيه النهاردة مالكيش عيش معايا.

عايز تطلقني يا عادل ؟

عايز أعيش ، عارفة يعني إيه عايز أعيش ؟

وأخذت نفس عميق وفردت نفسي وقلت لها:

جفاف انتِ طالق.

الله وأخيراً قولتها ، إيه ده ؟ سيبيني أعيش بقى.

أنا فرحت والله بس فرحة لم تكتمل واستمرت أسبوع واحد بس لأنى رجعتها علشان ولادي حرام يتربوا بين أب وأم منفصلين وهي يعني أخذت درس بس مش قوي لأن اللي فيه داء ميعرفش يبطله ورجعت لحياتي معاها و بعد مارجعت دوري كزوج وراجل البيت الحياة إتحسننت شوية شوية ، طبعاً هي كان صعب عليها تتغير مرة واحدة علشان كذا سببها تتعود بالتدريج إيه رأيكم في اللي عملته مش بالذمة عندي حق؟



الفخ العاشر

الزوجة المهملة

أكثر حاجة ممكن تصدم الرجل في الزواج إنه يتجوز واحدة وتطلع عكس ماكان بيتمنى أو يتخيل بتبقى صدمة حقيقي ، وطبعًا حتى لو مش سعيد الانفصال يببقى قرار صعب وخصوصًا لو فيه أولاد وببلاقي الرجل نفسه حبيس زواج ميعرفش يخرج منه ويبضطر إنه يتكيف مع الوضع ويتحمل وأكبر مقلب ممكن يأخده أي راجل هو الزوجة المهملة ودي أسوأ نوع ممكن أي راجل يتربط بيه خصوصًا إذا كان زي منظم ونضيف ومرتب.

أنا بقى اتورطت لأنني اتجوزت بنت عمي وعلى طول كنت معجب بأناقتهما وجمالها وإنهزرت بصورتها اللي ظهرت بيها قدامي واتفقوا أمهاتنا إنهم يجوزونا وأنا عجبتي الفكرة وأمي كانت بتقول أهي من العيلة ومتربية على إيدنا ووافقت وياريتني ماوافقت كان حتة مقلب طلع من عيني والله .. ليه؟ أقول لكم ليه .

لأن المظاهر فعلاً خداعة و أحيانًا ممكن الرجل يقابل ست أنيقة وجميلة ويتأخذ بالها من نفسها جدًا وحريصة تظهر دايمًا بأحلى صورة وده يببقى ظاهريًا لكنها وبرغم من شياكتها وصورتها الجميلة خارج البيت ، بتهمل بيتها



وأسرتها وبنيت عمي طلعت منهم يعني من بره آخر نضافة وجمال ومن جوه حدث ولا حرج.

بعد الجواز حسيت باني متجوز واحدة تانية غير اللي خطبتها ، مش دي أبداً البنيت اللي كلها حيوية ونشاط دي واحدة تانية مختلفة إختلافاً كلياً وجذراً عن البنيت اللي خطبتها لقيتها بتنام للضهر وتسهر طول الليل قدام التلفزيون و إهمال مراتي ظهر على طول ومن أول يوم طبعاً في عدم نضافة البيت في كل ركن من أركان البيت اللي بيبقى في منتهى الفوضى ، هدموم كثير في الغسالة والمطبخ مش مرتب وفيه أواني مش نظيفة كثير ، فرش السرير، الستائر إلخ وكل مظاهر الإهمال اللي بتظهر في كل ركن في البيت . بتسيب الغسيل يتكوم في الغسالة لما ريحته تطلع والمواعين مالية الحوض لدرجة أحياناً بأحي أعمل لنفسي كوباية شاي مش بالاتي كوباية نظيفة وسايبة البيت يضرب يقلب وكلمتها أكثر من مرة وحاولت معاها كثير وجبت عمي ومراته ومفيش حاجة نفعت الحقيقة وإضطريت بأني أعتمد على نفسي في حاجات كثير ونسيت إني راجل والله ، لقيتني أنا اللي بقيت ست البيت مش هي يعني أرجع من شغلي أدخل المطبخ أطبخ لأنها مابتصحاش غير بعد أدان العصر يعني أرجع من شغلي مالاقيش حاجة أكلها و أشطب المواعين وأشغل الغسالة وأغسل وكمان كنت أوقات كثير بأنشر ويوم الجمعة بقيت بأنضف البيت ولقيتها مرة بتسألني سؤال غريب قوي :

انتَ بتنضف ليه هو إحنا جاي لنا ضيوف؟



هو الواحد مينضفش غير لما يكون جاي له ضيوف ؟ الإنسان لازم يعيش في مكان نظيف يا ماجدة .

كانت بتتعجب قوي وتستغرب أنا ليه بأعمل كدا وكنت بأجبرها تساعدني وبتقوم متكاسلة وتعمل كل حاجة ببطء وكرونة .

أنا مش عارف أنا إيه اللي خلاني أتنيّل وأتجوز ما أنا كنت قاعد باشا في بيت أهلي وأمي بتدلعي وبتعملي أكل وإخواتي كمان ، الجواز إستقرارًا لكن بالنسبة لي أنا بهدلة وتعّب قلب ، غسيل وتنظيف وطبخ وكأني عازب والله لو الزمن يرجع بيا تاني مش هاتجوزها أبدًا ، لأ ده أنا مش هاتجوز تاني خالص ، هاعيش طول عمري عازب بلا جواز بلا هم ، الله يسامحك ياماما .

ماجدة بقى بتحب المسليات جدًّا وبتجيب وتفضل قدام التليفزيون تقزقز لب وتاكل سودانى وأنا أنضف وراها وبيتي وبينكم .. هي ريحت على كدا أكثر وسابت كل حاجة على أنا ، لو كان على إهمال البيت يمكن كنت استحملتها لأني تحملت المسؤولية وكان ممكن أجيب أي حد ينضف ويطبخ إن لازم الأمر لكن هي كمان مهملة في نفسها جدًّا في البيت بتلبس أي حاجة وعلى طول شعرها مش مترتب وشكلها لايسر عدو ولاحبيب ..

ليه كدا ياماجدة ده انتِ قبل الجواز كنت ولا ملكات الجمال مكنتش بأشوفك غير متزوقة ومتحنتفة وعلى سنجة عشرة تحولتي كدا ليه وبقيتي عاملة زي سناء يونس ، وفين الشياكة واللبس الآخر موضه من يوم ما



اتجوزت وهي معلقة على بيجاما مهرولة وشوية لبس مش عارف جايباه
منين وكل ماقول لها تغير تقولي : ما أنا قاعدة في البيت.
إيه يعني البيت؟ ماتلبسى كويس حتى وانتِ في البيت أنا ذنبي إيه أشوف
منظرك كدا؟ وبعدين ده إحنا لسه في أحلى أيامنا متجوزين جديد ولسه
مجبناش عيال يشيلونا الهم بس كنت باكلم مين ؟ ولا سألت في كلامي
وسألتها في مرة:

فين البيجاما الستان اللي طنط جايباها لك ؟
في الدولاب.

ماتقومي كدا تلبسها بدل القرف اللي عليكي ده .

خلها أبقى ألبسها لما أخواتي بيعجوا .

إخواتك ده إيه؟ قومي بأقولك البسيها وحطي بارفان من اللي جوه.

الله وماله اللي أنا لابساه ، خلي البيجاما بخيرها وبلاش أبهدلها.

وهي دي كانت فكرة مراتي عن اللبس الكويس إنه يتلبس بس قدام الناس
والبارفان يتحط وتلبس شيك لما يكون حد جاي يزورنا وبس .

مرة قمت من النوم بالليل عايز أشرب ورحت المطبخ فتحت التلاجة ملقتش
فيها ولا إزازة مياه كالعادة . أمرني لله شربت من الحنفية وخارج من المطبخ
لقيت قدامي في الضلعة عفريت شعره واقف صرخت بفرح ورجعت لورا :

بسم الله الرحمن الرحيم ..

مالك يافوزي ؟



مين؟ ماجدة؟

نورت نور المطبخ وبرضه أتخضيت لقيتها واقفة لابسة بيجامة واسعة
وشعرها منكوش وواقف كأنها إتكهربت وسألتها :

انتِ عاملة كدا ليه؟

عاملة إيه؟

زي العفريت ياما جدة مش تسرحي شعرك ؟

يعني عايزني كل ما أقوم من النوم أسرح شعري وأتذوق ؟

الله وليه لأ ، لازم مظهرك يبقى معقول في البيت بدل الفرع اللي انتِ

عاملا هولي ده ؟

أنا منظري يخوف يافوزي ؟

اخذتها من إيدها ووقفها قدام المراية وزعقت :

بصي شوفي شكلك عامل إزاي ؟

إيه ؟ عادي؟

هو إيه اللي عادي ؟ انتِ مش شايفة شعرك و

آه ، بكرة هابقي أغسله وأظبطه.

وسابتي وراحت تكمل نوم بالذمة ده اسمه كلام هي مبتحسش بنفسها أبدًا

في البيت بتبقى منكوشة ولا بسة لبس غريب معرفتش الحقيقة أقول لها إيه

تاني ؟ ملقتش كلام أقوله الله يسامحك ياماما .



الست هانم بقى مش مهملة في نفسها وفي البيت دي مهملة في كل حاجة في مرة كنا نيمين وأنا صحيت لقيت شبورة في البيت والله شبورة كثيفة كمان وريحة شياط قمت طبعًا .. وأنا بأكح ومش شايف قدامي وحاولت أفتح شباك الأوضة وخرجت من الأوضة وأنا كل شوية بأقع وأنا مش عارف فيه إيه؟ ودورت على كشاف أمسكه ولفيت الشقة حطة حطة أشوف فيه إيه لحد ماعرفت السبب ، الست حطت لبن على النار تغليه ونسيته وشاط والحلة نشفت والشقة إتملت دخان وكويس إننا مامتناش وصحيت في الوقت المناسب اللي إستفزني قوي إنها كانت لسه نائمة ومش حاسة بحاجة ، المهم فتحت كل الشبابيك وشغلت المراوح ورحت أصحيا:

إيه بس سيبي أنام شوية يا أخي .

قومي كنت هاتولعي فينا.

ليه حصل إيه؟

يابرودك ياختي باقولك نسيتي اللبن على النار وشاط والشقة كانت مليانة

دخان و.....

مالشقة مفياش حاجة أهي .

علشان أنا طفيت البوتجاز وفتحت الشبابيك.

طيب الحمد لله أنام أنا بقى .

اشق هدومي ياناس يقولوا الراجل إتجنن زعقت طبعًا وعملت هليلة وجبت

عمى ومراته وحكيت لهم على اللي بتعمله من يوم ما اتجوزنا وكنت على



وشك إنني أطلقها لكن طبعًا تراجعته خوفًا على علاقة والدي بأخوه مش
قلت لكم توريطه ملمهاش مخرج وحصل اللي كنت خايف منه جبنا أول
عيل وخلص كدا أنا لبست في الجوازة رسمي ولامحيص من إنني أكمل معاها
سواء عاجبني ولا لأ .. الله يسامحك ياماما .

من بره الله الله ومن جوة يعلم الله

مراتي دايماً بتبقى في أحسن حالاتها لما تخرج أو لما يبجي لنا ضيوف تدخل
تتشيك وتحط مكياج وتبقى لايدي والله ، وأنا بقيت أسأل نفسي ليه
مبتعملش كدا وهي في البيت معايا أنا مهمينش إنها تبقى حلوة ومتزوقة بره
أنا عايزها حلوة ومتزوقة كمان جوه البيت من حقي أشوف مراتي حلوة مش
زي مابتبقى في البيت آخر مهذلة.

في ليلة كنا رايعين فرح دخلت اخدت دش وطلعت غابت في الأوضة يبجي
ساعة ولما خرجت أنا مبقتش مصدق نفسي ، هي دي مراتي وإلا واحدة تانية
، كانت في منتهى النظافة والشياكة والجمال وأنا إنهرت بيها وشفتها زي
ماشفتها يوم فرحنا ست زي القمر.

في الفرحة بقى لفتت نظر الجميع والكل علق على جمالها وشياكتها وراحت هي
بقى تقعد مع شوية ستات وقعدت أنا مع الرجالة في جنب نتكلم وابن عمي
قالي :

يا بختك بمراتك يا أخي ، ده انت تلاقيك متني ؟



متني !! صحيح اللي ميعرفش يقول عدس !! ماتبصش لشكلها دلوقتي
تعالى شوفها في البيت بتبقى عاملة زي الشغالة والله ، وفضل يتكلم ويقول
إن مراته مش بتهم بنفسها خالص وإنه بيعسدني لأن مراته بتبقى في البيت
زي الشاويش على ، ساعتها ضحكت هو فاكر إني مختلف عنه مراته هو
الشيخ على وأنا مراتي بتبقى الأنسة حنفي هم يبكي وهم يضحك وبص لي
بدهشة وسألني :

انت بتضحك ليه؟

طبعًا مقدرتش أقول له حاجة هافضح نفسي يعني فقلت له :

من السعادة معايا ست زي القمر .

خلص الفرح ورجعنا بيتنا وأول مارجعنا مسكت إيدها وسألته:

رايحة فين؟

أغير هدومي بقى وأناام.

لأ تعالي أقعدي معايا شوية.

طيب هاغير وأجى لك.

لقتني بأصرخ في وشها لدرجة إنها أتخضت من صوتي العالي وقلت لها:

ليه ؟ تغيرى ليه؟ خليك كدا حلوة وجميلة.

كنت عايزها تفضل حلوة كدا قدامي شوية وأمتع نفسي بشياكتها وجمالها

اللي بأشوفهم في المناسبات الرسمية والأعياد فقالت :

يوه الفستان زهقني والكعب وجع رجلي .



ودخلت ياسادة وغيرت هدمومها وطلعت لي بالبيجاما الجريانة وغسلت وشها
وجت تقعد معايا بيبي وبينكم أنا بصيت لها بقرف وقلت ياميلة بختك
يافوزي يتحرق بجاز اللي يقول يا جواز ، والله يسامحك ياماما.
بقيت كل ما أحب أشوف مراتي حلوة أقولها باللا نخرج أو أطلب منها نزور
أي حد تقلب على طول من الألسة حنفي لملكة جمال وأول مانرجع البيت
كل حاجة تروح والألقى قدامي الشاويش عطية ، بالذمة حد يقدر يستحمل
العيشة دي؟

هي ليه الستات بتتزوج وهي خارجة من البيت أو لما يكون عندها ضيوف
مش برضه الزوج أحق باللي بتعمله يعني كل واحدة بتبذل مجهود وهي
رايحة شغلها أورايحة مشوار علشان تطلع حلوة مع أنه مش مهم تبقى حلوة
في عيون الناس المهم تبقى حلوة في عيون جوزها .. طبعا عملت عدة
محاولات مع المدام ومفيش حاجة جابت نتيجة وفضلت زي ماهي مهملة في
البيت وفي نفسها وحلوة للناس اللي بره واتخانقت معاها أكثر من مرة وتروح
بيت أهلها وأرجعها ولم تتغير وبقيت أنا بأصورها وهي خارجة وأحتفظ
بالصور علشان تصبرني على شكلها في البيت يا عالم حد يرضى بكدا برضه ؟



الفخ الحادي عشر

غيرة وندية

الغيرة فعلاً نار ممكن تحرق وتحول حياة أي شخص لنكد ومشاكل مستمرة وتخرب بيوت عمرانة وخصوصاً لو الست مش عاقلة وبتغير من أي واحدة ، والغيرة بتبقى مسيطرة عليها لدرجة تفقدها توازنها وعقلها وحكمتها ولما تبقى نكدية كمان بتزيد الطين بلة.

أنا لما كنت بأتفرج على الأفلام وأشوف تصرفات الممثلة اللي بتقوم بدور الزوجة وهي غيرانة على جوزها كنت بأضحك وبقول مش معقول أي واحدة في الدنيا تعمل كدا يعني تفتش في جيوب جوزها وتشوف الشعر اللي على هدومه وتشم القميص والمنديل ، دي كلها تصرفات مجنونة ، بس لما اتجوزت عرفت إن اللي كان بيعي في الأفلام كان حاجة بسيطة بالنسبة للي أنا بأعاني منه لأن المدام بتاعتي بتغير عليا بطريقة مجنونة ، مش طبيعية والله ، مش بتغير بس من أي ست لأدي حتى بتغير من حبي لإخواتي البنات ، عايزة تبقى هي وبس في حياتي ، بتفتش في موبايلي وتتصنت على مكالماتي وبتفتش في جيوبى وتدور في دولابى وبتعمل كمان زي اللي كنت بأشوفه في الأفلام مع إني والله عمري مابصيت لأى واحدة تانية لكن مكانتش مصدقة ماعرفش ليه وحولت حياتي لجحيم وعملت لي مشاكل لاحصر لها مع أفراد



عيلتي ومع زميلاتي في الشغل لدرجة إنها كانت هاتسبب في طلاق زميلة ليا
من جوزها هاحكي لكم حياتي معاها شكلها كان إيه ؟
معاكم أسامة ومراتي تهاني اللي مجنناني من أول يوم إتجوزتها فيه لأ كمان
من أيام الخطوبة وإحنا في الحفلة اللي كانت في البيت على الضيق يعني
وطبيعي إني أبتسم للناس اللي بتني لقبيتها بتقول لي :
أهدا شوية كدا وبطل تبتسم لكل من هب ودب.

أكشري يعني في وش الناس اللي بتني ؟

لأ بس خليك تقيل حبة.

وواحدة جت سلمت عليا والله ماعرف هي مين لقبيتها بتقول لي :

انتَ ابتمت للبت دي ليه ؟

عادي جاية بتني وابتسمت لها مجاملة .

ولا انتَ تعرفها قبل كدا ؟

ياستي ولا عمري شفتها والله.

امال مسكت إيدها كتير ليه ؟

أنا سلمت عليها ثانية واحدة بس و....

لأ فضلت ماسكها أكثر من دقيقة ، انتَ كان بينك وبينها حاجة ؟

أبدًا والله.

قول الحقيقة لحسن والله عمري ماهسامحك.

لاحول ولا قوة إلا بالله ماعرفهاش والله.



وظلعت صاحبة أختي وهي اللي عزمتهأ منها لله لكن تهاني اللي كانت خطيبتي أيامها فضلت مبهدلاني أسبوع وكل ماتشوف خلقتي تسألني عليها تاني لحد ماجبت المصحف وحلفت لها بإني ماعرفهاش ، بوزها إمتد بقية حفلة الخطوبة وكأنها مغصوبة عليا وكل ما أمسك إيدها تشدها مني بعنف وقلبتها نكد وفكت شوية لما البننت دي مشيت من الحفلة ، بس هل تعتقدوا بإنها رحمتي ؟

لأ طبعاً وسوتني على الجانيين ، خلتي أخاف أبص ورايا ولا ألتفت يمين ولاشمال وكنت لما بأخرج معاها وإلا أقابلها أقعد زي البننت اللي خارجة مع أبوها ولا أخوها وأبص في الأرض ، بتضحكوا ؟

والله ده اللي كان بيحصل أي نظرة تفسرها على مزاجها لو ضحكت مع جارتني ولا قريبتني يبقى فيه ببني وبينها علاقة ،ولو معملتش اللي هي عايزاها تضرب لي البوز اللي طوله شبرين ونقعد في نكد على ما أراضها وأصالحها. مرة انعزمت على فرح بنت عمتي أنا وهي طبعاً فوجئت بيها جاية البيت عندي قبل الفرح وشافت البدلة اللي أنا مجهزها رفضت إني ألبسها:

الله ليه ياتهاني ؟

عايز تلبس لي بدلة علشان تبقى شيك وحلو والبنات تبص لك ؟

الفرح هايبقى مليون شبان شيك هايسييوهم ويبصوا لي أنا ؟

وحكمت رأيها والله وإختارت لي طقم عادي ده أنا مابتحكمش في لبسها كدا وسايها براحتهأ مش تخلي عندها ذوق تقول لي :



بأغير عليك ومش عايزة واحدة تبص لك غيري واخاف واحدة تأخذك مني .
ياحبيبي أنا ممكن ربنا يأخذني منك .. لكن واحدة تانية لأ.
وحاولت أقنعها إن ده فرح للعيلة وإن كل شباب العيلة لابسين بدل شيك
مرضيتش ومنعتني أحط مكياج يووووه قصدي بارفان وقالت لي :
عايز كل بنت تعدي جنبك تشم ريحة حلوة ترجع تبص لك ؟
والله ده ظلم بقى عايز أحط بارفان .
أذا حطيت مش هاخليك تروح الفرح .
خلاص أمري لله سيبيني بقى ألبس وإستي بره.
وفعلأ سابتني ألبس ولما خرجت قعدت تشمني زي الكلب هول وزعقت لي :
انت حطيت بارفان ؟
والله ما حطيت حاجة ياتوتو ده مزيل عرق بس .
ريحته فايحة خالص .
مالوش ريحة ياتوتو والله .
ده غير التنبيهات اللي بتقولها لي :
أوعى تقوم من جنبي ، ولا تسيبي وتروح تقف مع أصحابك لأنهم
هايشجعوك تبص على البنات ، وإياك ثم إياك تسم على أي واحدة وأنا
معاك مفهوم؟
مفهوم ياتهاني .



ورحنا الفرح وكانت ليلة سوداء ، فضلت ملقحاني جنبها وماسكة في إيدي
زي العيل الصغير ومنعتني أتحرك من جنبها وحبست دمي وده كان بيتكرر
كثير وكانت وكل خروجة معاها بتنتهي بخناقة:

انتَ بتخلق في البنت دي كدا ليه؟ انتَ تعرفها ؟ البنت اللي هناك بتبص
لك ؟ إلخ .

مش أنا بقى أفهم كل العلامات والرسائل اللي ربنا بعثها لي يحذرنى منها
ويقول لي باني لازم أسيها بدل ماتجنني ، أبدًا ، ليه ؟ ليه ؟
لأني عبييط ، أيوه أنا بأعترف باني عبيط ، عبيط كان عندي كل
المؤشرات اللي بتقول إن حياتي معاها هاتبقى جحيم ورغم ذلك تفاضيت
عنها ، أقول لكم أنا استاهل كل اللي جرى لي والله بس أنا قلت يمكن تهدأ لما
نتجوز وتعرف إنها الوحيدة في حياتي وكل حاجة تتغير و تمت الجواز
للأسف وبأعترف تاني أنا عبيط وغيي ولحد دلوقتي.. بأنب نفسى بأضرها
بالجزمة لأني كملت وإتجوزتها و تهاني فعلاً اتغيرت بعد الجواز بس بقت
أسوأ ، غيرتها ماتغيرتش إطلاقاً ولا سنتي واحد بل نمت وترعرت وبقت
عاملة زي الوحش.

اللي شفته منها بقى بعد الجواز بيتهيألى محدش شافه ولاهايشوفه وبدل
ماتعقل مراتي بالعكس إتجننت أكثر وبقت تحاصرني أكثر وعملت فيا عمائل
!!! أنا كنت عايش مع المفتش كورومبو وتحت المراقبة على طول ، من كتر
غيرتها بقيت بأخي عليها حاجات كتير وبأكتب أسامي زميلاتي بأسماء رجاله



يعني سميرة عندي خلتها سمير ورجاء سميتها عبده وفاطمة اسمها علي بس هي عمرها ماتهدت كانت بتعمل تصرفت غريبة جدًا زي إيه ؟ أقولكم أنا ،
مثال بسيط:

في ليلة كنت نايم وقمت على صوت خرفشة في الأوضة وفتحت عنيه وبصيت لقيتها ماسكة بدلتي وشنطة أوراق وهات يافتيش فضلت أراقبها شوية وأنا مستعجب هي بتعمل إيه؟ وقمت من غير صوت وقربت منها وهي منهمكة في البحث وخطيت بقي جنب ودنها وقلت بصوت عالي :
بتعملي إيه ؟

هي إتخضت ووقعت الشنطة على الأرض ومن بجاحتها بصت لي بغضب وقالت:

إيه بتزعلي كدا ليه؟ خضتني ؟

نورت النور وقلت لها :

ممكّن أعرف انتِ بتعملي إيه ؟

باشوف بتعمل إيه من ورايا يا أستاذ .

أعمل إيه من وراكي يعني إيه دي شنطة شغلي وفيها أوراق.

والله !! طيب وإيه دي؟

ولقيتها مسكت صورة لسميرة زميلتي ورفعتها قدام عينية وبصت لي وكأنها لقت دليل خيانتي لها وسألتنني :

صورة الست دي بتعمل إيه معاك؟ هاتقول إيه المرة دي ؟



هاقول حسبي الله ونعم الوكيل ، أنا معايا صورة سميرة وصور 20 موظف وموظفة يعني مش هي وبس وإتفضلي .

وفتحت الشنطة وطلعت لها باقي الصور وكملت كلامي :

أنا كنت باخلص إجراءات التامين الصحي وطلبت صورهم كلهم ..
وعايزني أصدقك يعني؟

ياناس ياهوه حد يرحمني بقى آمال هاشيل صور زمائلي كلها ليه؟
حركة تمويهه علشان تخدعني لكن أنا صاحبة لك ومش هاتعرف تضحك
عليا .

رمت الصورة على الأرض وخرجت غضبانة وأنا كنت هاكسر سناني من كتر
الضغط عليهم وخبطت راسي في الدولاب من غيظي ، مش عارف أتصرف مع
المجنونة دي إزاي خلاص ، إحترت وإحترار دليلي معاها.

مرة تانية وأنا راجع من شغلي ووقفت هي في البلكونة تبص عليا مش
علشان واحشها ولا حاجة لأ دي كانت بتراقبني وكنت باوصل واحدة زميلتي
ساكنة في البيت اللي جنبنا ده شىء عادي بالنسبة للناس الطبيعية لكن
توتو طبعاً مصيبة كبرى وهي بقى شافتها وهي نازلة من العربية وطلعت أنا
البيت وقبل ماضرب المفتاح في باب الشقة لقيتها بتفتحه ولسه هابتسم
لها نزلت في أسئلة ولا وكيل النيابة :

- أنا ممكن أعرف مين اللي كانت راكبة معاك العربية دي؟

- دي زميلتي كنت بأوصلها للبيت ...



- ونوصلها ليه ماتركب تاكسي ؟
- ياستي هي ساكنة جنبنا وقلت مفهياش حاجة لما أوصلها معايا بدل ماتتبدل في المواصلات .
- ياسلام !! إيه الحنية دي بقى ؟ ماتسيها تركب مواصلات ولا تروح في داهية
- ميصحش برضه ياتهانى و .
- تاني مرة لو شفتك مركب واحدة ست معاك مش ها يحصل لك طيب انت فاهم !! وخذ عندك نكد وخصام أسبوع تقابلي بيبوز وتقعده معايا باليبوز نكدية ، والله لو كنت أعرف ما كنت اتجوزتها ليه يارب ما خلتنيش أسياها في الوقت المناسب .
- بعد الأسبوع قلت كفاية كدا وقربت منها علشان أصالحها :
- خلاص ياتوتو بقى متزوديهياش.
- انت خاين وغدار.
- أنا برضه .. ده أنا غلبان والله
- فتحت في البكاء بإنهيار وقالت:
- انت بتعرف ستات وبتخرج معاهم كمان.
- طبعاً فضلت أعتذر وأراضي وفين وفين على ماهديت وصدقت بس حطت لي شروط ولازم أمشي عليها علشان متشكش فيا .



طبعًا حرمتني إني أوصل أي زميلة معايا في أي حنة لكن هي برغم كدا لم
تكتفي فجأة في يوم ودعتني وأنا رايع الشغل وكان في عنيا نظرة غريبة
خوفتني وفعلاً كان إحساسي في محله بعد ماوصلت شغلي بنص ساعة
تقريبًا عملت كبسة وجت والحمد لله كنت قاعد على مكتبي مشغول في
الكمبيوتر واندعشت وسألتها:

تهاني !! إيه اللي جابك؟

فضلت تبص حوالها وتتفحص المكتبين اللي في أوضتي وقالت لي :

إيه مش عايزني آجي أزورك في شغلك ؟

لأ بس يعني مقلتيش إنك جاية.

طقت في دماغى وجيت دي حاجة تضايقك؟

لأ طبعًا إفضللي نورتي المكتب .

قعدت وسألتي :

مين اللي معاك هنا ؟

زميلتي سميرة و.....

وقفت بفرع وقالت :

زميلتك!!

لحقت نفسي وقلت لها بسرعة:

وزميلي سعيد هم الأثنين معايا في المكتب والله ، بس راحوا للمدير .



طبعا عرفت إن اليوم مش هايعدى على خير وفضلت قلقان ودخلت سميرة
وكنت بادعي يارب ماتكلمني لكن ..
سميرة قربت من المكتب وقالت :
أسامة هات الدباسة بتاعتك .

ناولتها الدباسة وأنا عيني على تهاني وقالت سميرة بحسن نية:
ميرسي ياباشا .

تهاني بقى رفعت حاجب و تفحصتها من فوق لتحت وبحلقت فيها بطريقة
مريبة لدرجة إن سميرة سألتها:
فيه حاجة يامدام؟

وقفت تهاني وقربت منها وقالت:
انتي متجوزة ؟

أيوه بتسأل لييه؟

مفيش بس كنت عايزة أعرف ، إيه اللبس الضيق اللي انت لابساه ده؟
أفندم .

طبعا توهمت أنا في الكلام ولحقت الموضوع بس تهاني معدتهاش طبعا وفي
البيت اتخانقت معايا :

ممكن تفهمني انت إزاي تقعد في مكتب واحد مع ست بالشكل ده؟
تقصدي إيه؟

الست اللي اسمها سميرة الملزقة المحزقة اللي معاك في المكتب دي؟



ياشيخة حرام عليكى دي ست محترمة وزميلة كويسة و.....

طبعا أنا غلطت لما قلت كدا لأنها اتفتحت فيا زي المدفع:

أه يعني عاجباك ؟

هو أنا قلت كدا ؟

امال عمال تقول محترمة وكويسة و....

انا بأقول الحقيقة و.....

يعني بتبص لها والله عال.

أبص إيه بس إرحميني بقى دي مجرد زميلة معايا في المكتب وبس.

انت لازم تنقل من الأوضة دي وتقعدي في مكتب لوحدهك .

نعم !! هي شركة أبويا علشان أنتنقل بمزاجي ؟

مش عايز تنقل طبعا لأن الهانم كل يوم تلبس لك ضيق وتزوق لك ، انت

راجل عينك فارغة وبصباص.

لاحول ولا قوة إلا بالله ، إيه اللي بتقوليه ده ؟

مش كنت محتفظ بصورتها معاك.

فضلت حاطة موضوع الصورة في دماغها ونسيت إن كان معايا باقي الصور

وركزت بس في سميرة طبعا أنا إنفعلت .. إنفعلت عليها وزعقت لها:

إسمعى بقى انت تتمسي وتخلى الليلة دي تعدي على خير.

وسبها تكلم نفسها وأنا خلاص على آخري ومش مستحمل أي كلمة ولقتها

هديت شوية وتاني يوم كانت عادية وأنا إستغربت بس ماسألتهاش لأنني



مكنتش عايز نعمل مشكلة تاني .. افكرت إنها نسيت الموضوع بس لأ طبعًا . هي فضلت مرقدة ومكتمة مكنتش فاهم إنها بتخطط لمصيبة وبعدين عرفت ،إزاي ؟ هو ده السؤال ؟

كنت قاعد في بيتي لابيا ولا عليا وبأنفج على التليفزيون ومراتي المجنونة ودي أقل كلمة ممكن أقولها عليها كانت قاعدة جنبي ومش عارف ليه حسيت بإنها عاملة عملة وفجأة الباب خبط بدق جامد جدًا واللي بيخبط تقريبا كان عايز يكسر الباب وقفت مراتي بفرع وأنا رحمت افتح وأنا غضبان لقيت قدامي راجل زي الحيطه طويل وعريض ولسه بازعق :

إيه انتَ فاكِر نفسك مين وبتخبط كدا ليه ؟

مسكني من هدمي بقوة وعنف وسألته:

إيه يا أستاذ ؟ انت بتعمل كدا ليه ؟ احترم نفسك شوية.

وإتكلم الراجل بقى بصوت يفرع وقال :

انتَ فيه إيه بينك وبين مراتي ؟

أفندم !! مرات مين ؟ عيب اللي بتقوله ده يا أستاذ و ...

والله ماكملت الكلمة إداني حته روصية خلت دماغي بتدق زي الطبل والدنيا لفت بيا وقبل ما أقع على الأرض مسكني تاني وهات يابوكسات وفين يوجعك ومراتي واقفة تصوت والله أنا كنت خايف عليها لأحسن الراجل يعمل فيها حاجة هي كمان وإنشغلت في العلقه اللي بآكلها ومعرفتش أفكر في أي حاجة وبعد ما الستات صوتوا وإتلم السكان في شقتي وخلصوني من إيده بس بعد



ما إتسلفطت خالص وقعدنا نستى لحد ما البوليس بييجي ورحت المستشفى
طبعًا كان فاضل لى شوية وأدخل عنبر الحالات الخطرة بس الحمد لله
ومراتي ماجدة كانت هادية على غير العادة وسألتها:

لسه محدش عرف الراجل ده مين؟

الراجل !! ده ده يبقى.....

ماتنطقي يبقى مين؟

يبقى جوز سميرة.

جوز سميرة !! وجوز سميرة بيتهجم عليا ليه ؟

لقتها مرتبكة ومش عارفة تتكلم وطبعًا اول مرة أشوفها كدا لأن لسانها على
طول منطلق فبدأت أشك وسألتها:

انتِ تعرفي منين إنه جوز سميرة؟

وقفت ساكتة وده خلاني أشك أكثر وسألتها :

انتِ عرفتي منين إنه جوزها ؟ ردي.

أنا قابلته.

وحكت لي بإنها راقبت سميرة في يوم وهى مروحة بيتها وعرفت عنوانها
وراحت قابلت جوزها وقالت لي :

أنا كنت خايفة تخطفك مني وكل اللي قلته له إنه يحوش مراته عنك
علشان هي حاطة عنيا عليك وإن فيه بينكم حاجة بس.



بس !!! وانتِ كنتي عايزة تقولى إيه أكثر من كدا ؟ منك لله ، منك لله والله
لو مكنتش مكسر كان زمانى رانيتك علقه تروحي لبيت الراجل يامفترية وتتبلي
عليا وعلى مراته يامجنونة.
مانا.....

انتِ إيه ده كان هايقتلني والله أعلم عمل إيه في مراته المسكينة ؟ زمانه قتلها
، ولسه ناوي أكمل زعيق دخل البوليس ومعاهم الراجل علشان يكملوا
التحقيق وقلت كل الحقيقة طبعًا وشرحت للظابط اللي مراتي المجنونة
عملته وحلفت للراجل المسكين بإن مراته ست محترمة وبريئة وسألت عليها
والرد جه من الظابط:

موجودة في الأوضة اللي جنبك عندها شوية كسور وكدمات.
بصيت لمراتي وقلت لها:

حسى الله ونعم الوكيل فيكى ياشيخة ياحضرة الظابط أنا متنازل عن
المحضرده ، الراجل ده مظلوم عقل مراتي المريض هو اللي خلاه يعمل كدا
ياريت تسبوه وتقبضوا عليها .

انت بتقول إيه ؟

بأقول اللي لازم يحصل ، خليتي حياتي جحيم واستحملتك كمان تحطمي
حياة الناس الثانية .

والنتيجة بعد المأساة دي كانت إيه؟



طبعًا طلقها لأن العيشة معاها بقت مستحيلة وبعدين أنا مش مستغني
عن عمري .



الفخ الثاني عشر

المنانة

أنا اتخرجت واتوظفت ووالدي كان راجل على قده عنده محل أحذية وكان بيصرف علينا منه أنا وإخواتي لحد ماكملنا تعليمنا كلنا ، ولما أنا اشتغلت فضلت أساعده لحد ماجوزت إخواتي البنات والحقيقة أنا لما جيت أتجوز ظروف في مكانتش قد كدا وعلشان كدا حمايا اللي حالته كانت كويسة ومتيسر ساعدني في الجواز ووقف جنبي مشكورًا يعني محاولش يطلب مني حاجات كتير وقدرد ظروف في وأتنازل عن طلبات كان المفروض أجيبها وشال عني كتير وده شيء فضلت مراتي ماسكه لي ذلة وعلى طول تكرر ، كان لازم تقول لي : هو انت كنت تحلم تتجوزني ، مساعدة بابا هي اللي خلت لك بيت وزوجة زي الفل زي.

وبعد الجواز اتحملت كلامها السخيف وطريقتها المهينة معايا وقررت إني لازم أحسن من وضعي علشان تبطل تتعامل معايا بالطريقة دي وفكرت أسافر وطبعًا علشان مكانش معايا فلوس طلبت من مراتي إنها تبيع دهبها علشان أسافر أشتغل في السعودية ودي حاجات بتحصل لأي حد وعادي إن الزوجة تبيع دهبها لمساعدة جوزها والحمد لله سافرت بعقد كويس السعودية وأشتغلت وحالي اتحسن والحمد لله ودلوقتي عايش كويس جدًا



وبنيت بيت وعائش فيه مع مراتي وابني وعائشين مستورين وأنا حتى يومنا هذا شائل جميل حمايا والله على راسي وعمري ما تأخرت عنه في أي طلب وعمري مانسيت اللي عمله معايا لأنه وقف جنبي وساعدني كتير ولا ناسي وقفتها معايا و الحقيقة إن مراتي مايسة كمان مش مخلياني أنسى اللي عمله وعلى طول لسانها متبري منها بالرغم من إني دلوقتي بقيت في وضع مالي أحسن من والدها وإخواتها كلهم لكن هي مقدرتش تنسى أبدًا بإنها ساعدتني هي ووالدها، دايمًا في أي وقت وأي مناسبة لازم تقول لي الكلام ده وده شيء بيزعجني لأنها على طول بتقلل من قيمتي وقدام أي حد معندهاش مانع تكرر الكلام ده قدام أي حد غريب ومش بتعمل كدا معايا أنا بس لأ مع أي حد ساعدته أو عملت له أي حاجة ، لازم تمن على الناس باللي بتعمله وإنها السبب في اللي هم فيه والخير اللي شافوه من فضلها وإحسانها وعلى طول تقول لي :

هو لو مكنتش أنا بعثت دهبي كله علشان تسافر كان ده بقي حالك ؟

ياستي عارف وشكركم مليون مرة وجبت لك ذهب أحسن منه.

برضه لازم تفضل فاكر إنه لولا دهبي ومساعدة بابا كان زمانك لسه موظف صغير بتصرف مرتبك يوم ١٠ ونشحت باقي الشهر .

مش عارف اتصرف معاها إزاي علشان تغير من طريقته دي معايا ومع

الناس ، ولما كنت بألومها أو أعاتبها ترد تقول:

هو أنا بأكذب يعني مش الحقيقة.



آه ياسقى الحقيقة وأنا مش بأنكرها بس لازم تبطلي تكرري الكلام ده من غير داعي .

انت المفروض تفضل تشكر بابا عمرك كله على اللي عمله معاك هو انت من غير مساعدته كنت إتجوزتني وإلا بقى لك بيت ؟
لاحول ولا قوة إلا بالله مفيش فايده يعني الكلام اللي بتقوليه ده فات عليه سنين ودلوقتي الحمد لله أنا معايا فلوس وعائشين كويسين ليه بقى تقولي كدا ؟

يعني بأفكرك لأحسن تنسى ولا حاجة إننا السبب في الهناء والنعمة اللي انت فيهم دلوقتي.

محسسانى إني عايش في الهناء ده لوحدي ومش باصرف عليها مع إنها عايشة عيشة مكانتش هي كمان تحلم بيها بس هي مش شايقة غير اللي هي بتعمله وبس ، ودايمًا كل اللي بتعمله للناس كبير واللي بيعمله لها الناس قليل مهمما عملوا ، ومكانتش بتفوت مناسبة من غير ماتحسني إنها بتمن عليا حتى في الحاجات العادية اللي بتعملها أي زوجة لزوجها مثلا تقول:
أنا واقفة طول اليوم بأطبخك لك .

وكأنى هأكل لوحدي يعني وإلا لما تطبخ للبيت يبقى بتطبخ ليا أنا لوحدي ؟
ولا كانت عايزة تعمل للولاد وهي وأنا لأ ؟

وتقول :

إحمد ربنا إني ست نضيفه ومنضفة البيت وبأغسل لك هدومك .



ليه طيب ماهو بيتها ولازم تنضفه والغسيل هاتسيب هدومي وتغسل هدومها هي وبعدين دي بتحطهم في الغسالة وتشغل البرنامج وأنا ساعات بأعمل كدا برضه يعني مش قضية والعيال بقى محسساني إني جايب لها عيالي من زوجة تانية وإلا بأخليها تربي عيال ناس تانية وتقعده تقول لي :

أنا بأقضي وقتي في تربية عيالك .

ماهـم ولادك انتِ كمان ولا أنا جايبهم لوحدي ؟

وحاجات كتير ومواقف زي دي أبسط حاجة بتمن عليا بيها وبطريقة سخيفة مع إني على طول بأشكرها وبأشيد بيها قدام أي حد بس تقولوا إيه بقى اللي فيه داء ميعرفش يبطله..

مرة كنت عيان ونمت في السرير أسبوع كان عندي حرارة شديدة وبرد ، وطبعًا هي كانت بتراعييني وبتخدمني والحقيقة مقصرتش وكنت مقدر جدًا مجهودها وكل شوية أشكرها واللي عملته برضه واجمها كزوجة إنها تخدم زوجها في مرضه يعني معملتش حاجة فيها تضحية ولا حاجة محدش بيعملها لكن بالنسبة لها بقى مستحيل تمر من غير ماتمن كالعادة وفي مرة كنا قاعدين في بيتنا وأخواتها وأزواجهم جم يزوروني وعديلى بيسألني :

ده انتَ الحمد لله إتحسننت وبقيت كويس أهو .

أنا والله مالحقت أرد عليها لأنها دخلت زي المدفع وقالت:



أنا فضلت سهرانة جنبه أسبوع بأخدمه وبأراعيه هو لولايلا كان إتحسن ولا
خف ؟ يحمد ربنا إني كنت معاه وواحدة بالي منه والله مش عارفة من غيري
كان هايعمل إيه؟

ضيعت كل ثوابها وضيعت إحساسي بالتقدير لمجهودها واللي عملته معايا
حتى دي بتمني بيها عليا ؟

ده غير منها على أي حد من العيلة يعني ساعدت واحدة قريبتها في إيجاد
عمل ليها وفضلت تحكي وتتحاكي قدام الناس على اللي عملته وإنها هي اللي
شغلتها ولولاها مكانتش لقت شغل ولا بقالها قيمة وأنا لمتها :

ياستي بطلي بقى تتكلمي في الحكاية دي ، انت ساعدتها ولقيتي لها وظيفة
ها تفضلي تمني عليها وتذليها كل ماتشوفها.

الله مش هي برضه مكانتش لاقية شغل ولولا مساعدتي كانت زمانها مش
لاقية تآكل .

وبعدين بقى ، حرام عليكى بطلي بقى.

وحاولت أكثر من مرة أخلها تبطل تمن على الناس ومقدرتش أغيرها ..

أي حد تعمل له حاجة أو تساعد تفضل تذله بيها وتفكره في كل مناسبة
وتحكي للناس مش عارف ليه ؟

كانت بتحط الناس في مواقف محرجة كتير بسبب المن وكثير بقيت بأعذر
للناس وبسببها ناس كتير قاطعتنا وقطعت علاقتها بينا وبرضه مبطلتش ..
اللي جنني بقى منها إنها لما جابت عريس لبنت عمها فضحت البنت في كل



مكان إنها مكانتش هاتتخطب من غيرها وإن هي اللي جابت لها العريس
وأقنعتة بيها وفي كل مناسبة كانت بتخرجها من غير رحمة وكنا في الفرح
بتاعها وكانت قاعدة جنبنا واحدة من المعازيم وهي بدأت تتكلم معاها من
غير حتى ماتعرفها والست كانت بتقول:

انتي قريبة العروسة ؟

أيوه بنت عمي وحضرتك؟

انا جارة العريس ماشاء الله العروسة زي القمر.

أنا اللي جايبة لها العريس ده ، أصلها إتاخرت في الجواز ياعيني وكل ماييجي
لها عريس يمشي ومايردش.....

مسكت دراعها علشان تسكت زقت إيدي وكملت كلام ..

كانت هاتعنس يعني أنا السبب في جوازها ولولايها كان زمانها لسه قاعدة
جنب مامتها.

حتى الست الغريبة بصت لها بدهشة ومعجهاش كلامها لكن هي ولاهمها
والست قالت:

المهم ربنا يوفقهم ويسعدهم.

بس على الله تخلف أصلها عدت الثلاثين و.....

المرة دي شديت إيدها جامد وبصيت لها بغضب وقلت لها:

أظن كفاية بقى تقللي من قيمتها عيب عليكي .

هو أنا قلت حاجة مش ده اللي حصل .



طيب قومي نروح ياللا.

نروح ليه مش لما الفرخ يخلص ؟

لما الفرخ يخلص وإلا لما تحكي لكل الناس وتفضحي البنت قومي معايا بقى.
شدتها بالعافية وكانت عمالة تقاومني وأنا مرضيتش أسيها ووالدها
ووالدها شافوني وجم وрана طبعاً وقبل مانخرج من القاعة فلتت إيدها مني
وقالت:

إيه التصرف المتوحش ده ؟ انت بتعمل كدا ليه؟

وسألني عمي :

فيه إيه يا بني؟

مفيش بس إحنا لازم نمشي دلوقتي حالاً .

يابني بس قول لنا فيه إيه ؟

الناس بدأت تأخذ بالها من الخناقة واتجمعوا القرايب حوالينا والموسيقى
وقفت فجأة وهي بتقول :

انت إزاي تعاملني كدا انت نسيت نفسك ولا إيه ؟

انتي اللي نسييتي إزاي تتعاملى مع البشر و بتحبي تذلي الناس وتقللي من
قيمتهم.

تدخل والدها وقال:

حد يفهمني إيه اللي حصل؟.



يا عمى بنتك منانة ، أي حد تعمل له حاجة تفضل تكررها وتفضحه وتذله
ما بهمه ماش أي حد ولا بتعمل حساب لمشاعر الناس وإحساسهم.
وتدخلت مراتي مايسة ببجاجة وقالت :
أنا مباقولش غير الحقيقة.

الحقيقة مش معناها إهانة الناس وتحقيرهم ، ده انت مفيش حد عدى من
تحت لسانك حتى أنا ، ليه الدناءة دي مع الناس ليه؟
دناءة انت نسيت نفسك ولا إيه يابن بياع الجزم ؟ لأ فوق لنفسك وشوف
انت بتكلم مين؟ لولا فلوس بابا ودهي مكنتش بقيت بيه و
ماستحملتش وافتحتت فيها قدام الناس ومهمنيش ماهي بقالها سنين بتجرح
فيا وبتهيني وتقلل من قيمتي وفي وسط الفرحة والناس عليت صوتي ولأول
مرة وطلعت اللي جوايا وقلت لها :

انت اللي نسيتي نفسك وفاكرة نفسك قيمة وانت ولا حاجة ، إنسانة وضيعة
وحقيرة ومنانة واللي زيك لازم تعيش وحيدة وأنا لو كنت أعرف بإنك كدا
مكنتش بصيت لك ولا عبرتك ولو كان معاكي كنوز الدنيا، أنا عشت معاكي
بس علشان ولادي ولأني صاين جميل والدك ، لكن انت واحدة متستحقش
العيشة الكريمة والمعاملة الطيبة عمي انت وقفت جنبي وساعدتني وأنا
مقدر كدا واستحملت كثير منها علشان خاطر ك لكن لحد هنا وبس ، أنا
أسف بنتك متلزمينش من الليلة دي هي مش على ذمتي .



نصيحتي لكل واحد أو واحدة وقع في فخ زواج يلحق ينقذ نفسه قبل فوات الأوان لأن الإنسان بيعيش مرة واحدة ولازم يعيشها صح محدش يضغط على نفسه علشان كلام الناس أو نظرة المجتمع لأن الزوجين لما بيتقفل عليهم بابا محدش بيعس بيهم ، أنا بأحب عيالي لكن مينفعش أعيش مع واحدة بتحتقرني ومهما عملت عمري ماهرتفع في نظرها وكان لازم آخذ قراري علشان أصون الباقي من كرامتي .. انا كدا غلطان ؟

بِسْمِ اللَّهِ الرَّحْمَنِ الرَّحِيمِ

